

萬 有 文 庫

第 二 集 七 百 種

王 雲 五 主 編

駢 體 文 鈔

(四)

李 兆 洛 編

商 務 印 書 館 發 行



駢體文鈔

(四)

李兆洛編

國學基本叢書

駢體文鈔卷二十五

【誌狀類】

王史威長葬銘

此爲埋石造端。蓋自爲之。取辨名姓而已。猶得明旌旗識之遺。

漢西都時。南宮寢殿內。有醇儒王史威長死葬銘曰。

明明哲士。知存知亡。崇隴原甕。非寧非康。不封不樹。作靈乘光。厥銘何依。王史威長。

杜子夏臨終作文。刻石埋於墓前。

魏郡杜鄴。立志忠款。犬馬未陳。奄先草露。骨肉歸於后土。魂氣無所不之。何必故邱。然後卽化。封於長安北郭。此焉宴息。

宋臨澧侯劉使君墓誌

從續古文苑本

誌墓盛於晉代。乃所傳惟傅休奕一篇。又非全文。當以此爲權輿矣。其序次之式。亦頗可垂範。

曾祖宋孝皇帝。祖道鄰。字道鄰。侍中。太傅。長沙景王。妃高平平陽檀氏。字憲子。諡曰景定妃。父暢。道淵。永寧令。祖貌。稚熊。瑯琊太守。合葬瑯琊。臨沂莫府山。父諱義融。字義融。領軍車騎。桂陽恭侯。夫人瑯琊臨沂王氏。字韶風。父簡。長仁。東陽太守。祖穆。伯遠。臨海太守。合葬丹徒練壁。雩山。所生母湯氏。宣城人。葬練壁。雩山。兄顓茂。道散。騎常侍。桂陽孝侯。夫人廬江潛何氏。憲英。父愉之。彥和。通直常侍。祖叔度。金紫光祿大

夫合葬練壁雩山第三弟彪茂蔚祕書郎葬江乘白山夫人河南陽翟褚氏成班父方回太傅功曹祖叔度雍州刺史第四弟實茂軌太子舍人夫人瑯琊臨沂王氏淑婉父津景源中書郎祖虞休仲左衛將軍合葬江乘白山第五弟季茂通海陵太守葬練壁雩山夫人陳郡夏袁氏妙□父淑陽源太尉忠憲公祖豹士蔚丹陽尹第一姊茂徽嫡陳郡長平殷臧憲郎父元素南康太守祖曠思泰□軍功曹重嫡瑯琊臨沂王閔之希損鎮西主簿父昇之休道都官尙書祖敬宏左光祿儀同第二姊茂華嫡廬江潛何求子有祕書郎父鎮長宏宜都太守祖尙之彥德司空簡穆公第三姊茂姬嫡平昌安邱孟詡元亮中軍參軍離父靈休太尉長史祖景彥遠丹陽尹第四姊茂姜嫡蘭陵蕭惠徽中書郎父思話征西將軍儀同三司祖源之君流前將軍第五姊茂容嫡蘭陵蕭贍叔文父斌伯蓓青冀二州刺史祖募之仲緒丹陽尹重嫡濟陽圍蔡康之景仁通直郎父熙元明散騎郎祖廓子度太常卿第六妹茂姬嫡濟陽考城江遜孝言父湛徽淵左光祿儀同忠簡公祖夷茂遠前將軍湘州刺史重嫡瑯琊臨沂王法興驃騎參軍父翼之季弼廣州刺史祖楨之公幹侍中夫人濟陽考城江氏景嫗父滾徽源太子洗馬祖夷茂遠前將軍湘州刺史第一男晃長暉出後兄紹封桂陽侯第二男旻淵高拜臨澧侯世子第三男暉淵華第四男暉淵邃出後第四弟實第五男□淵頻第六男晏淵平第一女麗昭第二女麗明第三女小字僧歸亡葬□□

宋故散騎常侍護軍將軍臨澧侯劉使君墓誌

君諱襲字茂德南彭城人宋高祖武皇帝弟景王之穆也神姿韶雅風譽夙懋弱冠拜祕書郎逮二凶肆禍人倫道消君身離幽執僅免虎口事清還復舊職以母憂去官既除又拜祕書郎轉太子舍人自升□

二宮令望允緝。出爲鎮蠻護軍。廬江太守。莅政平簡。聲績兼著。遷明威將軍。安成太守。屬中流構壘。四表迷逆。君英義獨發。招會如神。故能以一□之旅。尅濟忠節。義超終古。誠冠當今。皇朝欽嘉。爵賞取榮。除輔國將軍。郢州刺史。封建陵縣開國侯。俄徵太子右衛率。加給事中。未拜。遷侍中。冠軍將軍。改封臨澧縣開國侯。鎮肅石頭。實當關要之寄。遷左衛將軍。未拜。仍除中護軍。春秋卅有八。泰始六年三月十日。薨於位。聖主嗟悼。朝野傷悲。有詔。故中護軍臨澧縣開國侯。志行貞純。才用理濟。忠勳著於艱時。勲績倡乎泰運。年志始壯。奄焉凶折。悲傷惻割。實兼常懷。思加寵數。以申哀榮。可贈護軍將軍。加散騎常侍。餘如故。諡曰忠侯。粵五月廿七日庚寅。將葬於瑯琊之乘武崗。以悲幽明之殊隔。傷一訣而永分。仰清徽而攬淚。俵元石而裁文。其辭曰。

峩峩□□。山岳效靈。允矣君子。誕膺休禎。支蔭帝宇。締慶文明。德以行高。仁與□□。□華二宮。官政兩服。國步時屯。艱難斯屬。忠則忘家。義實光族。朝迺欽庸。以□□□。□望旣歸。□寵惟□。或侍帝言。或司蕃戎。方宏牙美。□□家邦。如何不□。□□□躬。□芳稍述。日月有時。考辰筮吉。元堂啓基。深泉永窆。□□長悲。□□□□□□□□

宋張氏墓誌

宋故臨渭縣侯。湘東太守。張府君諱濟。夫人邱氏。諱靜姬。第三女。推兒。春秋卅有一。亡於偏憂。元徽元年十月甲辰。十七日庚申。權假窆於西鄉。

遠葉蘭飛。浚源泉潔。履順早晨。含章妙歲。選史圖容。循詩範節。皎鏡冬泉。優柔春蕙。淄北忸行。營東慚藝。

冥味慶善。宵翳壽仁。泣血實性。團憂殲身。罷景方旦。摧華載春。壠木已藹。墓草行陳。朱火幾爛。元夜無晨。江文通宋安成王右常侍劉喬墓銘

當時誌與銘。或出兩人手。故諸家集。或有銘無誌。或有誌無銘。不盡關缺佚也。

丹陽韞聖。豐鄉降賢。玉葉旣積。金徽方傳。乃毓伊人。克廣克宣。騰芬中屬。飛藻上年。杳杳虛素。永永沖關。雲意霜拍。玉立冰堅。家寶以瑩。國才未甄。參錯報善。茫昧雲元。斂魂幽石。委氣空山。膚若流波。身如絕煙。芳菲一逝。美懋徒鐫。

江文通宋光祿大夫孫奂墓銘

川祇効鏡。岳祥獻明。碧葉獨秀。瑤源自清。幼炳器譽。夙耀才名。體兼遷雲。學備儒史。紫閣咸趨。朱軒旣履。貴交慕塵。素遊企軌。騰藻上京。振彩下國。如彼綠蘭。秉芬四塞。欵人逕之不平。歎天路之冥默。貴夫君之爲美。播靈均與正則。

任彥昇劉先生夫人墓誌〇〇

旣稱萊婦。亦號鴻妻。復有令德。一與之齊。實佐君子。簪蒿杖藜。欣欣負戴。在冀之畦。居室有行。亟聞義讓。稟訓丹陽。宏風丞相。籍甚二門。風流遠尙。肇允才淑。闡德斯亮。蕪沒鄭鄉。寂寥揚冢。參差孔樹。毫末成拱。暫啓荒埏。長肩幽隴。夫貴妻尊。匪爵而重。入昭明選者。都無鄙詞。

梁簡文帝華陽陶先生墓誌銘〇〇

維大同二年。龍集景辰。克明三月壬寅朔。十二日癸丑巳時。華陽洞陶先生。蟬蛻於茅山朱陽館。先生諱

宏景字通明。春秋八十有一。屈伸如恒。顏色不變。有制贈以中散大夫。諡曰貞白先生。遺舍人主書。監護喪事。十四日巳時。窆於雷平之山。若夫真以歸空爲美。道以無形爲貴。不知悅生。大德所以爲生。不知惡死。谷神所以不死。妙哉隱顯變化。物莫能測。旣而岫開坼石。天墜玉棺。銀書息簡。流珠罷竈。九節麗於空中。千和焚於地下。僊官有得朋之喜。受學振臨谷之悲。余昔在粉壤。早逢圯上之術。今筮元良。屢稟浮邱之教。握留符而惻愴。思化杖而酸辛。乃爲銘曰。

無名曰道。不死爲仙。亦有元放。兼稱稚川。遁形解化。自昔同然。猗歟夫子。受籙歸元。梨傳苑吏。書因賈船。虎車照景。蜺拂淩煙。餘花灼爍。春澗潺湲。鬱鬱茅嶺。悠悠洞天。三山白鶴。何時復旋。秀若芝英

梁簡文帝戎昭將軍劉顯墓銘

鍊句頗與鮑近

繁弱挺質。空桑吐聲。分器見重。播樂傳名。誰其均之。美有髦士。禮著幼年。業明壯齒。厭飫典墳。研精名理。一見弗忘。過目則記。若訪賈逵。如問伯始。穎脫斯出。學優則仕。議獄旣佐。芸蘭乃握。搏鳳池水。推羊太學。內參禁中。外相藩岳。斜光已迫。殞彼西浮。百川到海。還逐東流。營營返魄。汎汎虛舟。白馬向郊。丹旒背鞏。野埃興伏。山雲輕重。呂掩書墳。揚歸元冢。爾其戒行途。窮土壠。弱葛方施。叢柯日拱。隧柳萸春。禽寒斂翫。長空常暗。陰泉獨湧。耐彼故塋。流芬相踵。

梁元帝庾先生承先墓誌

悠哉掌庾。興自陶唐。伯舅居晉。連鑣渭陽。爰斯厥後。世挺珪璋。乃登靈岳。言遵洞府。乃涉石山。將從輕舉。實惟貞吉。實惟退讓。皎皎不羣。超超高尚。本同壽夭。寧論得喪。諸方未遊。佳城已望。蓬生蔣徑。鈞罷磻谿。

檀悲新壠。桃餘故蹊。風翻嶺背。月下松西。揚名不朽。高蹈夷齊。

梁元帝侍中吳平光侯墓誌銘○

惟嶽降神。表山甫之德。敬如君所。顯成季之徵。潔靜精微。岐嶷天挺。學兼義府。談均理窟。歷太子洗馬。八人掌籍。爲崇賢之領袖。五日來朝。冠承華之楷模。遷豫章內史。法井鸞峯。甘露歲下。蕭崖鶴嶺。連理成陰。徵爲太子左衛率。遭疾薨於道。頗類陶基。民號燕北。取譬羊祜。巷哭荆南。副軍早垂隆眄。憫其石火。瞻斯翠蓋。忽變丹旒。方使桓侯石椁。載銘盛夏。滕令佳城。式鑄韶濩。已開四傑

溫鵬舉司徒元樹墓誌銘

昔樞電降祥。姬水成業。握八符以馭世。膺五命以會昌。欽明格於上下。光澤被於宇宙。卜年永久。歷世遐長。有文王之孫子。啓周公之苗裔。積善所及。踵武稱賢。每以辛李爲言。恒持韓白自許。殫百慮之一致。盡能事於生民。蒼蒼在上。義歸無厚。徒有東平避世之意。空懷北海自晦之情。疾非逢霧。終異啓手。銘曰。明允篤誠。發於岐嶷。未鏤已雕。不扶而直。修理以耕。強學爲殖。孔旣歎魯。莊亦吟越。況以度思。有懷明發。翻然高舉。歸於魏闕。長路未窮。朝光已沒。

徐修仁故永陽敬太妃墓誌銘○

永陽大太妃王氏。瑯琊臨沂人也。其先周靈王之後。自秦漢逮於晉宋。世戴光□。羽儀相屬。旣以備於前志。故可得而略焉。祖粹。給事黃門侍郎。父儼。左將軍司馬。尋陽內史。並見稱時輩。太妃體中和之氣。稟華宗之烈。蹈此溫恭。表茲淑慎。孝敬資於冥發。仁愛□於自然。至乎四教六訓之閑。工言貞婉之德。無待教

成罔不該備。故景行著於中。淑問顯乎言歸。作嬪盛德。實光輔佐。親縫幕之用。躬服澣之勤。及早世釐居。遺孤載藐。提攜撫育。逮乎成備。斷織之訓。既明闔門之禮。斯洽。劬勞必盡。曾不移志。用能緝睦於中外。亦以宏濟乎艱難。雖魯姜之勤節。曹妃之敬讓。方之蔑如也。皇業有造。殷憂啓聖。追惟魯衛。建國永陽。恭王纂嗣。蕃號式顯。乃拜爲太妃。策曰。維天監二年六月甲午朔十日癸卯。皇帝遣宗室員外散騎侍郎。持節兼散騎常侍蕭敬寶。策命永陽王母王氏爲國太妃。曰。於戲。惟爾茂德內湛。粹範外昭。國序凝芬。蕃庭仰訓。是用式遵舊典。載章徽服。往欽哉。肅茲休烈。可不慎歟。備榆璜之華。而降心彌約。居千乘之貴。而處物愈厚。旣而恭王不永。禮從□□。訓導嗣孫。載光榮社。年高事重。志義方隆。宜永綏福履。而奄奪鴻慶。以普通元年十月廿三日。遘疾。十一月九日己卯。薨於第。春秋五十有九。詔曰。永陽大太妃。奄至薨逝。哀摧切割。不能自勝。便出敍哀。可給東園祕器。喪事所須。隨由□辦。祖行有辰。式宏茂典。又詔曰。故永陽大太妃。禮數有殊。德行惟光。訓範蕃嗣。式盛母儀。卽遠戒期。悲懷抽割。可詳典故。以隆嘉謚。禮也。粵其月廿八日戊戌。祔瘞於瑯琊臨沂縣長千里黃鵠山。用宣風烈。以昭弗朽。迺爲銘曰。

清瀾悠邈。其儀尙矣。龍光疊照。風流世祀。猗歟罔匱。於昭不已。誕資仁淑。作嬪君子。幽閑表操。明德自躬。推厚處薄。秉默居沖。參差採芼。揜映言工。鑒昭彤管。識懋休風。凝芬載湛。芳猷允塞。徙舍爲訓。止閭成則。曹號母儀。豈伊婦德。穆茲閨闈。形於邦國。龍飛集運。禮數攸鍾。憲章盛典。車服有容。泰而愈約。貴則彌恭。蕃社方茂。纂嗣克重。巾帶差池。朝夕咸事。雖曰任傅。永請斯備。是惟仁姑。厥德可庇。恂恂濟濟。蘭芬瓊祀。光陰易晚。祺福難留。閨儀罷映。褵華奄收。奠遷朱邸。駕指行楸。芳□是勒。大□方攸。尙用漢人架纓亦
可謂虎賁中郎矣

北魏崔敬邕墓誌銘○

祖秀才諱殊字敬異。

夫人從事中郎趙國李休女。

父雙護中書侍郎冠軍將軍豫州刺史安平敬侯。

夫人中書趙國李詵女。

魏故持節龍驤將軍督營州諸軍事營州刺史征虜將軍大中大夫臨青男崔公之墓誌銘

君諱敬邕博陵安平人也。夫其殖姓之始。蓋炎帝之允。其在隆周。遠祖尙父。實作太師。乘旄鷹揚。尅佐攬
殷。若乃遠源之富。奕世之美。故以備之前冊。不待詳錄。君卽豫州刺史安平敬侯之子。冑積仁之基。累榮
構之峻。特稟清貞。少播令譽。然諾之信。著於童孺。瑤音玉震。聞於弱冠。年廿八。而儔華茂實。以響流於京
夏矣。被旨起家。召爲司徒府主簿。納贊槐衡。能和鼎味。俄而轉尙書都官郎中。時高祖孝文皇帝。將改制
創物。大崇革正。復以君兼吏部郎。詮敍彝倫。九流斯順。太和廿二年春。宣武皇帝。副光崇正。妙簡宮衛。復
以君爲東朝步兵。景明初。丁母憂。還家。居喪致毀。幾於滅性。服終。朝廷以君膽量凝果。善謀好成。臨事發
奇。前略無滯。徵君拜爲左中郎將。大都督。中山王刺史。出圍僞義陽。城拔凱旋。君有協規之効。功績隆盛。
授龍驤將軍。太府少卿。臨青男。忠勲之稱。實顯於茲。永平初。聖主以遼海戎夷。宣化佇賢。肅慎契丹。必也
綏接。於是除君持節營州刺史。將軍如故。君軒鑣始邁。聲猷以先。麾蓋踐壇。而溫膏均被。於是殊俗知仁。
荒嶠識澤。惠液達於逋遐。德潤潭於邊服。延昌四年。以君清政懷柔。宣風自遠。徵君爲征虜將軍。太中大

夫方授美任。而君嬰疾連歲。遂以熙平二年十一月廿一日卒於位。縉紳痛惜。嫺舊咸酸。依君績行。蒙贈左將軍。濟州刺史。加諡曰貞禮也。孤息伯茂。銜哀在疚。摧號罔訴。泣庭訓之崩沈。淚松楊之以樹洞。抽絕其何言。刊遺德於泉路。其辭曰。

繇哉遐胄。帝炎之緒。爰歷姬初。祖惟尚父。曰周曰漢。榮光繼武。邁德傳輝。儒賢代舉。於穆睿考。誕質含靈。秉仁岳峻。動智淵明。育善以和。獎幹以貞。響發邽丘。翼起槐庭。慶鍾盛世。皇澤遠融。入參彞敍。出佐邊戎。謀成轅幕。績著軍功。僞城颺偃。蠱境懷風。王恩流賞。作捍東荒。惠沾海服。愛洽遼鄉。天情方渥。簡爵惟良。如何倉昊。國寶淪光。白楊晦以籠雲。松區杳而煙遂。藐孤叫其崩惋。親賓颯而垂淚。仰層穹而摧號。痛尊靈之長祕。誌遺德兮何陳。篆幽石兮深墜。嗚呼哀哉。

北魏碑版古法尚存提掇鋪陳未始不意在變化

北魏故懷令李君墓誌銘

○樸至

君諱超。字景昇。本字景宗。後承始族叔在江左者。懸同。故避改云。秦州隴西郡狄道縣都鄉華風里人也。雅著高節。敦襲世風。言行足師。興作成淮。修情孝友。因心名義。安貧樂道。息詭遇之襟。介然峻特。標確焉之操。弱冠舉司州秀才。拜奉朝請。除恒農郡冠軍府錄事參軍事。宰沁水縣。巨政崇治。綽居尤最。爲受罪者所誣。章憲臺誤聽。被茲深劾。除名爲民。於是廿年中。浮沉閭巷。玉潔金志。卓爾無悶。到熙平二年。甫更從宦。補荊州前將軍騎兵參軍事。復作懷令。已受拜。垂垂述職。遭疾。正光五年八月十八日。卒於洛陽縣之永年里宅。時年六十一。孤貞華首。訖於二邑。門從無兩。遠邇酸恨。懷之百姓。長慕喪氣。雖陳留之哀望。胡季睿。不是過也。越六年正月丙午朔十六日辛酉。葬洛陽縣覆舟山之東南。元壤難窮。陵谷時異。刻茲

陰石照序光塵。

泱泱顯族。斂蔓西垂。代襲清則。杳炳羽儀。道妙之門。緒風屬斯。惟祖惟考。倜儻瓌奇。昌謨迭駕。高鑒明規。杳量无隄。元契不貲。總修異貫。員應紛枝。灼灼伊君。山立淵淳。棲真宅正。窶繩履程。懿鑠爲質。醇素用情。均治禮世。氣重財輕。亦旣從招。旁溢鴻聲。隨牒出入。密勿力誠。爰莅近邑。先邁儀形。絕交獨坐。化動陰冥。尙德貽咎。衆實叵蓋。拂衽歸來。飭轅褱帶。恂恂鄉閭。万殊一會。優柔善成。无小无大。垂白再仕。汎爾沿流。階倫稍降。盛業愈逾。逸作後城。士女承休。轡頓方馳。盡土悲愁。尅節炯言。引賞靡徵。端恭安砥。家俗虛膺。擢彼圯跡。事罕篇繒。長源未輸。深圖乍卷。蓋此逸機。空生徒返。茲冤易削。疇毒難遣。楨榭疎竦。泉房寒遠。孀孤內爛。妹弟摧頤。式鏤沈石。託注幽篆。

妻恒農楊氏。父談。爲邾州主簿。息女孟宜。年卅六。適恒農王始儁。郡中正。息女媛姿。適遼西常彪。侍御史。息女仲妃。適武威賈子謐。涼州治中。息道冲。息女婉華。息女休顏。息女四輝。息道逸。年十六。息道栖。年十三。

庚子山周大將軍懷德公吳明徹墓誌銘○○○點鬼有難言之隱無不盡之辭風曲洞達此之謂開府清新

同病相憐。故言哀入痛。誌文絕唱也。

公諱明徹。字通昭。兖州秦郡人也。西都列國。長沙王公被山河。東京貴臣。大司馬名高霄漢。豈直西河有守。智足抗秦。建平有城。威能動晉而已也。祖尙南譙太守。父標。右軍將軍。抗拒淮沂。平夷濟漯。代爲名將。見於斯矣。公志氣縱橫。風情倜儻。圯僑取履。早見兵書。竹林逢猿。偏知劍術。故得勇爵登朝。材官入選。起

家東宮司直。後除左軍。葛瞻始嗣兵戈。仍遭蜀滅。陸機纔論功業。卽值吳亡。公之仕梁。末爲達也。自梁受終。齊卿得政。禮樂征伐。咸歸舜後。是以威加四海。德教諸侯。蕭索煙雲。光華日月。公以明略佐時。雄圖贊務。鱗翼更張。風颺遂遠。冠軍侯之用兵。未必師古。武安君之養士。能得人心。擬於其倫。公之謂矣。爲左衛將軍。尋遷鎮軍。丹陽尹。北軍中候。總政六師。河南京尹。冠冕百郡。文武是寄。公無愧焉。蕭湘之役。馮陵島嶼。風船火艦。周瑜有赤壁之兵。蓋舳櫓。魏齊有橫江之戰。仍爲平南將軍。開府儀同三司。都督湘衡桂武四州刺史。遂得左廣迴局。轡車反暢。長沙楚鐵。更入兵欄。洞浦藏犀。還輸甲庫。雖復戎歌屢凱。軍幕猶張。淮南望廷尉之囚。合淝稱將軍之寇。莫不失穴驚巢。沉水陷火。爲使持節。侍中。司空。車騎大將軍。都督南北。兗青譙五州諸軍事。南兗州刺史。南平郡開國公。食邑八千戶。鼓吹一部。中台在元武之宮。上將列文昌之宿。高蟬臨鬢。吟鷺陪軒。平陽之邑。萬家臨淄之馬。千駟坐則玉案推食。行則中分麾下。生平若此。功業是焉。旣而金精氣壯。師出有名。石鼓聲高。兵交可遠。故得艫舳所臨。蓋於淮泗。旌旗所襲。奄有龜蒙。魏將已奔。猶書馬陵之樹。齊師其遁。空望平陰之烏。俄而南仲出車。方叔蒞止。暢穀文茵。鈎膺鋒革。遂以天道在北。南風不競。昔者裨將失律。衛將軍於是待罪。中軍爭濟。荀桓子於焉受戮。心之憂矣。胡以事君。宣政元年。屆於東都之亭。有詔釋其鸞鑣。蠲其釁社。始宏就館之禮。卽受登壇之策。拜持節大將軍。懷德郡開國公。邑二千戶。歸平津之館。時聞櫪馬之嘶。舍廣成之傳。裁見諸侯之客。廉頗眷戀。寧聞更用之期。李廣盤桓。無復前驅之望。霸陵醉尉。侵辱可知。東陵故侯。生平已矣。大象二年。七月二十八日。氣疾暴增。奄然賓館。春秋七十七。卽以其年八月十九日。寄瘞於京兆萬年縣之東郊。詔贈某官。諡某禮也。江東八

千子弟。從項籍而不歸。海島五百軍人。爲田橫而俱死焉。嗚呼哀哉。毛修之埋於塞表。流落不存。陸平原敗於河橋。死生慚恨。反公孫之柩。方且未期。歸連尹之尸。竟知何日。遊魂羈旅。足傷溫序之心。元夜思歸。終有蘇韶之夢。遂使廣平之里。永滯冤魂。汝南之亭。長聞夜哭。嗚呼哀哉。乃爲銘曰。

九河宅土。三江貢職。彼美中邦。君之封殖。負才矜智。乘危恃力。浮磬戢鱗。孤桐垂翼。五兵早竭。一鼓前衰。移營滅竈。空幕禽飛。羊皮詎贖。畫馬何追。苟罄永去。隨會無歸。存沒俄頃。光陰悽愴。岳裂中台。星空中將。眷言妻子。悠然亭障。魂或可招。喪何可望。壯志沉淪。雄圖埋沒。西隴足抵。黃塵碎骨。何處池臺。誰家風月。墳塋羈遠。營魂流寓。霸岸無封。平林不樹。壯士之隴。將軍之墓。何代何年。還成武庫。

庾子山周大將軍義興公蕭公墓誌銘

昔司徒之敷五教。當堯讓之初。丞相之總萬機。值秦亡之後。若殷人受氏。乃承微子之封。梁運應圖。實啓延陵之國。公諱太。字世怡。蘭陵人也。太祖文皇帝之孫。鄱陽忠烈王之子。派別天潢。支分若木。直幹自高。澄源已遠。茂親明德。是稱毛畢之功。宗子維城。乃建邢茅之國。大同元年。年十六。封豐城縣開國侯。食邑五百戶。山臨鶴塞。非無陶侃之賓。氣連牛斗。卽有張華之劍。解褐給事中。仍太子洗馬。公子出身。非郎官而同品。中朝洗馬。異式道而前驅。以公居之。誠爲高選。大同元年。入直殿省。其年。轉太子中書舍人。南宮宿衛。職司蘭錡。北閣從班。榮參顧問。通籍兩宮。得賢斯在。大同三年。授持節仁威將軍。譙州刺史。褰帷祥氣之境。刺舉消憂之地。南陽風俗。文學更多。美稷相迎。童兒逾遠。旣而亂離瘼矣。王室騷然。大夫有行役之悲。君子有無期之怨。背關懷楚。扁舟而行。江漢奉當璧之君。章華歸中興之主。承聖元年。拜侍中。無雙

對問。實踵武於丁鴻。多識舊章。足齊衡於王粲。二年。除持節平西將軍。臨川內史。仍轉平南將軍。桂陽內史。尙方鑄劍。再轉金龜。御史分符。雙封銅虎。豈直鄧攸清白。見稱五鼓之歌。劉寵廉能。名爲一錢之郡。遂以天保未定。王途多梗。還吳不可。歸蜀無路。臨淄負海。翻然改途。竄身清漳。垂翅渤海。蒙授車騎大將軍。散騎常侍。仍爲持節都督永州刺史。而秦亭壓境。邾柝聞城。鼓角地鳴。將軍天落。雖復瓶缶聽聲。無防於地道。冠繩柴結。不却於雲梯。請命受降。翻歸都護。周朝以楚材晉用。不停於平章。趙璧秦求。無論於羈遠。以保定五年。除使持節。驃騎大將軍。開府儀同三司。義興郡開國公。食邑一千三百戶。天和二年。授使持節。都督蔡州諸軍事。蔡州刺史。楚頃襄之愛子。旣布衣而戍谷。魏安釐之母弟。亦羈旅於邯鄲。憂旣傷人。降年不永。春秋五十有一。薨於蔡州之鎮。送故入關。空餘袞服。歸軒在道。還更垂帷。嗚呼哀哉。有詔贈官。諡某禮也。五年十一月。葬於長安北原。樗里子之墳。正臨武庫。太史公之墓。直對皋門。銘曰。

元鳥遠烈。相土宏謨。東封宋社。西斂秦圖。人承佐漢。國紹開吳。有美令德。茂親藩邸。建國皇支。承家帝弟。率由冥會。亮直天啓。轅固聞詩。唐都習禮。博望之苑。金華之宮。文林講德。武帳參戎。名書柱上。策滿帷中。託身淄右。涖政淮東。秦亭西逼。楚澤南窮。時驚獵火。或懼秋風。屬期遠略。逢茲應變。陣橫十里。兵圍一面。月暈孤城。塵驚虛援。春筍非糧。秋蒿無箭。垂翅臥龍。夷衿輟戰。時值懷來。恩加始賞。王爵愈峻。戎章更上。朱鷺才飛。虞歌卽嚮。泣子留恨。藏書長往。炎涼迭運。零落山邱。霜芬幕月。松氣陵秋。嗟南國之王子。成東

陵之故侯。

情事相副。碑文肅穆之體。漸改志銘。跌宕之能始彰。

庾子山周大將軍瑯琊定公司馬裔墓誌銘

公諱裔。字遵允。河內溫人也。南正司天。北正司地。是謂羲和之官。卽嗣重黎之政。卽之歸楚。與章邯而並封。豫之避秦。共毛公而俱去。祖金龍。仍居選部。水鏡三臺。父悅。再牧荊河。威風千里。而身遭禍機。遂爲季布所哭。獲存遺嗣。實賴程嬰之忠。國家追念功臣。更撫叔敖之子。言思官族。還求女齊之允。公始應辟。爲河內功曹。除員外郎。常侍。汲郡治兵。黃河浮馬。摧鋒軼關之捷。逐北長城之陣。授平東將軍。北徐州刺史。柳泉風塵。三城席卷。棠陰鋒鏑。千室入關。遷車騎大將軍。儀同三司。開國龍門縣伯。仍除巴州刺史。雖復巴水三迴。夷歌數曲。徒逢白竹之弩。已濟青衣之功。朝廷以漢之功臣。須開上將之府。晉之代胄。宜紹瑯琊之國。遷驃騎大將軍。開府。改封瑯琊公。食邑一千五百戶。宮闈近密。實俟忠貞。詔爲大御伯。仍除大御正職。司常伯。任總夔龍。王道旣平。絲言惟允。尋除始州刺史。都督始州諸軍事。蠻夷恃險。狼顧鴟張。高山尋雲。深谷無景。九地縱橫。三門起伏。峯危馬束。水險橋飛。遂得谷靜山空。冰消霧散。仍爲信州刺史。都督信州諸軍事。精兵守於白帝。足懼巴州之城。船梯下於荊州。彌動西陵之戍。卽授使持節大將軍。都督西寧州諸軍事。西寧州刺史。將啓北戶之人。向通雲南之國。聞寵若驚。奄從深夜。天和六年正月十八日亡。春秋六十五。詔贈本官。加懷邵汾晉四州刺史。諡定公。禮也。以建德元年七月十三日葬於武功郡之三疇原。公愛敬純深。有隱無犯。忠貞亮直。知無不爲。在戎四十二年。身經六十九戰。至於多竈唱籌。並得成功。飛沙擁石。未嘗乖律。恂恂教義。吳起西河之風。閑閑旗鼓。李牧長平之政。身死之日。家無餘財。山水所資。一由詔葬。有始有卒。生榮死哀。銘曰。蕭瑟嵯峨。作家所無。遂以成家。視融是命。重黎克舉。公族乃建。天官卽序。避世於秦。成家於楚。金行失馭。玉鏡淪輝。我之烈祖。識變乘機。

黃旗東沒。青蓋西飛。落星置道。長州出圍。及我皇父。荆河再撫。世遭喪亂。身沒猾豎。嗟我遺嗣。崎嶇趙武。寒覆鳥翼。飢吞獸乳。獲歸河內。更襲瑯琊。年方小馬。怨結長蛇。藏兵九地。置劍千家。雪山埋馬。冰河陷車。既乃班政。超然榮守。朱鷺頻飛。金龜轉紐。築塞長榆。營軍高柳。玉案推食。河橋勸酒。石門冰釋。金隄電散。蘆水門關。茅津成觀。馭風逸翮。修途始半。建武功臣。先悲吳漢。沉寥搖落。游揚浸微。金城路斷。郿塢人稀。風松雲蓋。白水山衣。賢亡星隕。人沒蘭衰。

銘與志大略
相同唐初亦爾

庾子山周譙國公夫人步陸孤氏墓誌銘○

夫人諱某。字某。本姓陸。孤郡人也。大夫拓境。百越來庭。丞相勒兵。三江席卷。高祖載爲。劉義真長史。留鎮關中。既沒赫連。因卽仕魏。臨終。誠其子孫曰。樂操風土。不忘本也。言念爾祖。無違此心。祖政。驃騎大將軍。儀同三司。恆州刺史。父通。柱國大將軍。大司馬。文安公。匡贊經綸。參謀揖讓。名高廣武。功重長平。夫人七德含章。四星連曜。敬愛天情。言容禮典。九日登高。作銘秋菊。三元告始。或頌春椒。年十有四。媵於譙國。友其琴瑟。愈恭節儉之心。伐其條枚。實秉憂勤之德。鄴地登高之錦。自濯江波。平陽采桑之津。躬勞蠶月。天和元年。册拜譙國夫人。東武亭之妻。既稱有秩。南城侯之婦。還聞受封。柱國殿下。以名華分照。增城峻土。揚旌燹道。問政邛都。白狼之溪。途艱黃牛之坂。荔枝之地。險葡萄之國。夫人別離親戚。關河重阻。夷歌一曲。未足消憂。猿鳴三聲。沾衣無已。是以天厲之疾。遂成沉痾。玉瀝難開。金膏實遠。建德元年七月九日。薨於成都私第。春秋三十有一。卽以其年十一月二十二日。歸葬長安之北原。詔贈譙國夫人禮也。殿下神傷秋月。掩淚長松。周季直之留書。更深冥漠。潘安仁之詞藻。徒增哀怨。豈直西河女子。獨見銀臺。東海

婦人先逢金闕銘曰。

艾陵反旆。椒山止戈。金精據嶺。昌閣凌波。西遊卿相。東裂山河。華亭冠冕。穀水絃歌。震維徙族。燕垂從宦。塞入飛狐。關連鳴雁。策預登阜。功參臨澗。寶鼎留銘。彫戈餘贊。應圖淑令。秉禮言歸。魚軒馮軾。澤雉文衣。明月照鏡。仙石支機。行雲細起。迴雪輕飛。北降帝子。南麾蜀守。若水既開。靈山已鏤。月峽猿啼。江神牛鬪。屋機北轉。日轡西迴。陽泉伏氣。陰律沉灰。鶴辭吳市。鳳去秦臺。神光離合。燈影徘徊。雙流反葬。百兩迴旌。少女離位。夫人去城。帷堂野設。帳殿郊營。山川奇事。風月無情。搖落邱隴。荒涼封域。樹樹秋聲。山山寒色。草短逾平。松長轉直。節墳方固。園陵永植。傷于巧構。麗于密藻。

庾子山周太傅鄭國公夫人鄭氏墓誌銘

夫人諱某。滎陽開封縣遠里人也。七子賦詩。足光賓客。三卿從政。實靜諸侯。驂乘則晉后停輿。來朝則漢君識履。華胄蟬聯。無虛史籍。祖那。秦州別駕。父茂伯。撫軍將軍。涼州刺史。伯陽縣侯。夫人令淑早聞。芝蘭獨茂。既容既德。言告言歸。悌實溫清。恭惟箴盟。太傅弼諸周室。股肱攸寄。夫人輔佐君子。勤勞是司。琴瑟既友。條枚無伐。故得用之邦國。成之孝敬。某年月日。封鄭國夫人。祿翟既加。紘緼是務。夫有安世之貴。躬服浣濯。子有文伯之尊。無忘機杼。表裏惟安。閨闈且正。醫門有疾。對藥無徵。天和三年三月二十日。薨。葬於長安之石安原。世子某兄弟。並勗慈訓。咸遵母儀。霜露深悲。寒泉增慟。銘曰。

居德圃田。當官教府。置騎賓來。開黌學聚。福履家室。賢才踵武。棠棣之華。螽斯之羽。人倫七德。風化二南。采采芣苢。萋萋葛覃。節行聲玉。副笄珈簪。柳園秉杼。桑津浴蠶。春秋超忽。零落無時。家亡淑女。國喪賢姬。

香墳永送。舞鶴長辭。山深月闌。風急松悲。千年開閉。將驗靈龜。敘述尙法中耶。遂爾凡異消息可悟。

蔡伯喈爲陳留上孝子狀○

臣前到官。博問掾史。孝行卓異者。臣門下掾申屠夔。稱孝子平邱程。年十四歲時。祖父叔病歿。未抱伏。叔尸號泣悲哀。口乾氣少。喘息纔屬。舅偃哀其羸劣。嚼棗肉以哺之。未見食。噓唏不能吞咽。麥飯寒水。乃間用之。舅偃誘勸。哽咽益甚。是後精美異味。遂不過口。常在柩旁。耳聞叔名。目應以淚。前太守文穆。召署孝義童。云以叔未葬。不能至府舍。臣輒核問掾史。邑子殷盛宿彥等。辭驗皆合。臣卽召來見。末年十四歲。顏色瘦小。應對甚詳。臣問樂爲吏否。垂泣求去。白歸喪所。臣爲設食。但用麥飯寒水。不食肥膩。舅本以田作爲事。家無典學者。其至行發於自然。非耳目聞見所倣效也。雖成人之年。知禮識義之士。恐不能及。伏惟陛下。體因心之德。當中興之運。躬秉萬機。建用皇極。神紀聘於無方。淑暢洽於羣生。故醇行感時而生。美義因政而出。清風奮揚。休徵誕漫。太平之萌。昭驗已著。臣誠伏見。幸甚。臣聞魯侯能孝。命於夷宮。張仲孝友。侯在左右。周宣之興。實始於此。且烏以反哺。託體太陽。羔以跪乳。爲贄國卿。禽獸之微。猶以孝寵。況末稟純粹之精爽。立百行之根源。其人隱瘁。而德曜彌光。其族益章。臣不勝願。會使未美。昭顯本朝。謹陳狀。臣頓首。生不同文士。經

任彥昇齊竟陵文宣王行狀○

以儷詞述實事。於斯體尙稱。

祖。太祖高皇帝。

父世祖武皇帝。

南徐州南蘭陵郡縣都鄉中都里蕭公年三十五行狀。

公道亞生。知照隣幾庶。孝始人倫。忠爲令德。公實體之。非毀譽所至。天才博瞻。學綜該明。至若曲臺之禮。九師之易。樂分龍趙。詩析齊韓。陳農所未究。河間所未輯。有一於此。罔不兼綜者。與昔沛獻訪對於雲臺。東平齊聲於楊史。淮南取貴於食時。陳思見稱於七步。方斯蔑如也。初沈攸之跋扈上流。稱亂陝服。宋鈔西晉熙王南中郎邵陵王並鎮溢口。世祖毘贊兩藩。而任總西伐。公時從在軍。鎮西府版寧朔將軍軍主南中郎版補行參軍署法曹。於時景燭雲火。風馳羽檄。謀出股肱。任切書記。遷左軍邵陵王主簿。記室參軍。旣允焚林之求。實兼儀形之寄。刀筆不足宣功。風體所以宏益。除邵陵王友。又爲安南邵陵王長史。東夏形勝。關河重復。選衆而舉。敦悅斯在。除使持節都督會稽東陽臨海永嘉新安五郡諸軍事。輔國將軍。會稽太守。太祖受命。廣樹藩屏。公以高昭武穆。惟戚惟賢。封聞喜縣開國公。食邑千戶。又以奏課連最。進號冠軍將軍。越人之巫。覩正風而化俗。篁竹之酋。感義讓而失險。邪叟忘其西昃。龍邱狹其東臬。會武穆皇后崩。公星言奔波。泣血千里。水漿不入於口者。至自禹穴。逮衣裳外除。心哀內疚。禮屈於厭降。事迫於權奪。而茹戚肌膚。沈痛瘡鉅。故知鐘鼓非樂云之本。縷纊非隆殺之要。改授征虜將軍丹陽尹。良家入徒。戚里內屬。政非一軌。俗備五方。公內樹寬明。外施簡惠。神臬載穆。轂下以清。武皇帝嗣位。進封竟陵郡王。食邑如千戶。復授使持節都督南徐兖二州諸軍事。鎮北將軍南徐州刺史。遷使持節侍中都督南兖徐北兖青冀五州諸軍事。征北將軍南兖州刺史。兖徐接壤。素漸河潤。未及下車。仁聲先洽。玉關靖柝。北門

寢扃。朝旨以董司岳牧。敷興邦教。方任雖重。比此爲輕。徵護軍將軍兼司徒。侍中如故。又授車騎將軍兼司徒。侍中如故。卽授司徒。侍中又如故。上穆三能。下敷五典。闢元闡以闡化。寢鳴鐘以體國。翼亮孝治。緝熙中教。奪金恥訟。踐田自嘿。不彫其朴。用晦其明。聲化之有倫。繫公是賴。庠序肇興。儀刑國冑。師氏之選。允歸人範。以本官領國子祭酒。固辭不拜。八座初啓。以公補尚書令。式是敷奏。百揆時序。夫國家之道。互爲公私。君親之義。遞爲隱犯。公二極一致。愛敬同歸。亮誠盡規。謀猷宏遠矣。又授使持節。都督揚州諸軍事。揚州刺史。本官悉如故。舊惟淮海。今則神牧。編戶殷阜。萌俗滋繁。不言之化。若門到戶說矣。頃之解尚書令。改授中書監。餘悉如故。獻納樞機。絲綸允緝。武皇晏駕。寄深負圖。公仰惟國典。俛遵遺託。俯擗天倫。踊絕於地。居處之節。復如居武穆之憂。聖王嗣興。地居旦奭。有詔策授太傅。領司徒。餘悉如故。坐而論道。動以觀德。地尊禮絕。親賢莫貳。又詔加公入朝不趨。讚拜不名。劍履上殿。蕭傅之賢。曹馬之親。兼之者公也。復以申威重道。增崇德統。進督南徐州諸軍事。餘悉如故。並奏疏桑上。身沒讓存。天不愍遺。梁岳頽峻。某年某月日薨。春秋卅有五。詔給溫明祕器。斂以衰章。備九命之禮。遣大鴻臚監護喪事。朝夕奠祭。大官供給。禮也。故以慟極津門。感充長樂。豈徒舂人。不相傾壑。罷肆而已哉。乃下詔曰。褒崇庸德。前王之令典。追遠尊戚。恫情之所隆。故使持節。都督揚州諸軍事。中書監。太傅。領司徒。揚州刺史。竟陵王。新除進督南徐州。體睿履正。神監淵邈。道冠民宗。具瞻惟允。肇自弱齡。孝友光備。爰及贊契。協升景業。燮和台曜。五教克宣。敷奏朝端。百揆惟穆。寄重先願。任均負圖。諒以齊徽。二南同規。往哲方憑。保佑永翼。雍熙天不愍遺。奄見薨落。哀慕抽割。震動於厥心。今先遠戒期。龜謀襲吉。茂崇嘉制。式宏風猷。可追崇假黃鉞。侍中都督。

中外諸軍事。太宰領大將軍。揚州牧。綠綬。具九錫。服命之禮。使持節中書監王如故。給九旒轡輅。黃屋左纛。輜輳車。前後部羽葆鼓吹。挽歌二部。虎賁班劍百人。葬禮一依晉安平獻王孚故事。公道識虛遠。表裏融通。淵然萬頃。直上千仞。僕妾不覩其喜愠。近侍莫見其傾弛。他人之善。若己有之。民之不臧。公實貽恥。誘接恂恂。降以顏色。方於事上。好下規己。而廉於殖財。施人不倦。帝子儲季。令行禁止。國綱天憲。實諸掌握。未嘗鞠人於輕刑。錮人於重議。人有不及。內恕諸己。非意相干。每爲理屈。任天下之重。體生民之俊。華袞與緇縵同歸。山藻與蓬茨俱逸。良田廣宅。符仲長之言。邛山洛水。協應叟之志。邱園東國。鎔銖軒冕。乃依林構宇。傍巖拓架。清猿與壺人爭旦。緹幙與素瀨交輝。置之虛室。人野何辨。高人何點。躡屣於鍾阿。徵士劉虬。獻書於衡岳。贈以古人之服。宏以度外之禮。屈以好士之風。申其趨王之意。乃知大春屈己於五王。君大降節於憲后。致之有由也。其卉木之奇。泉石之美。公所製山居四時序。言之已詳。文皇帝養德東朝。同符作者。爰造九言。實該百行。遵衿襜於未萌。申炯戒於茲日。非直旦暮千載。故乃萬世一時也。命公注解。衛將軍王儉綴而序之。山宇初構。超然獨往。顧而言曰。死者可歸。誰與入室。尙想前良。俾若神對。乃命畫工。圖之軒牖。旣而緬屬賢英。傍思才淑。匹婦之操。亦有取焉。有客游梁朝者。從容而進曰。未見好德。愚竊惑焉。卽命刊削。投杖不暇。公以爲出言自口。驥驟不追。聽受一謬。差以千里。所造箴銘。積成卷軸。門階戶席。寓物垂訓。先是震於外寢。匠者以爲不祥。將加治葺。公曰。此天譴也。無所改修。以記吾過。且令戒懼不怠。從諫如順流。虛己若不足。至於言窮藥石。若味滋旨。信必由中。貌無外悅。貴而好禮。怡寄典墳。雖牽以物役。孜孜無怠。乃撰四部要略。淨住子。並勒成一家。懸諸日月。宏洙泗之風。闡迦維之化。大漸彌

留話言盈耳。黜殞之請。至誠懇惻。豈古人所謂立言於世。沒而不朽者歟。易名之典。請遵前烈。謹狀。須識

行敘事處。皆駢儷之滋。旨任沈而後。此風漸隊。

沈休文齊司空柳世隆行狀。○文似未完。

公稟靈華嶽。幼挺珪璋。清襟素履。發乎齠髻。及長。風質洞遠。儀止祥華。動容合矩。吐言被律。時沈攸之。狼據陝西。氣陵物上。而太祖登庸作宰。天歷在躬。攸之播封豕之情。總全荆之力。咒甲十萬。鐵馬千羣。水陸長驚。志窺皇邑。公抗威川涘。勇略紛紜。顯晦有方。出沒無緒。攸之乃反旆。巨圍親受。矢石增櫓。乘埤嚴衝。駕雉雲。翱俯闕。地穴斜通。半藏晚餐。負戶晨汲。公乃綏衆以武。應敵以奇。靈鋒電曜。威策雲舉。事切三版之危。氣損九天之就。殘寇外老。逆黨內摧。焚舟委甲。掬指宵遯。公風標秀徹。器範宏潤。茂乎辭彩。雅善鼓琴。摛純蔡之高芬。纂鍾嵇之妙曲。雖嬰拂世務。而素業無改。臨姑蘇而想八桂。登衡山而望九疑。七紆邦組。三臨蕩甸。五職瑞扇。一司百揆。固可以齊衡八凱。方駕五臣。

江文通建平王太妃周氏行狀

竊聞侯服之譽。非黃冠能敷。玉食之門。寧皂衣所述。諒畏褒虛。美於君后。被空名於鼎貴。然有漢臣誅行。晉史書德者。亦云實而已焉。伏見國太妃。稟靈惟岳。集慶自遠。世擅淮汝。族冠疇代。故以載曜聲書。式炳騰牒矣。太妃誕巽離之正和。函雲露之中氣。凝采韶歲。賁章笄年。若迺彤管女圖之學。纂組綺縞之工。升降處謙之儀。柔靜居順之節。莫不中道若性。不嚴而成。故譽滿闈闕。聲聞軒殿。以元嘉某年。歸於故司徒宣簡王。既而第高恆倫。秩踰外品。青軒華轂。用光國輝。素壁丹墀。實隆家貴。具惟嫺娣。靡不式瞻。而居尊

以簡訓卑以宏躬謹蘭閨身攜椒第若衛娥之炯行樊嬴之英操方之蔑如也大明二年宣簡王薨太妃藉悲用禮撫孤用慈柔懿之德愈彰肅敬之間日被雖文伯之母言不踰闕莒相之王行存乎勤無以過也大明某年拜建平王太妃是時今王春秋方富德業未隆藉茲金響終能玉播故綺襦出宰弱冠升朝者亦太妃劬勞之訓也謂天益高降年不永以太豫元年二月三日薨於荊州內寢凡厥遠邇以哀以歎今祖行有期泉窆無遠素旂望路綵旌思歸所以垂宣徽容髣髴金石者謹牒行狀具以申言

實臞而

駢體文鈔卷二十六

【誄祭類】

張平子大司農鮑德誄

○如玉在璞如金在升光輝未發

昔君烈祖平顯奕世敬叔生牙美管交賴至于中葉種德以邁種德伊何去虛適參建旄屯留其茂如林降及我君總角有聲遺蒙萬穀寵祿斯丁守約勤學克勞其形濬哲之資日就月成業業學徒童蒙求我舍厥往著去風卽雅濟濟京河實爲西魯昔我南都惟帝舊鄉同于郡國殊於表章命親如公弁冕鳴璜若惟允之實耀其光導以仁惠教以義方習射矍相饗老虞庠羌髦作虐艱我西鄰君斯整旅耀武月頻蠢蠢戎虜是懼是震知德者鮮惟君克舉旣厭帝心將處台輔命有不永時不我與天實爲之孰其能禦股肱或毀何痛如之國喪遺愛如何無思

曹子建王仲宣誄

○此書家謂中鋒也不尙姿致而骨幹偉異感昔一節後人多從此悟入

建安二十二年正月二十四日戊申魏故侍中關內侯王君卒嗚呼哀哉皇穹神察喆人是恃如何靈祇殲我吉士誰謂不痛早世卽冥誰謂不傷華繁中零存亡分流天遂同期朝聞夕沒先民所思何用誄德表之素旗何以贈終哀以送之遂作誄曰

猗歟侍中遠祖彌芳公高建業佐武伐商爵同齊魯邦祀絕亡流裔畢萬勳績惟光晉獻賜封于魏之疆天開之祚末胄稱王厥姓斯氏條分葉散世滋芳烈揚聲秦漢會遭陽九炎光中燿世祖撥亂爰建時雍

三台樹位履道是鍾寵爵之加。匪惠惟恭。自君二祖。爲光爲龍。僉曰休哉。宜翼漢邦。或統太尉。或掌司空。百揆惟敘。五典克從。天靜人和。皇教遐通。伊君顯考。奕葉佐時。入管機密。朝政以治。出臨朔岱。庶績咸熙。君以淑懿。繼此洪基。既有令德。材技廣宜。強記洽聞。幽讚微言。文若春華。思若涌泉。發言可詠。下筆成篇。何道不洽。何藝不閒。碁局逞巧。博奕惟賢。皇家不造。京室隕顛。宰臣專制。帝用西遷。君乃羈旅。離此阻艱。翕然鳳舉。遠竄荆蠻。身窮志達。居鄙行鮮。振冠南嶽。濯纓清川。潛處蓬室。不干勢權。我公奮鉞。耀威南楚。荆人或遠。陳戎講武。君乃義發。算我師旅。高尚霸功。投身帝宇。斯言旣發。謀夫是與。是與伊何。嚮我明德。投戈編郤。稽顙漢北。我公實嘉。表揚京國。金龜紫綬。以彰勳則。勳則伊何。勞謙靡已。憂世忘家。殊略卓時。乃署祭酒。與軍行止。算無遺策。畫無失理。我王建国。百司雋乂。君以顯舉。秉機省闕。戴蟬珥貂。朱衣皓帶。入侍帷幄。出擁華蓋。榮曜當世。芳風掩藹。嗟彼東夷。憑江阻湖。騷擾邊境。勞我師徒。光光戎路。霆駭風徂。君侍華轂。輝輝王途。思榮懷附。望彼來威。如何不濟。運極命衰。寢疾彌留。吉往凶歸。嗚呼哀哉。翩翩孤嗣。號慟崩摧。發軫北魏。遠迄南淮。經歷山河。泣涕如頽。哀風興感。行雲徘徊。游魚失浪。歸鳥忘栖。嗚呼哀哉。吾與夫子。義貫丹青。好和琴瑟。分過友生。庶幾遐年。攜手同征。如何奄忽。棄我夙零。感昔宴會。志各高厲。予戲夫子。金石難弊。人命靡常。吉凶異制。此驩之人。孰先隕越。何寤夫子。果乃先逝。又論死生。存亡數度。子猶懷疑。求之明據。儻獨有靈。游魂泰素。我將假翼。飄飄高舉。超登景雲。要子天路。喪柩旣臻。將反魏京。靈輻回軌。白驥悲鳴。虛廓無見。藏景蔽形。孰云仲宣。不聞其聲。延首歎息。雨泣交頸。嗟乎夫子。永安幽冥。人誰不沒。達士殉名。生榮死哀。亦孔之榮。嗚呼哀哉。

曹子建仲雍哀辭○

曹喈字仲雍。魏太子之仲子也。三月而生。五月而亡。昔后稷之在寒冰。鬪穀之在楚澤。咸依鳥馮虎而無風塵之災。今之元締文茵。無寒冰之慘。羅幃綺帳。暖於翔鳥之翼。幽房閑宇。密於雲夢之野。慈母良保。仁乎鳥虎之情。卒不能延期於暮載。雖六旬而夭歿。彼孤蘭之眇眇。亮成幹其畢榮。哀綿綿之弱子。早背世而潛形。且四孟之未周。將愿之乎一齡。陰雲回於素蓋。悲風動其扶輪。臨塋闋以歎歔。淚流射而沾巾。有意

奇表

潘安仁楊荊州誄○

維咸寧元年夏四月乙丑。晉故折衝將軍荊州刺史東武戴侯滎陽楊使君薨。嗚呼哀哉。夫天子建國。諸侯立家。選賢與能。政是以和。周賴尙父。殷憑太阿。矯矯楊侯。晉之爪牙。忠節克明。茂績惟嘉。將宏王略。肅清荒遐。降年不永。元首未華。銜恨沒世。命也奈何。嗚呼哀哉。自古在昔。有生必死。身沒名垂。先哲所踐。行以號彰。德以述美。敢託旒旗。爰作斯誄。其辭曰。

邈矣遠祖。系自有周。昭穆繁昌。枝庶分流。族始伯喬。氏出楊侯。奕世丕顯。允迪大猷。天厭漢德。龍戰未分。伊君祖考。方事之殷。鳥則擇木。臣亦簡君。投心魏朝。策名委身。奮躍淵塗。跨騰風雲。或統驍騎。或據領軍。篤生戴侯。茂德繼期。纂戎洪緒。克構堂基。弱冠味道。無競惟時。孝實蒸蒸。友亦怡怡。多才豐藝。彊記洽聞。目睇毫末。心算無垠。草隸兼善。尺牘必珍。足不輟行。手不釋文。翰動若飛。紙落如雲。學優則仕。乃從王政。散璞發輝。臨軹作令。化行邑里。惠洽百姓。越登司官。肅我朝命。惟此大理。國之憲章。君莅其任。視民如傷。

庶獄明慎。刑辟端詳。聽參臬呂。稱侔于張。改授農正。于彼野王。倉盈庾億。國富兵強。煌煌文后。鴻漸晉室。君以兼資。參戎作弼。用錫土宇。膺茲顯秩。青社白茅。亦朱其紱。魏氏順天。聖皇受終。烈烈楊侯。實統禁戎。司管閩闔。清我帝宮。苛慝不作。穆如和風。謂督勳勞。班命彌崇。茫茫海岱。元化未周。滔滔江海。疆場分流。秉文兼武。時惟楊侯。既守東莞。乃牧荊州。折衝萬里。對揚王休。聞善若驚。疾惡如讎。示威以德。以伐以柔。吳夷凶侈。僞帥畏逼。將承讎讐。席卷南極。繼襄糧盡。神謀不忒。君子之過。引曲推直。如彼日月。有時則食。負執其咎。功讓其力。亦既旋旆。爲法受黜。退守邱壘。杜門不出。游目典墳。縱心儒術。祁祁搢紳。升堂入室。靡事不咨。無疑不質。位貶道行。身窮志逸。弗慮弗圖。乃寢乃疾。昊天不弔。景命其卒。嗚呼哀哉。子囊佐楚。遺言城郢。史魚諫衛。以尸顯政。伊君臨終。不忘忠敬。寢伏牀蓐。念在朝廷。朝達厥辭。夕隕其命。聖王嗟悼。寵贈衾椁。誅德策勳。考終定謚。羣辟慟懷。邦族揮淚。孤嗣在疾。寮屬含悴。赴者同哀。路人增歎。嗚呼哀哉。余以頑蔽。覆露重陰。仰追先考。執友之心。俯感知已。識達之深。承諱切怛。涕淚霑襟。豈忘載奔。憂病是沈。在疾不省。於亡不臨。舉聲增慟。哀有餘音。嗚呼哀哉。潘江固多安流。不爲波瀾之勢。

潘安仁楊仲武誄

楊綏字仲武。滎陽宛陵人也。中領軍肅侯之曾孫。荊州刺史戴侯之孫。東武康侯之子也。八歲喪父。其母鄭氏。光祿勳密陵成侯之元女。操行甚高。恤養幼孤。以保父夫家。而免諸艱難。戴侯康侯。多所論著。又善草隸之藝。子以妙年之秀。固能綜覽義旨。而軌式模範矣。雖舅氏隆盛。而孤貧守約。心安陋巷。體服菲薄。余甚奇之。若乃清才雋茂。盛德日新。吾見其進。未見其已也。既藉三葉世親之恩。而子之姑。余之伉儷焉。

往歲卒於德宮里。喪服周次。綢繆累月。苟人必有心。此亦款誠之至也。不幸短命。春秋二十九。元康九年。夏五月己亥卒。嗚呼哀哉。乃作誄曰。

伊子之先。奕葉熙隆。惟祖惟曾。載揚休風。顯考康侯。無祿早終。名器雖光。勳業未融。篤生吾子。誕茂淑姿。克岐克嶷。知章知微。鉤深探賾。味道研幾。匪直也人。邦家之輝。子之遘閔。曾未齟髻。如彼危根。當此衝飈。德之休明。靡幽不喬。弱冠流芳。雋聲清劭。爾舅惟榮。爾宗惟瘁。幼秉殊操。違豐安匱。撰錄先訓。俾無隕墜。舊文新藝。罔不畢肄。潘楊之穆。有自來矣。矧乃今日。慎終如始。爾休爾戚。如實在己。視予猶父。不得猶子。敬亦既篤。愛亦既深。雖殊其年。實同厥心。日昃景西。望子朝陰。如何短折。背世湮沈。嗚呼哀哉。寢疾彌留。守茲孝友。臨命忘身。顧戀慈母。哀哀慈母。痛心疾首。嗷嗷同生。悽悽諸舅。春蘭擢莖。方茂其華。荆寶挺璞。將剖于和。含芳委耀。毀璧摧柯。嗚呼仲武。痛哉奈何。德宮之艱。同次外寢。惟我與爾。對筵接枕。自時迄今。曾未盈稔。姑姪繼隕。何痛斯甚。嗚呼哀哉。披帙散書。屢覩遺文。有造有寫。或草或真。執玩周復。想見其人。紙勞于手。涕沾于巾。龜筮既襲。埏隧既開。痛矣楊子。與世長乖。朝濟洛川。夕次山隈。歸鳥頡頏。行雲徘徊。臨穴永訣。撫榭盡哀。遺形莫紹。增慟余懷。魂兮往矣。梁木實摧。嗚呼哀哉。子建一變爲安仁。稍平矣。差有機致耳。

潘安仁夏侯常侍誄

○任彥昇之文。潘安仁之筆。異曲同工。第學任無流弊。潘語一塵。卽淪平易矣。

夏侯湛字孝若。譙人也。少知名。弱冠辟太尉府。賢良方正。徵仍爲太子舍人。尙書郎。野王令。中書郎。南陽相。家艱。乞還。頃之。選爲太子僕。未就命。而世祖崩。天子以爲散騎常侍。從班列也。春秋四十有九。元康元年。夏五月壬辰。寢疾卒。于延喜里第。嗚呼哀哉。乃作誄曰。

禹錫玄珪。實曰文命。克明克聖。光啓夏政。其在于漢。邁勳惟嬰。思宏儒業。大小雙名。顯祖曜德。牧堯及荆。父守淮岱。治亦有聲。英英夫子。灼灼其儻。飛辯擣藻。華繁玉振。如彼隨和。發彩流潤。如彼錦績。列素點絢。人見其表。莫測其裏。徒謂吾生。文勝則史。心照神交。唯我與子。且歷少長。逮觀終始。子之承親。孝齊閔參。子之友悌。和如瑟琴。事君直道。與朋信心。雖實唱高。猶賞爾音。弱冠厲翼。羽儀初昇。公弓旣招。皇輿乃徵。內贊兩宮。外宰黎蒸。忠節允著。清風載興。決彼樂都。寵子惟王。設官建輔。妙簡邦良。用取喉舌。相爾南陽。惠訓不倦。視民如傷。乃眷北顧。辭祿延熹。余亦偃息。無事明時。疇昔之遊。二紀于茲。斑白攜手。何歡如之。居吾語汝。衆實勝寡。人惡雋異。俗疵文雅。執戟疲揚。長沙投賈。無謂爾高。恥居物下。子乃洗然。變色易容。慨然歎曰。道固不同。爲仁由己。匪我求蒙。誰毀誰譽。何去何從。莫涅匪緇。莫磨匪磷。子獨正色。居屈志申。雖不爾以。猶致其身。獻替盡規。媚茲一人。讜言忠謀。世祖是嘉。將僕儲皇。奉轡承華。先朝末命。聖列顯加。入侍帝闈。出光厥家。我聞積善。神降之吉。宜享遐紀。長保天秩。如何斯人。而有斯疾。曾未知命。中年隕卒。嗚呼哀哉。唯爾之存。匪爵而貴。甘食美服。重珍兼味。臨終遺誓。永錫爾類。斂以時襲。殯不簡器。誰能拔俗。生盡其養。孰是養生。而薄其葬。淵哉若人。縱心條暢。傑操明達。困而彌亮。柩輅旣祖。容體長歸。存亡永訣。逝者不追。望子舊車。覽爾遺衣。愴抑失聲。迸涕交揮。非子爲慟。吾慟爲誰。嗚呼哀哉。日往月來。暑退寒襲。零露沾凝。勁風淒急。慘爾其傷。念我良執。適子素館。撫孤相泣。前思未弭。後感仍集。積悲滿懷。逝矣安及。嗚呼哀哉。

清空一氣。破漢魏之
整栗成晉宋之運轉。

潘安仁馬汧督誄○○○

惟元康七年秋九月十五日。晉故督守關中侯扶風馬君卒。嗚呼哀哉。初。雍部之內屬羌反。未弭。而編戶之民。又肆逆焉。雖王旅致討。終於殄滅。而蜂螿有毒。驟失小利。俾百姓流亡。頻於塗炭。建威喪元於好時。州伯宵遁乎大谿。若夫偏師裨將之隕首覆軍者。蓋以十數。剖符專城。紆青拖墨之司。奔走失其守者。相望於境。秦隴之僭。鞏更爲魁。旣已襲汧。而館其縣子。以眇爾之身。介乎重圍之裏。率寡弱之衆。據十雉之城。羣氏如蝟毛而起。四面雨射城中。中鑿穴而處。負戶而汲。木石將盡。樵蘇乏竭。芻蕘罄絕。於是乎發梁棟而用之。芻以鐵鑊。機關旣縱。礪而又昇焉。爨陳焦之麥。梯栢桷之松。用能薪芻不匱。人畜取給。青煙傍起。歷馬長鳴。凶醜駭而疑懼。乃闕地而攻。子命穴浚。塹。寘壺。鑄瓶。甌。以偵之。將穿響作。因焚穢火。薰之。潛氏殲焉。久之。安西之救至。竟免虎口之厄。全數百萬石之積。文契書於幕府。聖朝疇咨。進以顯秩。殊以幢蓋之制。而州之有司。乃以私隸數口。穀十斛。考訊吏兵。以檟楚之辭。連之。大將軍屢抗其疏曰。敦固守孤城。獨當羣寇。以少禦衆。載離寒暑。臨危奮節。保穀全城。而雍州從事忌敦勳效。極推小疵。非所以褒獎元功。宜解敦禁劾。假授詔書。遽許。而子固已下獄。發憤而卒也。朝廷聞而傷之。策書曰。皇帝咨故督守關中侯馬敦。忠勇果毅。率厲有方。固守孤城。危逼獲濟。寵秩未加。不幸喪亡。朕用悼焉。今追贈牙門將軍印綬。祠以少牢。魂而有靈。嘉茲寵榮。然絜士之間穢。其庸致思乎。若乃下吏之肆其噬害。則皆妬之徒也。嗟乎。妬之欺善。抑亦質首之讎也。語曰。或戒其子。慎無爲善。言固可以若是悲夫。昔乘邱之戰。縣賁父御魯莊公。馬驚。敗績。賁父曰。他日未嘗敗績。而今敗績。是無勇也。遂死之。圍人浴馬。有流矢在白肉。公曰。非其罪也。乃誅之。漢明帝時。有司馬叔持者。白日於都市。手劍父讎。視死如歸。亦命史臣班固。而爲之誄。然則

忠孝義烈之流。慷慨非命而死者。綴辭之士。未之或遺也。天子既已策而贈之。微臣託乎舊史之末。敢闕其文哉。乃作誄曰。此敘槃互紆軫。拔奇于漢魏之外。

知人未易。人未易知。嗟茲馬生。位末名卑。西戎猾夏。乃奮其奇。保此汧城。救我邊危。彼邊奚危。城小粟富。子以眇身。而裁其守。兵無加衛。墉不增築。婪婪羣狄。豺虎競逐。鞏更恣睢。潛跣官寺。齊萬虓闕。震驚台司。聲勢沸騰。種落煽熾。旌旗電舒。戈矛林植。彤珠星流。飛矢雨集。惴惴士女。號天以泣。爨麥而炊。負戶以汲。累卵之危。倒懸之急。馬生爰發。在險彌亮。精貫白日。猛烈秋霜。稜威可厲。懦夫克壯。霑恩撫循。寒士挾纊。蠢蠢犬羊。阻衆陵寡。潛隧密攻。九地之下。愜愜窮城。氣若無假。昔命懸天。今也惟馬。惟此馬生。才博智贍。偵以瓶壺。劇以長壘。錘末見鋒。火以起焰。薰尸滿窟。培穴以斂。木石匱竭。箕稗空虛。矚然馬生。傲若有餘。弓梁爲礪。柝松爲芻。守不乏械。歷有鳴駒。哀哀建威。身伏斧質。悠悠列將。覆軍喪器。戎釋我徒。顯誅我師。以生易死。疇克不二。聖朝西顧。關右震惶。分我汧庾。化爲寇糧。實賴夫子。思暮彌長。咸使有勇。致命知方。我雖末學。聞之前典。十世宥能。表墓旌善。思人愛樹。甘棠勿剪。矧乃吾子。功深疑淺。兩造未具。儲隸蓋鮮。孰是勳庸。而不獲免。猾哉部司。其心反側。斲善害能。醜正惡直。牧人透迤。自公退食。聞穢鷹揚。曾不戢翼。忘爾大勞。猜爾小利。苟莫開懷。于何不至。慨慨馬生。硯硯高致。發憤囹圄。沒而猶眊。嗚呼哀哉。安平出奇。破齊克完。張孟運籌。危趙獲安。汧人賴子。猶彼談單。如何客嫉。搖之筆端。傾倉可賞。矧云私粟。狄隸可頌。況曰家僕。剔子雙龜。貫以三木。功存汧城。身死汧獄。凡爾同圍。心焉摧剝。扶老攜幼。街號巷哭。嗚呼哀哉。明明天子。旌以殊恩。光光寵贈。乃牙其門。司勳頌爵。亦兆後昆。死而有靈。庶慰冤魂。嗚呼哀哉。世稱退之起八代之

衰曹成王楊燕奇諸碑。視此亦恐當
僵如籍湜矣。瑰瑋絕特。奇作也。

潘安仁傷子辭

予之長安。次於新安。千秋亭而弱子夭。感嬴博之哀。乃傷之曰。奈何兮弱子。邈棄爾兮邱林。還眺兮墳塋。草莽莽兮木森森。伊遽世之遐胄。逮祖考之永延。咨吾家之不嗣。羌一適而未甄。仰崇堂之遺構。若無津而涉川。葉落永離。覆水不收。赤子何辜。罪我之由。

潘安仁悲邢生辭

周文王之苗裔。予元舅之洪胄。厲摻確其不拔。鄉譽著而且就。妙邦畿而高察。雄州閭以摧秀。茂實暢矣。而休名未衍。其財至貧。其位至賤。而死之日。奔者盈庭。停予車而在郊。撫靈櫬以增悲。瞻輻容而想像。曾無覲乎餘輝。送子兮境垂。永訣兮路岐。一別兮長絕。盡哀兮告離。

潘安仁爲任子咸妻作孤女澤蘭哀辭

澤蘭者。任子咸之女也。涉三齡未沒衰而殞。余聞而悲之。遂爲其母辭。

茫茫造化。爰啓英淑。猗猗澤蘭。應靈誕育。鬢髮蛾眉。巧笑美目。顏耀榮苔。華茂時菊。如金之精。如蘭之馨。淑質彌暢。聰慧日新。朝夕顧復。夙夜盡勤。彼蒼者天。哀此矜人。胡寧不惠。忍予眇身。俾爾嬰孺。微命弗振。俯覽衾綵。仰訴穹旻。弱子在懷。既生不遂。存靡託躬。沒無遺類。耳存遺響。目想餘顏。寢席伏枕。摧心割肝。相彼烏矣。和鳴嚶嚶。矧伊蘭子。音影冥冥。彷徨邱隴。徒倚墳塋。

潘安仁金鹿哀辭

嗟我金鹿。天姿特挺。鬢髮凝膚。蛾眉螭頰。柔情和泰。朗心聰警。嗚呼上天。胡忍我門。良嬪短世。今子天昏。既披我幹。又剪我根。塊如瘞木。枯莖獨存。捐子中野。遵我歸路。將反如疑。回首長顧。四章皆初體亦楚騷之枝流餘裔也

潘安仁哀永逝文○

啓夕兮宵興。悲絕緒兮莫承。俄龍輻兮門側。嗟俟時兮將升。嫂姪兮悼惶。慈姑兮垂矜。聞鳴雞兮戒朝。咸驚號兮撫膺。逝日長兮生年淺。憂患衆兮歡樂尠。彼遙思兮離居。嘆河廣兮宋遠。今柰何兮一舉。邈終天兮不反。盡余哀兮祖之晨。揚明燎兮援靈輶。撤房帷兮席庭筵。舉醑觴兮告永遷。悽切兮增欷。俯仰兮揮淚。想孤魂兮眷舊宇。視條忽兮若髣髴。徒髣髴兮在慮。靡耳目兮一遇。停駕兮淹留。徘徊兮故處。周求兮何獲。引身兮當去。去華輦兮初邁。馬迴首兮旋旆。風泠泠兮入帷。雲霏霏兮承蓋。鳥俛翼兮忘林。魚仰沫兮失瀨。悵悵兮遲遲。遵吉路兮凶歸。思其人兮已滅。覽餘跡兮未夷。昔同塗兮今異世。憶舊歡兮增新悲。謂原隰兮無畔。謂川流兮無岸。望山兮寥廓。臨水兮浩汗。視天日兮蒼茫。面邑里兮蕭散。匪外物兮或改。固歡哀兮情換。嗟潛隧兮既敞。將送形兮長往。委蘭房兮繁華。襲窮泉兮朽壤。中慕叫兮擗標。之子降兮宅兆。撫靈輶兮訣幽房。棺冥冥兮挺窈窈。戶闔兮燈滅。夜何時兮復曉。歸反哭兮殯宮。聲有止兮哀無終。是乎非乎何皇。趣一遇兮目中。既遇目兮無兆。曾寤寐兮弗夢。既顧瞻兮家道。長寄心兮爾躬。重曰。已矣。此蓋新哀之情然耳。渠懷之其幾何。庶無愧兮莊子。招魂大招哀李夫人賦而下益婉益哀殆亦如樂府詩之流爲墳詞耳未到齊梁故以真氣人不事譬况

陶淵明自祭文○

歲惟丁卯。律中無射。天寒夜長。風氣蕭索。鴻雁于征。草木黃落。陶子將辭。逆旅之館。永歸於本宅。故人懷其相悲。同祖行於今夕。羞以嘉蔬。薦以清酌。候顏已冥。聆音愈漠。嗚呼哀哉。茫茫大塊。悠悠高旻。是生萬物。余得爲人。自余爲人。逢運之貧。簞瓢屢罄。絺綌冬陳。含歡谷汲。行歌負薪。翳翳柴門。事我宵晨。春秋代謝。有務中園。載耘載耔。迺育迺繁。欣以素牘。和以七絃。冬曝其日。夏濯其泉。勤靡餘勞。心有常閒。樂天委分。以至百年。惟此百年。夫人愛之。懼彼無成。惕日惜時。存爲世珍。沒亦見思。嗟我獨邁。曾是異茲。寵非己榮。涅豈吾緇。捭兀窮廬。酣飲賦詩。識運知命。疇能罔眷。余今斯化。可以無恨。壽涉百齡。身慕肥遁。從老得終。奚所復戀。寒暑逾邁。亡既異存。外姻晨來。良友宵葬。之中野。以安其魂。窅窅我行。蕭蕭墓門。奢恥生臣。儉笑王孫。廓兮已滅。慨焉已遐。不封不樹。日月遂過。匪貴前譽。孰重後歌。人生實難。死如之何。嗚呼哀哉。神情散朗。稱心而言。

陶淵明祭從弟敬遠文○

歲在辛亥。月惟仲秋。旬有九日。從弟敬遠。卜辰云窆。永寧后土。感平生之遊處。悲一往之不返。情惻惻以摧心。淚愍愍而盈眼。乃以園果時醪。祖其將行。嗚呼哀哉。於鑠吾弟。有操有概。孝發幼齡。友自天愛。少思寡欲。靡執靡介。後已先人。臨財思惠。心遺得失。情不依世。其色能溫。其言則厲。樂勝朋高。好是文藝。遙遙帝鄉。爰感奇心。絕粒委務。考槃山陰。淙淙懸溜。曖曖荒林。晨採上藥。夕閑素琴。曰仁者壽。竊獨信之。如何斯言。徒能見欺。年甫過立。奄與世辭。長歸蒿里。邈無還期。惟我與爾。匪但親友。父則同生。母則從母。相及齟齬。並罹偏咎。斯情實深。斯愛實厚。念疇昔日。同房之歡。冬無緇褐。夏渴瓢簞。相將以道。相開以顏。豈不

多乏。忽忘饑寒。余嘗學仕。纏綿人事。流浪無成。懼負素志。斂策歸來。爾知我意。嘗願攜手。寘彼衆議。每憶有秋。我將其刈。與汝偕行。舫舟同濟。三宿水濱。樂飲川界。靜月澄高。溫風始逝。撫杯而言。物久人脆。奈何吾弟。先我離世。事不可尋。思亦何極。日徂月流。寒暑代息。死生異方。存亡有域。候晨永歸。指塗載陟。呱呱遺稚。未能正言。哀哀整人。禮儀孔閑。庭樹如故。齋宇廓然。孰云敬遠。何時復還。余惟人斯。昧茲近情。著龜有吉。制我祖行。望旄翩翩。執筆涕盈。神其有知。昭余中誠。嗚呼哀哉。澹語彌旨。亦空前矣。

顏延年陽給事誄○去汧督篤巴遠然有深湛之思。澹雅之用。夫亦可謂曖曖矣。

惟永初三年十一月十一日。宋故寧遠司馬濮陽太守彭城陽君卒。嗚呼哀哉。瓚少稟志節。資性忠果。奉上以誠。率下有方。朝嘉其能。故授以邊事。永初之末。佐守滑臺。值國禍荐臻。王略中否。獯虜間覲。劊司竟幽。并騎弩屯。逼鞏洛。列營緣戍。相望屠潰。瓚奮其猛銳。志不違難。立乎將卒之間。以緝華裔之衆。罷困相保。堅守四旬。上下方屈。受陷勅寇。士師奔擾。棄軍爭免。而瓚誓命沈城。佻身飛鏃。兵盡器竭。斃於旗下。非夫貞壯之氣。勇烈之志。豈能臨敵引義。以死徇節者哉。景平之元。朝廷聞而傷之。有詔曰。故寧遠司馬濮陽太守陽瓚。滑臺之逼。厲城固守。投命徇節。在危無撓。古之烈士。無以加之。可贈給事中。振恤遺孤。以慰存亡。追寵旣彰。人知慕節。河汴之間。有義風矣。逮元嘉廓祚。聖神紀物。光昭茂緒。旌錄舊勳。苟有概於貞孝者。實事感於仁明。末臣蒙固。側聞至訓。敢詢諸前典。而爲之誄。其辭曰。貞不常祐。義有必甄。處父勤君。怨在登賢。苦夷致果。題子行間。忠壯之烈。宜自爾先。舊勳雖廢。邑氏遂傳。惟邑及氏。自溫徂陽。狐續旣降。晉族弗昌。之子之生。立續宋皇。拳猛沈毅。溫敏肅良。如彼竹栢。負雪懷霜。

如彼駢馴配服驂衡邊兵喪律王略未恢函陝堙阻灑洛蒿萊朔馬東驚胡風南埃路無歸轡野有委骸
帝圖斯艱簡兵授才實命陽子佐師危臺愷彼危臺在滑之坳周衛是交鄭翟是爭昔惟華國今實邊亭
憑巘結關負河縈城金柝夜擊和門晝扃料敵厭難時維陽生涼冬氣勁塞外草衰遏矣獯虜乘障犯威
鳴驥橫厲霜鏑高鞞軼我河縣俘我洛畿攢鋒成林投鞍爲圍翳翳窮壘嗷嗷羣悲師老變形地孤援闕
卒無半菽馬實拊秣守未焚衝攻已濡褐烈烈陽子在困彌達勉慰痍傷拊巡飢渴力雖可窮氣不可奪
義立邊疆身終鋒枯嗚呼哀哉賁父隕節魯人是志汧督効貞晉策攸紀皇上嘉悼思存寵異于以贈之
言登給事疏爵紀庸恤孤表嗣嗟爾義士沒有餘喜嗚呼哀哉涼冬二語頗疑今之李陵書出于前也

顏延年陶徵士誄

○○○文章之事味如醇醪色若
球璧有道之士知己之言

夫璿玉致美不爲池隍之寶桂椒信芳而非園林之實豈期深而好遠哉蓋云殊性而已故無足而至者
物之藉也隨踵而立者人之薄也若乃巢高之抗行夷皓之峻節故已父老堯禹錙銖周漢而綿世浸遠
光靈不屬至使菁華隱沒芳流歇絕不其惜乎雖今之作者人自爲量而首路同塵輟塗殊軌者多矣豈
所以昭末景汎餘波有晉徵士尋陽陶淵明南岳之幽居者也弱不好弄長實素心學非稱師文取指達
在衆不失其寡處言愈見其默少而貧病居無僕妾井臼弗任藜菽不給母老子幼就養勤匱遠惟田生
致親之議追悟毛子捧檄之懷初辭州府三命後爲彭澤令道不偶物棄官從好遂乃解體世紛結志區
外定迹深棲於是乎遠灌畦鬻蔬爲供魚菽之祭織絢緯蕭以充糧粒之費心好異書性樂酒德簡棄煩
促就成省曠殆所謂國爵屏貴家人忘貧者與有詔徵爲著作郎稱疾不到春秋若干元嘉四年月日卒

于尋陽縣之某里。近識悲悼。遠士傷情。冥默福應。嗚呼淑貞。夫實以誅華名。由謚高。苟允德義。貴賤何算焉。若其寬樂令終之美。好廉克己之操。有合謚典。無愆前志。故詢諸友好。宜謚曰靖節。徵士其辭曰。

物尙孤生。人固介立。豈伊時遘。曷云世及。嗟乎若士。望古遙集。韜此洪族。蔑彼名級。陸親之行。至自非敦。然諾之信。重於布言。廉深簡潔。貞夷粹溫。和而能峻。博而不繁。依世尙同。詭時則異。有一於此。兩非默置。豈若夫子。因心違事。畏榮好古。薄身厚志。世霸虛禮。州壤推風。孝惟義養。道必懷邦。人之秉彜。不隘不恭。爵同下士。祿等上農。度量難鈞。進退可限。長卿棄官。稚賓自免。子之悟之。何悟之辯。賦詩歸來。高蹈獨善。亦既超曠。無適非心。汲流舊巖。葺宇家林。晨烟暮藹。春煦秋陰。陳書綴卷。置酒絃琴。居備勤儉。躬兼貧病。人否其憂。子然其命。隱約就閑。遷延辭聘。非直也明。是惟道性。糾纏幹流。冥漠報施。孰云與仁。實疑明智。謂天蓋高。胡謗斯義。履信曷憑。思順何寘。年在中身。疢維疢疾。視死如歸。臨凶若吉。藥劑弗嘗。禱祀非恤。儻幽告終。懷和長畢。嗚呼哀哉。敬述靖節式尊遺占。存不願豐。沒無求贍。省訃却賻。輕哀薄歛。遭壤以穿。旋葬而窆。嗚呼哀哉。深心追往。遠情逐化。自爾介居。及我多暇。伊好之洽。接閭鄰舍。宵盤晝憩。舟車非駕。念昔宴私。舉觴相誨。獨正者危。至方則闕。哲人卷舒。布在前載。取鑒不遠。吾規子佩。爾實愀然。中言而發。違衆速尤。迂風先蹶。身才非實。榮聲有歇。睿音永矣。誰箴余闕。嗚呼哀哉。仁焉而終。智焉而斃。黔婁既沒。展禽亦逝。其在先生。同塵往世。旌此靖節。加彼康惠。嗚呼哀哉。

予嘗言文辭不外事理而運動之者情也似此情事理交至六經九流而外此類文

事古令數不盈百

王僧達祭顏光祿文○

惟宋孝建三年九月癸丑朔十九日辛未王君以山羞野酌敬祭顏君之靈嗚呼哀哉夫德以道樹禮以仁清惟君之懿早歲飛聲義窮幾象文蔽班揚性悻剛潔志度淵英登朝光國實宋之華才通漢魏譽泱龜沙服爵帝典棲志雲阿清交素友比景共波氣高叔夜嚴方仲舉逸翮獨翔孤風絕侶流連酒德嘯歌琴緒遊顧移年契闊宴處春風首時爰談爰賦秋露未凝歸神太素明發晨駕瞻廬望路心淒目泣情條雲互涼陰掩軒娥月寢耀微燈動光几牘誰照衾衽長塵絲竹罷調擘悲蘭宇屑涕松嶠古來共盡牛山有淚非獨昊天殲我明懿以此忍哀敬陳奠饋不免以句勝

劉令嫻祭夫徐悱文○

維梁大同五年新婦謹薦少牢於徐府君之靈曰惟君德爰禮智才兼文雅學比山成辨同河瀉明經擢秀光朝振野調逸許中聲高洛下含潘度陸超終邁賈二儀既肇判合始分簡賢依德乃隸夫君外治徒奉內佐無聞幸移蓬性頗習蘭薰式傳琴瑟相酬典墳輔仁難驗神情易促雹碎春紅霜雕夏綠躬奉正衾親觀啓足一見無期百身何贖嗚呼哀哉生死雖殊情親猶一敢遵先好手調薑橘素俎空乾奠觴徒溢昔奉齊眉異於今日從軍暫別且思樓中薄遊未反尙比飛蓬如當此訣永痛無窮百年何幾泉穴方同悽愴中無意琢削而語語工亦當文事最勝之日也

謝惠連祭古冢文○文有蕭澹之致

東府掘城北塹八丈餘得古冢上無封域不用埴甃以木爲椁中有二棺正方兩頭無和明器之屬材瓦桐漆有數十種多異形不可盡識刻木爲人長三尺可有二十餘頭初開見悉是人形以物根撥之應手

灰滅棺上有五銖錢百餘枚。水中有甘蔗節及梅李核瓜瓣皆浮出。不甚爛壞。銘誌不存。世代不可得而知也。公命城者改埋於東岡。祭之以豚酒。既不知其名字遠近。故假爲之號。曰溟漠君云爾。

元嘉七年九月十四日。司徒御屬領直兵令史統作城錄事臨漳令亭侯朱林具豚醪之祭。敬薦溟漠君之靈。參總徒旅。版築是司。窮泉爲塹。聚壤成基。一棹旣啓。雙棺在茲。捨畚悽愴。縱鍤漣洏。芻靈已毀。塗車旣摧。几筵糜腐。俎豆傾低。盤或梅李。盎或醢醢。蕉傳餘節。瓜表遺犀。追惟夫子。生自何代。曜質幾年。潛靈幾載。爲壽爲夭。甯顯甯晦。銘誌堙滅。姓字不傳。今誰子後。曩誰子先。功名美惡。如何蔑然。百堵皆作。十仞斯齊。壙不可轉。塹不可迴。黃腸旣毀。便房已頽。循題興念。撫俑增哀。射聲垂仁。廣漢流渥。祠骸府阿。掩骼城曲。仰羨古風。爲君改卜。輪移北隍。窀穸東麓。壙卽新營。棺仍舊木。合葬非古。周公所存。敬遵昔義。還祔雙魂。酒以兩壺。牲以特豚。幽靈髣髴。歆我犧樽。嗚呼哀哉。

庾子山思舊銘〇〇

此亦哀誄之文。非施于碑誌者。故附諸此。

歲在攝提。星居鶉首。梁故觀寧侯蕭永卒。嗚呼哀哉。人之戚也。旣非金石所移。士之悲也。寧有春秋之異。高臺已傾。稷下有聞琴之泣。壯士一去。燕南有擊筑之悲。項羽之晨起帳中。李陵之徘徊歧路。韓王孫之質趙。楚公子之留秦。無假窮秋。于時悲矣。況復魚飛武庫。預有棄甲之徵。鳥伏翟泉。先見橫流之肇。星紀吳亡。庚辰楚滅。紀侯大去。鄒子無歸。原隰載馳。轆轤長別。甲裳失矣。餘皇棄焉。河傾酸棗。杞梓與樽櫟俱流。海淺蓬萊。魚鼈與蛟龍共盡。焚香復道。詎假遊魂。載酒屬車。寧消愁氣。芝蘭蕭艾之秋。形殊而共瘁。羽

毛鱗介之怨聲異而俱哀。所謂天乎。乃曰蒼蒼之氣。所謂地乎。其實搏搏之土。怨之徒也。何能感焉。彫殘殺翮。無所假於颺風。零落春枯。不足煩於霜露。幕府昔開。賢俊翹首。爲羈終歲。門人謝焉。至於東首告辭。西陵長往。山陽車馬。望別郊門。潁川賓客。遙悲松路。稽叔夜之山庭。尙多楊柳。王子猷之舊徑。唯餘竹林。王孫葬地。方爲長樂之宮。烈士埋魂。卽是將軍之墓。昔嘗歡宴。風月留連。追憶平生。宛然心目。及乎垂翅。秦川關河。羈旅降乎悲谷之景。實有憂生之情。美酒酌焉。猶憶建鄴之水。鳴琴在操。終思華亭之鶴。重爲此別。嗚呼甚哉。麟亡星落。月死珠傷。瓶罄壘恥。芝焚蕙歎。所望鐘沉。德水聲出。風雲劍沒。豐城氣存。牛斗潛然。思舊乃作銘云。

風雲上慘。舟壑潛移。駸駸霜露。君子先危。紀侯大去。懷王不返。玉樹長埋。風流遂遠。荀伯舊縣。慶封餘邑。萬里歸魂。修門詎入。墳橫武庫。山枕盧龍。思歸道遠。返葬無從。徒留送雁。空靡長松。平陵之東。無復梧桐。松聲蕭瑟。長起秋風。疇昔隆貴。提攜語默。託情稽阮。風雲相得。有酒如澠。終溫且克。朝陽落鳳。大野傷麟。佳城鬱鬱。流寓於秦。山陽相送。唯餘故人。孀機罄緯。獨鳳孤鸞。閨深夜靜。風高月寒。生平已矣。懷舊何期。匣中絃絕。鄰人笛悲。昔爲幕府。今成總帷。

亦靡矣。並開俗調。第子山之文。實以情勝。雖繁寃。嗚殺。感人殊深。能感人者。卽至文也。

駢體文鈔卷二十七

【設辭類】

淳于髡諷齊威王

○漢賦之祖
不應選錄

威王八年。楚大發兵加齊。齊王使淳于髡之趙。請救兵。齎金百斤。車馬十駟。淳于髡仰天大笑。冠纓索絕。王曰。先生少之乎。髡曰。何敢。王曰。笑豈有說乎。髡曰。今者臣從東方來。見道旁有禳田者。操一豚蹄。酒一盃。祝曰。甌窶滿篝。汙邪滿車。五穀蕃熟。穰穰滿家。臣見其所持者狹。而所欲者奢。故笑之。於是齊威王乃益齎黃金千鎰。白璧十雙。車馬百駟。髡辭而行。至趙。趙王與之精兵十萬。革車千乘。楚聞之。夜引兵而去。威王大悅。置酒後宮。召髡。賜之酒。問曰。先生能飲幾何而醉。髡對曰。臣飲一斗亦醉。一石亦醉。威王曰。先生飲一斗而醉。惡能飲一石哉。其說可得聞乎。髡曰。賜酒大王之前。執法在旁。御史在後。髡恐懼俯伏。而飲。不過一斗。徑醉矣。若親有嚴客。髡袒韞鞬。侍酒於前。時賜餘瀝。奉觴上壽。數起。飲不過二斗。徑醉矣。若朋友交遊。久不相見。卒然相覩。歡然道故。私情相與。飲可五六斗。徑醉矣。若乃州閭之會。男女雜坐。行酒稽留。六博投壺。相引爲曹。握手無罰。日旡不禁。前有墮珥。後有遺簪。髡竊樂此。飲可八斗。而醉。二參日。莫酒闌。合尊促坐。男女同席。履舄交錯。杯盤狼籍。堂上燭滅。主人留髡而送客。羅襦襟解。微聞薜澤。當此之時。髡心最歡。能飲一石。故曰。酒極則亂。樂極則悲。萬事盡然。言不可極。極之而衰。以諷諫焉。齊王曰。善。乃罷長夜之飲。以髡爲諸侯主客。宗室置酒。髡嘗在側。

宋玉對楚王問○○○

楚襄王問於宋玉曰。先生其有遺行與。何士民衆庶不譽之甚也。宋玉對曰。唯然有之。願大王寬其罪。使得畢其辭。客有歌於郢中者。其始曰。下里巴人。國中屬而和者數千人。其爲陽阿薤露。國中屬而和者數百人。其爲陽春白雪。國中屬而和者不過數十人。引商刻羽。雜以流徵。國中屬而和者不過數人而已。是其曲彌高。其和彌寡。故鳥有鳳而魚有鯤。鳳凰上擊九千里。絕雲霓。負蒼天。足亂浮雲。翱翔乎杳冥之上。夫蕃籬之鷄。豈能與之料天地之高哉。鯤魚朝發崑崙之墟。曩鬢碣石。莫宿於孟諸。夫尺澤之鯢。豈能與之量江海之大哉。故非獨鳥有鳳而魚有鯢也。士亦有之。夫聖人瑰意琦行。超然獨處。世俗之民。又安知臣之所爲哉。文之至者曰自然。風行水上。非晚周先秦之文不能當之。

東方曼倩答客難○○○若一起九天一落千丈。李斯鄒陽。蹊逕。

客難東方朔曰。蘇秦張儀。一當萬乘之主。而身都卿相之位。澤及後世。今子大夫。修先王之術。慕聖人之義。諷誦詩書。百家之言。不可勝記。著於竹帛。唇腐齒落。服膺而不可釋。好學樂道之効。明白甚矣。自以爲智能海內無雙。則可謂博聞辯智矣。然悉力盡忠。以事聖帝。曠日持久。積數十年。官不過侍郎。位不過執戟。意者尙有遺行邪。同胞之徒。無所容居。其故何也。東方先生喟然長息。仰而應之曰。是故非子之所能備。彼一時也。此一時也。豈可同哉。夫蘇秦張儀之時。周室大壞。諸侯不朝。力政爭權。相擒以兵。并爲十二國。未有雌雄。得士者強。失士者亡。故說得行焉。身處尊位。珍寶充內。外有倉廩。澤及後世。子孫長享。今則不然。聖帝德流。天下震懼。諸侯賓服。連四海之外。以爲帶。安於覆盂。天下均平。合爲一家。動發舉事。猶運

之掌。賢與不肖。何以異哉。遵天之道。順地之理。物無不得其所。故綏之則安。動之則苦。尊之則爲將。卑之則爲虜。抗之則在青雲之上。抑之則在深淵之下。用之則爲虎。不用則爲鼠。雖欲盡節効情。安知前後。夫天地之大。士民之衆。竭精馳說。並進輻輳者。不可勝數。悉力慕之。困於衣食。或失門戶。使蘇秦張儀。與僕並生於今世。曾不得掌故。安敢望侍郎乎。傳曰。天下無害。雖有聖人。無所施才。上下和同。雖有賢者。無所立功。故曰。時異事異。雖然。安可以不務修身乎哉。詩曰。鼓鐘于宮。聲聞于外。鶴鳴九皋。聲聞于天。苟能修身。何患不榮。太公體仁行義。七十有二。乃設用于文武。德信厥說。封於齊。七百歲而不絕。此士所以日夜孳孳。修學敏行。而不敢怠也。譬若鵲鶴。飛且鳴矣。傳曰。天不爲人之惡寒。而輟其冬。地不爲人之惡險。而輟其廣。君子不爲小人之匈匈而易其行。天有常度。地有常形。君子有常行。君子道其常。小人計其功。詩云。禮義之不愆。何恤人之言。水至清則無魚。人至察則無徒。冕而前旒。所以蔽明。黻纁充耳。所以塞聰。明有所不見。聰有所不聞。舉大德。赦小過。無求備於一人之義也。枉而直之。使自得之。優而柔之。使自求之。揆而度之。使自索之。蓋聖人之教化如此。欲其自得之。自得之。則敏且廣矣。今世之處士。時雖不用。塊然無徒。廓然獨居。上觀許由。下察接輿。計同范蠡。忠合子胥。天下和平。與義相扶。寡偶少徒。固其宜也。子何疑於予哉。若夫燕之用樂毅。秦之任李斯。酈食其之下齊。說行如流。曲從如環。所欲必得。功若丘山。海內定。國家安。是遇其時者也。子又何怪之邪。語曰。以管窺天。以蠡測海。以筵撞鐘。豈能通其條貫。考其文理。發其音聲哉。由是觀之。譬由鑿駒之襲狗。狐豚之咋虎。至則靡耳。何功之有。今以下愚而非處士。雖欲勿困。固不得已。此適足以明其不知權變。而終惑於大道也。

東方曼倩非有先生論○闕闕皆天倪觀其合知其離

非有先生仕於吳。進不稱往古以勵主意。退不能揚君美以顯其功。默然無言者三年矣。吳王怪而問之。曰。寡人獲先生之功。異於衆賢之上。夙興夜寐。未嘗敢怠也。今先生率然高舉。遠集吳地。將以輔治寡人。誠竊嘉之。體不安席。食不甘味。目不視靡曼之色。耳不聽鐘鼓之音。虛心定志。欲聞流議者。三年於茲矣。今先生進無以輔治。退不揚主譽。竊爲先生不取也。蓋懷能而不見。臣不忠也。見而不行。主不明也。意者寡人殆不明乎。非有先生伏而唯唯。吳王曰。可以談矣。寡人將竦意而覽焉。先生曰。於戲。可乎哉。可乎哉。談何容易。夫談有悖於目。拂於耳。謬於心。而便於身者。或有說於目。順於耳。快於心。而毀於行者。非有明王聖主。孰能聽之。吳王曰。何爲其然也。中人已上。可以語上也。先生試言寡人將聽焉。先生對曰。昔者關龍逢深諫於桀。而王子比干直言於紂。此二臣者。皆極慮盡忠。閔王澤不下流。而萬民騷動。故直言其失。切諫其邪者。將以爲君之榮。除主之禍也。今則不然。反以爲誹謗君之行。無人臣之禮。果紛然傷於身。蒙不辜之名。戮及先人。爲天下笑。故曰。談何容易。是以輔弼之臣。瓦解而邪諂之人。並進。遂及蜚廉惡來革等。二人皆詐僞巧言利口。以進其身。陰奉瑠瑤刻鏤之好。以納其心。務快耳目之欲。以苟容爲度。遂往不戒。身沒被戮。宗廟崩阨。國家爲虛。故戮賢聖。親近讒夫。詩不云乎。讒人罔極。交亂四國。此之謂也。故卑身賤體。說色微辭。愉愉响响。終無益於主上之治。則志士仁人不忍爲也。將儼然作矜嚴之色。深言直諫。上以拂人主之邪。下以損百姓之害。則忤於邪主之心。歷於衰世之法。故養壽命之士。莫肯進也。遂居家山之間。積土爲室。編蓬爲戶。彈琴其中。以咏先王之風。亦可以樂而忘死矣。是以伯夷叔齊避周。餓於首陽。

之下。後世稱其仁。如是邪主之行。固足畏也。故曰。談何容易。於是吳王懼然。易容。損薦去几。危坐而聽。先生曰。接輿避世。箕子被髮陽狂。此二人者。皆避濁世。以全其身者也。使遇明王聖主。得清燕之閒。寬和之色。發憤畢誠。圖畫安危。揆度得失。上以安主體。下以便萬民。則五帝三王之道。可幾而見也。故伊尹蒙恥辱。負鼎俎和五味。以干湯。太公釣於渭之陽。以見文王。心合意同。謀無不成。計無不從。誠得其君也。深念遠慮。引義以正其身。推恩以廣其下。本仁祖義。褒有德。祿賢能。誅惡亂。總遠方。一統類。美風俗。此帝王所由昌也。上不變天性。下不奪人倫。則天地和洽。遠方懷之。故號聖王。臣子之職。既加矣。於是裂地定封。爵爲公侯。傳國子孫。名顯後世。民到於今。稱之以遇湯與文王也。太公伊尹。以如此。龍逢比干。獨如彼。豈不哀哉。故曰。談何容易。於是吳王穆然。俛而深唯。仰而泣下。交頤曰。嗟乎。余國之不亡也。繇繇連連。殆哉。世之不絕也。於是正明堂之朝。齊君臣之位。舉賢材。布德惠。施仁義。賞有功。躬節儉。減後宮之費。損車馬之用。放鄭聲。遠佞人。省庖廚。去侈靡。卑宮館。壞苑囿。填池塹。以予貧民。無產業者。開內藏。振貧窮。存耆老。卹孤獨。薄賦斂。省刑辟。行此三年。海內晏然。天下大治。陰陽和調。萬物咸得其宜。國無災害之變。民無飢寒之色。家給人足。畜積有餘。囿囿空虛。鳳凰來集。麒麟在郊。甘露旣降。朱草萌芽。遠方異俗之人。鄉風慕義。各奉其職。而來朝賀。故治亂之道。存亡之端。若此易見。而君人者。莫肯爲也。臣愚竊以爲過。故詩云。王國克生。惟周之楨。濟濟多士。文王以寧。此之謂也。後人言浩乎沛然。惟秦漢人文耳。

揚子雲解嘲○漸趨聲色文章。消息與天地準。

哀帝時。丁傅董賢用事。諸附離之者。起家至二千石。時雄方草創太玄。有以自守。泊如也。人有嘲雄以玄

之尙白。雄解之。號曰解嘲。其辭曰。客嘲揚子曰。吾聞上世之士。人綱人紀。不生則已。生必上尊人君。下榮父母。析人之珪。儻人之爵。懷人之符。分人之祿。紆青拖紫。朱丹其轂。今吾子幸得遭明盛之世。處不諱之朝。與羣賢同行。歷金門。上玉堂。有日矣。曾不能畫一奇。出一策。上說人主。下談公卿。目如耀星。舌如電光。一從一橫。論者莫當。顧默而作太玄五千文。枝葉扶疎。獨說數十餘萬言。深者入黃泉。高者出蒼天。大者含元氣。細者入無間。然而位不過侍郎。擢纔給事。黃門意者。玄得無尙白乎。何爲官之拓落也。揚子笑而應之曰。客徒欲朱丹吾轂。不知一跌。將赤吾之族也。往者周網解結。羣鹿爭逸。離爲十二。合爲六七。四分五割。并爲戰國。士無常君。國無定臣。得士者富。失士者貧。矯翼厲翮。恣意所存。故士或自盛以橐。或鑿坏以遁。是故鄒衍以頡頏而取世資。孟軻雖連蹇。猶爲萬乘師。今大漢左東海。右渠搜。前番禺。後陶塗。東南一尉。西北一侯。徽以糾墨。制以鑽鈇。散以禮樂。風以詩書。曠以歲月。結以倚廬。天下之士。雷動雲合。魚鱗雜襲。咸營于八區。家家自以爲稷契。人人自以爲皋陶。戴縱垂纓而談者。皆擬於阿衡。五尺童子。羞比晏嬰。與夷吾。當塗者入青雲。失路者委溝渠。且握權則爲卿相。夕失勢則爲匹夫。譬若江湖之崖。渤澥之島。乘鴈集不爲之多。雙鳧飛不爲之少。昔三仁去而殷墟。二老歸而周熾。子胥死而吳亡。種蠡存而越霸。五穀入而秦喜。樂毅出而燕懼。范雎以折摺而危穰侯。蔡澤以噤吟而笑唐舉。故當其有事也。非蕭曹子房。平勃樊霍。則不能安。當其無事也。章句之徒。相與坐而守之。亦無所患。故世亂則聖哲馳騫。而不足世治。則庸夫高枕。而有餘。夫上世之士。或解縛而相。或釋褐而傅。或倚夷門而笑。或橫江潭而漁。或七十說而不遇。或立談而封侯。或枉千乘於陋巷。或擁帚箠而先驅。是以士頗得信其舌。而奮其筆。窒隙蹈瑕。而無

宛舌而固聲。欲步者擬足而投跡。嚮使上世之士處乎今。策非甲科。行非孝廉。舉非方正。獨可抗疏。時道是非。高得待詔。下觸聞罷。又安得青紫。且吾聞之。炎炎者滅。隆隆者絕。觀雷觀火。爲盈爲實。天收其聲。地藏其熱。高明之家。鬼瞰其室。攫拏者亡。默默者存。位極者宗危。自守者身全。是故知玄知默。守道之極。爰清爰靜。游神之庭。惟寂惟漠。守德之宅。世異事變。人道不殊。彼我易時。未知何如。今子乃以鷓臯而笑鳳凰。執螻蟻而嘲龜龍。不亦病乎。子徒笑我玄之尙白。吾亦笑子病甚。不遭俞跗扁鵲也。悲夫。客曰。然則靡玄無所成名乎。范蔡以下。何必玄哉。揚子曰。范睢。魏之亡命也。折脅摺髀。免於徽索。翕肩蹈背。扶服入橐。激叩萬乘之主。介涇陽。抵穰侯。而代之當也。蔡澤。山東之匹夫也。鎮頤折頰。涕唾流沫。西揖彊秦之相。搯其咽而炕其氣。拊其背而奪其位。時也。天下已定。金革已平。都於洛陽。婁敬委輅脫輓。掉三寸之舌。建不拔之策。舉中國徙之長安。適也。五帝垂典。三王傳禮。百世不易。叔孫通起於枹鼓之間。解甲投戈。遂作君臣之儀。得也。甫刑靡敝。秦法酷烈。聖漢權制。而蕭何造律。宜也。故有造蕭何之律於唐虞之世。則諄矣。有作叔孫通儀於夏殷之時。則惑矣。有建婁敬之策於成周之世。則繆矣。有談范蔡之說於金張許史之間。則狂矣。夫蕭規曹隨。留侯畫策。陳平出奇。功若泰山。響若坻隕。雖其人之膽智哉。亦會其時之可爲也。故爲可爲於可爲之時。則從。爲不可爲於不可爲之時。則凶。若夫蘭生收功於章臺。四皓采榮於南山。公孫創業於金馬。驃騎發跡於祁連。司馬長卿竊貲於卓氏。東方朔割名於細君。僕誠不能與此數子並。故默然獨守吾太玄。

跌宕昭彰。泉涌風發。記明人評。此篇目爲純絲裏鍼。亦知言哉。

揚子雲解難○

枝葉扶疏。獨馳騁於有亡之際。非自道不能深切。

客難揚子曰。凡著書者。爲衆人之所好也。美味期乎合口。工聲調於比耳。今吾子迺抗辭幽說。閱意眇指。獨馳騁於有亡之際。而陶冶大鑪。旁薄羣生。歷覽者茲年矣。而殊不寤。竄費精神於此。而煩學者於彼。譬畫者畫於無形。弦者放於無聲。殆不可乎。揚子曰。俞。若夫閱言崇議。幽微之塗。蓋難與覽者同也。昔人有觀象於天。視度於地。察法於人者。天麗且彌。地普而深。昔人之辭。迺玉迺金。彼豈好爲艱難哉。執不得已也。獨不見夫翠蚪絳螭之將登虛天。必聳身於蒼梧之淵。不階浮雲。翼疾風。虛舉而上升。則不能撼膠葛。騰九閔。日月之經。不千里。則不能燭六合。耀八紘。泰山之高。不嶮嶢。則不能浮滂雲而散歛烝。是以宓犧氏之作易也。繇絡天地。經以八卦。文王附六爻。孔子錯其象而彖其辭。然後發天地之藏。定萬物之基。典謨之篇。雅頌之聲。不溫純深潤。則不足以揚鴻烈而章緝熙。蓋胥靡爲宰。寂寞爲尸。大味必淡。大音必希。大語叫叫。大道低回。是以聲之眇者。不可同於衆人之耳。形之美者。不可混於世俗之目。辭之衍者。不可齊於庸人之聽。今夫絃者。高張急徽。追趨逐者。則坐者不期而附矣。試爲之施咸池。榆六莖。發簫韶。詠九成。則莫有和也。是故鍾期死。伯牙絕弦。破琴而不肯與衆鼓。獲人亡。則匠石輟斤。而不敢妄斲。師曠之調鐘。竢知音者之在後也。孔子作春秋。幾君子之前睹也。老聃有遺言。貴知我者希。此非其操與。糸澹真至。腴婉不逮。

解嘲高邁且勝。

班孟堅賓戲○

永平中爲郎。典校祕書。專篤志於儒學。以著述爲業。或譏以無功。又感東方朔揚雄自喻。以不遭蘇張范

有不易之分。亦云名而已矣。故太上有立德。其次有立功。夫德不得後身而特盛。功不得背時而特彰。是以聖哲之治。棲棲遑遑。孔席不暝。墨突不黔。由此言之。取舍者。昔人之上務。著作者。前列之餘事耳。今吾子幸游帝王之世。躬帶絨冕之服。浮英華。湛道德。轡龍虎之文。舊矣。卒不能據首尾。奮翼鱗。振拔滂塗。跨騰風雲。使見之者影駭。聞之者響震。徒樂枕經藉書。紆體衡門。上無所蒂。下無所根。獨攄意乎宇宙之外。銳思於毫芒之內。潛神默記。緬以年歲。然而器不賈於當己。用不効於一世。雖馳辯如波濤。摛藻如春華。猶無益於殿最也。意者且運朝夕之策。定合會之計。使存有顯號。亡有美諡。不亦優乎。主人適爾而笑曰。若賓之言。所謂見勢利之華。闇道德之實。守窳奧之熒燭。未仰天庭而覩白日也。曩者王塗蕪穢。周失其馭。侯伯方軌。戰國橫鶩。於是七雄虓鬪。分裂諸夏。龍戰虎爭。遊說之徒。風颺電激。並起而救之。其餘焱飛景附。讐煜其間者。蓋不可勝載。當此之時。搦朽磨鈍。鋌刀皆能一斷。是故魯連飛一矢而蹶千金。虞卿以顧眄而捐相印。夫啾發投曲。感耳之聲。合之律度。淫謳而不可聽者。非韶夏之樂也。因勢合變。遇時之容。移風易俗。乖迕而不可通者。非君子之法也。及至從人合之。衡人散之。亡命漂說。羈旅騁辭。商鞅挾三術。以鑽孝公。李斯奮時務。而要始皇。彼皆躡風塵之會。履顛沛之勢。據傲乘邪。以求一日之富貴。朝爲榮華。夕爲顛頹。福不盈眚。禍溢於世。凶人且以自悔。況吉士而是賴乎。且功不可以虛成。名不可以僞立。韓設辯以激君。呂行詐以賈國。說難既逾。其身乃囚。秦貨既貴。厥宗亦墜。是以仲尼抗浮雲之志。孟軻養浩然之氣。彼豈樂爲迂闊哉。道不可以貳也。方今大漢洒埽羣穢。夷險芟荒。廓帝紘。恢皇綱。基隆於義農。規廣

於黃唐其君天下也。炎之如日。威之如神。函之如海。養之如春。是以六合之內。莫不同源共流。沐浴玄德。稟仰太蘇。枝附葉著。譬猶草木之植山林。鳥魚之毓川澤。得氣者蕃滋。失時者零落。參天地而施化。豈云人事之厚薄哉。今吾子處皇代而論戰國。矚所聞而疑所覲。欲從整敦而度高乎泰山。懷汎濫而測深乎重淵。亦未至也。賓曰。若夫鞅斯之倫。衰周之凶人。既聞命矣。敢問上古之士。處身行道。輔世成名。可述於後者。默而已乎。主人曰。何爲其然也。昔者咎繇謨虞。箕子訪周。言通帝王。謀合神聖。殷說夢發於傅巖。周望兆動於渭濱。齊甯激聲於康衢。漢良受書於邳垠。皆俟命而神交。匪詞言之所信。故能建必然之策。展無窮之勳也。近者陸子優游。新語以興。董生下帷。發藻儒林。劉向司籍。辨章舊聞。楊雄譚思。法言太玄。皆及時君之門闈。究先聖之壺奧。婆娑乎術藝之場。休息乎篇籍之囿。以全其質。而發其文。用納乎聖德。烈炳乎後人。斯非亞歟。若乃伯夷抗行於首陽。柳惠降志而辱仕。顏耽樂於簞瓢。孔終篇於西狩。聲盈塞於天淵。眞吾徒之師表也。且吾聞之一陰一陽。天地之方。乃文乃質。王道之綱。有同有異。聖哲之常。故曰。慎修所志。守爾天符。委命供己。味道之腴。神之聽之。神其舍諸。賓又不聞和氏之璧。韞於荆石。隋侯之珠。藏於蚌蛤乎。歷世莫眊。不知其將含景曜。吐英精。曠千載而流光也。應龍潛於潢汗。魚鼈媿之不覩。其能奮靈德。合風雲。超忽荒而躔昊蒼也。故夫泥蟠而天飛者。應龍之神也。先賤而後貴者。和隋之珍也。時暗而久章者。君子之眞也。若乃牙曠清耳於管絃。離婁眇目於毫分。逢蒙絕技於弧矢。般嶮權巧於斧斤。良樂軼能於相馭。烏獲抗力於千鈞。和鵠發精於鍼石。研桑心計於無垠。走亦不任廁技於彼列。故密爾自娛。

於斯文。從容平實。不
免晉帖唐臨。

張平子應閒○道術之士稱心而言拙
機諂至而孟堅細矣

有間余者曰。蓋聞前哲首務。務於下學。上達。佐國理民。有云爲也。朝有所聞。則夕行之。立功立事。式昭德音。是故伊尹使君爲堯舜。而民處唐虞。彼豈虛言而已哉。必旌厥素爾。咎單巫咸。實守王家。申伯樊仲。實幹周邦。服袞而朝。介圭作瑞。厥跡不朽。垂烈後昆。不亦丕歟。且學非要利。而富貴萃之。貴以行令。富以施惠。惠施令行。故易稱以大業。質以文美。實由華興。器賴彫飾。爲好人以輿服爲榮。吾子性德體道。篤信安仁。約己博藝。無堅不鑽。以思世路。斯何遠矣。曩治日官。今又原之。雖老氏曲全。進道若退。然行亦以需。必也學非所用。術有所仰。故臨川將濟。而舟楫不存焉。徒經思天衢。內昭獨智。固合理民之式也。故嘗見謗于鄙儒。深厲淺揭。隨時爲義。曾何貪於支離。而習其孤技耶。參輪可使自轉。木雕猶能獨飛。已垂翅而還故棲。盍亦調其機。而銛諸昔。有文王自求多福。人生在勤。不索何獲。曷若卑體屈己。美言以相尅。鳴於喬木。乃金聲而玉振之。用後勳。雪前吝。倅佷不柔。以意誰靳也。應之曰。是何觀同而見異也。君子不患位之不尊。而患德之不崇。不恥祿之不夥。而恥智之不博。是故藝可學而行可力也。天爵高懸。得之在命。或不速而自懷。或羨旃而不臻。求之無益。故智者固而不思。陋身以徼幸。固貪夫之所爲。未得而豫喪也。枉尺直尋。議者譏之。盈欲虧志。孰云非羞。於心有猜。則筮殮饌。舖猶不屑。餐旌。替以之意之無疑。則兼金盈百。而不嫌辭。孟軻以之士。或解褐褐而襲黼黻。或委重築而據文軒者。度德拜爵。量績受祿也。輸力致庸。受必有階。渾元初基。靈軌未紀。吉凶紛錯。人用臆朦。黃帝爲斯深慘。有風后者是焉。亮之察三辰於上。跡禍福乎下。經緯歷數。然後天步有常。則風后之爲也。當少昊清陽之末。實爲亂德。人神雜擾。不可方物。重

黎又相顯頊而申理之。日月卽次。則重黎之爲也。人各有能。因藝受任。烏師別名。四叔三正。官無二業。事不並濟。晝長則宵短。日南則景北。天且不堪兼。況以人該之。夫玄龍迎夏。則陵雲而奮鱗。樂時也。涉冬則溷泥而潛蟠。避害也。公旦道行。故制典禮。以尹天下。懼教誨之不從。有人之不理。仲尼不遇。故論六經。以俟來辟。恥一物之不知。有事之無範。所考不齊。如何可一。夫戰國交爭。戎車競驅。君若綴旒。人無所麗。燭武縣綽。而秦伯退師。魯連係箭。而聊城弛柝。從往則合。橫來則離。安危無常。要在說夫。咸以得人爲梟。失士爲尤。故樊噲披帷。入見高祖。高祖踞洗。以對酈生。當此之會。乃鼉鳴而鼈應也。故能同心戮力。勤恤人隱。奄受區夏。遂定帝位。皆謀臣之由也。故一介之策。各有攸建。子長謀之。爛然有第。夫女魃北而應龍翔。洪鼎聲而軍容息。溽暑至而鶉火棲。寒冰沍而鼃蠃蟄。今也。皇澤宣洽。海外混同。萬方億醜。并質共劑。若修成之不暇。尙何功之可立。立事有三。言爲下列。下列且不可庶矣。奚冀其二哉。于茲縉紳如雲。儒士成林。及津者風摭。失塗者幽僻。遭遇難要。趨偶爲幸。世易俗異。事勢舛殊。不能通其變。而一度以揆之。斯契船而求劍。守扶而伺兔也。冒愧逞願。必無仁以繼之。有道者所不履也。越王句踐事此。故厥緒不永。捷徑邪至。我不忍以投步。干進苟容。我不忍以歛肩。雖有犀舟勁楫。猶人涉印否。有須者也。姑亦奉順敦篤。守以忠信。得之不休。不獲不吝。不見是而不惜。居下位而不憂。允上德之常服焉。方將師天老而友地典。與之乎高睨而大談。孔甲且不足慕焉。稱殷彭及周聃。與世殊技。固孤是求。子憂朱泚曼之無所用。吾恨輪扁之無所教也。子覩木雕獨飛。愍我垂翅故棲。吾感蠹鼃附鷗。悲爾先笑而後號也。斐豹以斃督燔書。禮至以掖國作銘。弦高以牛餼退敵。墨翟以縈帶全城。貫高以端辭顯義。蘇武以禿節效貞。蒲且以飛矰逞

巧詹何以沈鉤致精奕秋以棋局取譽王豹以清謳流聲僕進不能參名於二立退又不能羣彼數子感三墳之既頹惜八索之不理庶前訓之可鑽聊朝隱乎柱史且韞櫝以待價踵顏氏以行止曾不慊夫晉楚敢告誠於知己亦以靈憲爲主如子雲之太予也故以風后重黎自況文詞渾穆有拙致勁氣而虛和之妙盡矣

崔亭伯達旨○

駟年十三能通詩易春秋博學有偉才盡通古今訓詁百家之言善屬文少游太學與班固傅毅同時齊名常以典籍爲業未遑仕進之事時人或譏其太玄靜將以後名失實駟擬楊雄解嘲作達旨以答焉其辭曰或說己曰易稱備物致用可觀而有所合故能扶陽以出順陰而入春發其華秋收其實有始有極爰登其質今子韞櫝六經服膺道術歷世而游高談有日俯鉤深於重淵仰探遠乎九乾窮至頤於幽微測潛隱之無源然下不步卿相之廷上不登王公之門進不黨以讚己退不黷於庸人獨師友道德合符曩真抱景特立與士不羣蓋高樹靡陰獨木不林隨時之宜道貴從凡于時太上運天德以君世憲王僚而布官臨雍泮以恢儒疏軒冕以崇賢率敦德以厲忠孝揚茂化以砥仁義選利器於良材求鑿錫於明智不以此時攀台階闕紫闥據高軒望朱闕夫欲千里而咫尺未發蒙竊惑焉故英人乘斯時也猶逸禽之赴深林蟲蚋之趣大沛胡爲嘿嘿而久沈滯也答曰有是言乎子苟欲勉我以世路不知其跌而失吾之度也古者陰陽始分天地初制皇綱云緒帝紀乃設傳序歷數三代興滅昔大庭尙矣赫胥罔識淳樸散離人物錯乖高辛攸降厥趣各違道無常稽與時張弛失仁爲非得義爲是君子通變各審所履故士或掩目而淵潛或盪耳而山棲或草耕而僅飽或木茹而長饑或重聘而不來或屢黜而不去或冒詢以

干進。或望色而斯舉。或以役夫發夢於王公。或以漁父見兆於元龜。若夫紛纒塞路。凶虐播流。人有昏墊之扈。主有疇咨之憂。條垂藟蔓。上下相求。於是乎賢人授手。援世之災。跋涉赴俗。急斯時也。昔堯含感而皋陶謨。高祖歎而子房慮。禍不散而曹絳奮。結不解而陳平權。及其策合道從。克亂弭衝。乃將鏤玄珪。册顯功。銘昆吾之冶。勒景襄之鍾。當其有事。則褰裳濡足。冠挂不顧。人溺不拯。則非仁也。當其無事。則躡纓整襟。規矩其步。德讓不修。則非忠也。是以險則救俗。平則守禮。舉以公心。不私其體。今聖上之育斯人也。樸以皇質。雕以唐文。六合怡怡。比屋爲仁。壹天下之衆異。齊品類之萬殊。參差同量。埶冶一陶。羣生得理。庶績其凝。家家有以樂和。人人有以自優。威械藏而俎豆布。六典陳而九刑厝。濟茲兆庶。出於平易之路。雖有力牧之略。尙父之厲。伊臯不能。奚事范蔡。夫廣廈成而茂木暢。遠求存而良馬繫。陰事終而水宿藏。場功畢而大火入。方斯之際。處士山積。學者川流。衣裳被宇。冠蓋雲浮。譬猶衡陽之林。岱陰之麓。伐尋抱不爲之稀。莢拱把不爲之數。悠悠罔極。亦各有得。彼採其華。我收其實。舍之則藏。己所學也。故進動以道。則不辭執珪而秉柱國。復靜以理。則甘糟糠而安藜藿。夫君子非不欲仕也。恥夸毗以求舉。非不欲室也。惡登牆而樓處。叫呼街衢。縣旌自表。非隨和之寶也。暴智耀世。因以干祿。非仲尼之道也。游不倫黨。苟以狗己。汗血競時。利合而友。子笑我之沈滯。吾亦病子屑屑而已也。先人有則。而我弗虧。行有枉徑。而我非隨。臧否在予。唯世所議。固將因天質之自然。誦上哲之高訓。詠太平之清風。行天下之至順。懼吾躬之穢德。勤百畝之不耘。繫余馬以安行。俟性命之所存。昔孔子起威於谷口。晏嬰發勇於崔杼。曹劌舉節於柯盟。卞嚴克捷於彊禦。范蠡錯執於會稽。伍員樹功於柏舉。魯連辯言以退燕。包胥單辭而存楚。唐且華

回明仁於度穀程嬰顯義於趙武僕誠不能編德於數者竊慕古人之所序

平世文人其言夷憚雖曰亦步亦趨中間跌宕開闢乃滔

酒自

蔡伯喈釋誨○憤疾直陳稍亢厲矣鬱伊咄喏憂生念亂質

幹不同藻采已損孟堅平子之間幾欲先驚

有務世公子誨於華顛胡老曰蓋聞聖人之大寶曰位故以仁守位以財聚人然則有位斯貴有財斯富行義達道士之司也故伊摯有負鼎之銜仲尼設執鞭之言寧子有清商之歌百里有象牛之事夫如是則聖哲之通趣古人之明志也今夫子生穆清之世秉醇和之靈覃思典籍韞櫝六經安貧樂賤與世無營沈精重淵抗志高冥包括無外綜析無形其已久矣曾不能拔萃出羣揚芳飛文登天庭序彝倫埽六合之穢慝清宇宙之埃塵連光芒於白日屬炎氣於景雲時逝歲暮默而無聞小子惑焉是以有云方今聖上寬明輔弼賢知崇英逸偉不墜於地德宏者建宰相而裂土才羨者荷榮祿而蒙賜盍亦回塗要至俛仰取容輯當世之利定不拔之功榮家宗於此時遺不滅之令蹤夫獨未之思邪何爲守彼而不通此胡老傲然而笑曰若公子所謂觀曖昧之利而忘昭哲之害專必成之功而忽蹉跌之敗者已公子謾爾歛袂而興曰胡爲其然也胡老曰居吾將釋汝昔自太極君臣始基有羲皇之洪寧唐虞之至時三代之隆亦有緝熙五伯扶微勤而撫之于斯以降天綱縱人絃弛王塗壞太極隴君臣土崩上下瓦解於是智者騁詐辯者馳說武夫奮略戰士講銳電駭風馳霧散雲披變詐乖詭以合時宜或畫一策而縮萬金或談崇朝而錫瑞珪連衡者六印磊落合從者駢組流離隆貴翕習積富無崖據巧蹈機以忘其危夫華離

蕤而萎。條去幹而枯。女冶容而淫。士背道而辜。人毀其滿。神疾其邪。利端始萌。害漸亦牙。速速方穀。夭夭是加。欲豐其屋。乃葺其家。是故天地否閉。聖哲潛形。石門守晨。沮溺偶耕。顏歎抱璞。遽瑗保生。齊人歸樂。孔子斯征。雍渠驂乘。逝而遺輕。夫豈傲主而背國乎。道不可以傾也。且我聞之日南至則黃鐘應。融風動而魚上冰。蕤賓統則微陰萌。兼葭蒼而白露凝。寒暑相推。陰陽代興。運極則化。理亂相承。今大漢紹陶唐之洪烈。盪四海之殘災。隆隱天之高。拆絕地之基。皇道惟融。帝猷顯平。泯泯庶類。含甘吮滋。檢六合之羣品。濟之乎雍熙。羣僚恭己於職司。聖主垂拱乎兩楹。君臣穆穆。守之以平。濟濟多士。端委縉珽。鴻漸盈階。振鷺充庭。譬猶鍾由之玉。泗濱之石。累珪璧不爲之盈。探浮磬不爲之索。曩者洪源辟而四隩集。武功定而干戈戢。獫狁攘而吉甫宴。城濮捷而晉凱入。故當其有事也。則蓑笠並載。擐甲揚鋒。不給於務。當其無事也。則舒紳緩佩。鳴玉以步。綽有餘裕。夫世臣門子。摯御之族。天隆其祐。主豐其祿。抱膺從容。爵位自從。攝須理髻。餘官委貴。其進取也。順傾轉圓。不足以喻其便。逡巡放屣。不足以況其易。夫夫有逸羣之才。人有優贍之智。童子不問疑於老成。瞳矇不稽謀於先生。心恬澹於守高。意無爲於持盈。粲乎煌煌。莫非華榮。明哲泊焉。不失所寧。狂淫振蕩。乃亂其情。貪夫狗財。夸者死權。瞻仰此事。體躁心煩。闔謙盈之効。迷損益之數。騁駑駘於修路。慕騏驥而增驅。卑俯乎外戚之門。乞助乎近貴之譽。榮顯未副。從而顛踣。下獲熏胥之辜。高受滅家之誅。前車已覆。襲軌而驚。曾不鑒禍。以知畏懼。予惟悼哉。害其若是。天高地厚。踣而所防。帶甲百萬。非一勇所抗。今子責匹夫以清宇宙。庸可以水旱而累堯湯乎。懼煙炎之毀燬。何光芒之

敢揚哉。且夫地將震而樞星直，井無景則日陰食，元首寬則望舒朏，侯王肅則月側匿。是以君子推微達著，尋端見緒，履霜知冰，踐靈知暑。時行則行，時止則止。消息盈沖，取緒天紀。利用遭泰，可與處否。樂天知命，持神任己。羣車方奔乎險路，安能與之齊軌。思危難而自豫，故在賤而不恥。方將騁馳乎典籍之崇塗，休息乎仁義之淵藪。槃旋乎周孔之庭宇，揖儒墨而與爲友。舒之足以光四表，收之則莫能知其所有。若乃丁千載之運，應神靈之符。闔闔乘天衢，擁華蓋而奉皇樞。納玄策於聖德，宣太平於中區。計合謀從己之圖也，勳績不立予之辜也。龜鳳山翳，霧露不除。踴躍草萊，祗見其愚。不我知者，將謂之迂。修業思真，棄此焉如。靜以俟命，不斲不渝。百歲之後，歸乎其居。幸其獲稱，天所誘也。罕漫而已，非己咎也。昔伯翳綜聲於鳥語，葛盧辯音於鳴牛。董父受氏於象龍，奚仲供德於衡軛。倕氏興政於巧工，造父登御於驂騮。非子享土於譚圍，狼臆取右於禽囚。弓父畢精於筋角，飲飛明勇於赴流。壽王創基於格五，東方要幸於談優。上官効力於執蓋，宏羊據相於運籌。僕不能參跡於若人，故抱璞而優游。於是公子仰首降階，忸怩而避。胡老乃揚衡含笑，援琴而歌。歌曰：練余心兮浸太清，滌穢濁兮存正靈。和液暢兮神氣寧，情志泊兮心亭亭。嗜欲息兮無由生，躔宇宙而遺俗兮，眇翩翩而獨征。

東廣微玄居釋

○遂爲兩可之言，世變日亟，轉喉觸諱，故不敢一用詆諆。大旨以權貴爲主，較前人益顯。

東哲閒居，門人並侍。方下帷深譚，隱機而哈。含毫散藻，考撰同異。在側者進而問之曰：蓋聞道尙變通，達者無窮。世亂則救其紛，時泰則扶其隆。振天維以贊百務，熙帝載而鼓皇風。生則率土樂其存，死則宇內哀其終。是以君子屈己伸道，不恥于時。上國有不索何獲之言，周易著躍以求進之辭。莘老負金鉉，以陳

烹割之說。齊客當康衢。而咏白水之詩。今先生耽道修藝。嶷然山峙。潛朗通微。洽覽深識。夜兼忘寐之勤。晝騁鑽玄之思。曠年累稔。不墮其志。鱗翼成而愈伏。術業優而不試。乃欲闔匱辭價。泥蟠深處。永戢琳琅之耀。匿首窮魚之渚。當唐年而慕長沮。邦有道而反甯武。識彼迷此。愚竊不取。若乃士以援登。進必待求。附勢之黨。橫擢則林藪之彥不抽。丹墀步執袴之童。東野遺白顛之叟。盍亦因子都而事博陸。憑鷁首以涉洪流。蹈翠雲以駭逸龍。振光耀以驚沈鮪。徒屈蟠於堦井。眇天路而不游。學旣種而身困。夫何爲乎秘丘。且歲不我與。時若奔駟。有來無反。難得易失。先生不知盱豫之讖。悔遲而忘夫朋盍之義務。疾亦豈能登海湄而抑東流之水。臨虞泉而招西歸之日。徒以曲畏爲桎。儒學自桎。困大道于環堵。苦形骸于蓬室。豈若託身權威。憑勢假力。擇棲芳林。飛不待翼。夕宿七娥之房。朝享五鼎之食。匡三正則大階平。贊五教而玉繩直。孰若茹藿滄蔬。終身自匿哉。束子曰。居吾將導爾以君子之道。諭爾以出處之事。爾其明受余訊。謹聽余志。昔元一旣啓。兩儀肇立。離光夜隱。望舒晝戢。羽族翔林。蠖蛄赴濕。物從性之所安。士樂志之所執。或背豐榮以巖栖。或排蘭闥而求入。在野者龍逸。在朝者鳳集。雖其軌迹不同。而道無貴賤。必安其業。交不相羨。稷契奮庸以宣道。巢繇洗耳以避禪。同垂不朽之稱。俱入賢者之流。參名比譽。誰劣誰優。何必貪與二人爲羣。而恥爲七人之疇乎。且道睽而通。志不同趣。吾竊綴處者之末行。未敢聞子之高喻。將忽蒲輪而不眇。夫何權威之云附哉。昔周漢中衰。時難自託。福兆旣開。患端亦作。朝遊巍峨之宮。夕墜崢嶸之壑。晝笑夜歎。晨華暮落。忠不足以衛己。禍不可以預度。是士諱登朝而競赴林薄。或毀名自汙。或不

寧靜蜂蟄。止毒熊羆。輟猛五刑。勿用八紘。備整主無驕肆之怒。臣無驚纓之請。上下相安。率禮從道。朝養觸邪之獸。庭有指佞之草。禍戮可以忠逃。寵祿可以順保。且夫進無險懼。而惟寂之務者。率其性也。兩可俱是。而舍彼趣此者。從其志也。蓋無爲可以解天下之紛。澹泊可以救國家之急。當位者。事有所窮。陳策者。言有不入。翟璜不能迴西鄰之寇。平勃不能正如意之立。干木臥而秦師退。四皓起而戚姬泣。夫如是。何舍何執。何去何就。謂山岑之林爲芳。谷底之莽爲臭。守分任性。唯天所授。鳥不假甲于龜。魚不假足于獸。何必笑孤竹之貧。而表齊景之富。恥布衣以肆志。寧文裘而拖繡。且能約其躬。則儋石之糴以豐。苟肆其欲。則海陵之積不足。存道德者。則匹夫之身可榮。忘大倫者。則萬乘之主猶辱。將研六藉以訓世。守寂泊以鎮俗。偶鄭老於海隅。匹嚴叟於僻蜀。且世以太虛爲輿。玄鑪爲肆。神游莫競之林。心存無營之室。榮利不擾其覺。殷憂不干其寐。捐夸者之所貪。收躁務之所棄。雍聖籍之荒蕪。總羣言之一至。全素履於邱園。背纓綬而長逸。請子課吾業於千載。無聽吾言於今日也。

皇甫士安釋勸論

命意不同。如一筆書。以意勝。

設論諸篇。類懷不遇之感。獨士安以不應辟召。恐見逼迫。故其情危。其辭婉。

相國晉王辟余等三十七人。及秦始登禪。同命之士。莫不畢至。皆拜騎都尉。或賜爵關內侯。應奉朝請。禮如侍臣。唯余疾困。不及國寵。宗人父兄。及我寮類。咸以爲天下大慶。萬姓賴之。雖未成禮。不宜安寢。縱其疾篤。猶當致身。余惟古今明王之制。事無巨細。斷之以情。實力不堪。豈慢也哉。乃伏枕而嘆曰。夫進者。身之榮也。退者。命之實也。設余不疾。執高箕山。尙當容之。況余實篤。故堯舜之世。士或收迹林澤。或過門不

敢入咎繇之徒。兩遂其愿者。遇時也。故朝貴致功之臣。野美全志之士。彼獨何人哉。今聖帝龍興。配名前哲。仁道不遠。斯亦然乎。客或以常言見逼。或以逆世爲慮。余謂上有寬明之主。必有聽意之人。天網恢恢。至否一也。何尤於出處哉。遂究賓主之論。以解難者。名曰釋勸。客曰。蓋聞天以懸象致明。地以含通吐靈。故黃鐘次序。律呂分形。是以春華發萼。夏繁其實。秋風逐暑。冬冰乃結。人道以之。應機乃發。三材連利。明若符契。故士或同升于唐朝。或先覺于有莘。或通夢以感主。或釋釣于渭濱。或叩角以干齊。或解褐以相秦。或冒謗以安鄭。或乘駟以救屯。或班荆以求友。或借術于黃神。故能電飛景拔。超次邁倫。騰高聲以奮遠。抗宇宙之清音。由此觀之。進德貴乎及時。何故屈此而不伸。今子以英茂之才。游精於六藝之府。散意於衆妙之門者。有年矣。旣遭皇禪之朝。又投祿利之際。委聖明之主。偶知己之會。時清道真。可以沖邁。此真吾生濯髮雲漢。鴻漸之秋也。韜光逐藪。含章未曜。龍潛九泉。磴然執高。棄通道之遠。由守介人之局。操毋乃乖於道之趣乎。且吾聞招搖昏迴。則天位正。五教班斂。則人理定。今王命切至。委慮有司。上招迂主之累。下至駭衆之疑。達者貴同。何必獨異。羣賢可從。何必守意。方今同命並臻。饑不待滄。振藻皇塗。咸秩天官。子獨栖遲衡門。放形世表。遜遜邱園。不睨華好。惠不加人。行不合道。身嬰大疾。性命難保。若其義和促轡。大火西頽。臨川恨晚。將復何階。夫貴陰賤璧。聖所約也。顛倒衣裳。明所箴也。子其鑒先哲之洪範。副聖朝之虛心。沖靈翼於雲路。浴天池以濯鱗。排閭闔。步玉岑。登紫闥。侍北辰。翻然景曜。雜沓英塵。輔唐虞之主。化堯舜之人。宣刑錯之政。配殷周之臣。銘功景鐘。參敍彝倫。存則鼎食。亡爲貴臣。不亦茂哉。而忽金白之輝曜。忘青紫之班麟。辭容服之光粲。抱弊褐之終年。無乃勤乎。主人笑而應之曰。吁。若賓可謂習外。

觀之暉暉。未覩幽人之髣髴也。見俗人之不容。未喻聖皇之兼愛也。循方圓於規矩。未知大形之無外也。故曰。天元而清。地靜而寧。含羅萬類。旁薄羣生。寄身聖世。託道之靈。若夫春以陽散。冬以陰凝。泰液含光。元氣渾蒸。衆品仰化。誕洞殊微。故進者享天祿。處者安邱陵。是以寒暑相推。四宿代中。陰陽不治。運化無窮。自然分定。兩克厥中。二物俱靈。是謂大同。彼此無怨。是謂至通。若乃衰周之末。貴詐賤誠。牽于權力。以利要榮。故蘇子出而六主合。張儀入而橫勢成。廉頗存而趙重。樂毅去而燕輕。公叔沒而魏敗。孫臏別而齊寧。螽種親而越霸。屈子疎而楚傾。是以君無常籍。臣無定名。損義放誠。一虛一盈。故馮以彈劍感主。女有反賜之說。項奮拔山之力。蒯陳鼎足之勢。東郭劫於田榮。顏闔恥於見逼。斯皆棄禮喪真。苟榮朝夕之急者也。豈道化之本與。若乃聖帝之創化也。參德乎二皇。齊風乎虞夏。欲溫溫而和暢。不欲察察而明切也。欲混混若元流。不欲蕩蕩而名發也。欲索索而條解。不欲契契而繩結也。欲芒芒而無垠際。不欲區區而分別也。欲闐然而內章。不欲示白若冰雪也。欲醇醇而任德。不欲瑣瑣而執法也。是以見機者以動成。好遯者無所迫。故曰。一明一味。得道之概。一弛一張。合禮之方。一浮一沈。兼得其真。故上有勞謙之愛。下有不名之臣。朝有聘賢之禮。野有遯竄之人。是以支伯以幽疾距唐。李老寄跡於西鄰。顏氏安陋以成名。原思娛道于至貧。榮期以三樂感尼父。黔婁定諡於布衾。干木偃息以存魏。荆萊志邁于江岑。君平因著以道著。四皓潛德於洛濱。鄭真躬耕以致譽。幼安發令乎今人。皆持難奪之節。執不迴之意。遭拔俗之主。全彼人之志。故有獨定之計者。不借謀于衆人。守不動之安者。不假慮於羣賓。故能棄外親之華。通內道之真。去顯顯之明路。入昧昧之埃塵。宛轉萬情之形表。排託虛寂以寄身。居無事之宅。交釋利之人。輕若

鴻毛重若泥沈。損之不得。測之愈深。真吾徒之師表。余迫疾而不能及者也。子議吾失宿而駭衆。吾亦怪子較論而不折中也。夫才不周用。衆所斥也。寢疾彌年。朝所棄也。是以胥克之廢。邱明列焉。伯牛有疾。孔子斯嘆。若黃帝創制於九經。岐伯剖腹以蠲腸。扁鵲造號而尸起。文摯狗命于齊王。醫和顯術于秦晉。倉公發祕于漢皇。華佗存精于獨識。仲景垂妙於定方。徒恨生不逢乎若人。故乞命訴乎明王。求絕編於天籙。亮我躬之辛苦。冀微誠之降霜。故俟罪而窮處。不敢自表銜哀吐誠立言

夏侯孝若抵疑。

○有加倍法。有綿裏鍼法。任傳而後。乃絕響矣。鬱勃之氣。筆端可畏。難乎免矣。憤恚。嶽峙。言外無餘味矣。

當路子有疑。夏侯湛者而謂之曰。吾聞有其才而不遇者。時也。有其時而不遇者。命也。吾子童幼而岐嶷。弱冠而著德。少而流聲。長而垂名。拔萃始立。而登宰相之朝。揮翼初儀。而受卿尹之舉。盪典籍之華。談先生之言。入闔闔。躡丹墀。染彤管。吐洪輝。干當世之務。觸人主之威。有效矣。而官不過散郎。舉不過賢良。鳳棲五期。龍蟠六年。英耀禿落。羽儀摧殘。而獨誰容藝文。駘盪儒林。志不輟著述之業。口不釋雅頌之音。徒費精而耗力。勞神而苦心。此術亦已薄矣。而終莫之辯。宜吾子之陸沈也。且以言乎才。則吾子優矣。以言乎時。則子之所與二三公者。義則骨肉之固。交則明道之觀也。富於德。貴於官。其所發明。雖叩牛操築之客。傭賃抱關之隸。負俗懷譏之士。猶將登爲大夫。顯爲卿尹。於何有寶咳唾之音。愛錙銖之力。向若垂一鱗。回一翼。令吾子攀其飛騰之勢。挂其羽翼之末。猶奮迅於雲霄之際。騰驤於四極之外。今乃金口玉音。漠然沈默。使吾子棲遲窮巷。守此困極。心有窮志。貌有饑色。咨江河之流。不以濯舟船之畔。惜東壁之光。不以寓貧婦之目。抑亦二三公之蔽賢也。實吾子之拙惑也。夏侯子曰。噫。湛也。幸有過人。必知之矣。吾子

心豈能隱几以覽其槩乎。客曰：敢祇以聽。夏侯子曰：吾聞先大夫孔聖之言，德之不修，學之不講，聞義不能徙，不善不能改，是吾憂也。四德具而名位不至者，非吾任也。是以君子求諸己，小人求諸人。僕也，承門戶之業，受過庭之訓，是以得接冠帶之末，充乎士大夫之列，頗闕六經之文，覽百家之學，弱年而入公朝，蒙蔽而當顯舉，進不能拔羣出萃，却不能抗排當世，志則乍顯乍昧，文則乍幽乍蔚，知之者則謂之欲道，遙以養生，不知之者則謂之欲遑遑以求達，此皆未是僕之所匱也。僕又聞世有道則士無所執其節，黜陟明則下不在量其力，是以當舉而不辭，入朝而酬問，東野之鄙人，頑直之陋生也，不識當世之便，不達朝廷之情，不能倚靡容悅，出入崎傾，逐巧黠妍，嘔喁辯佞，隨羣班之次，伏簡墨之後，當此之時，若失水之魚，喪家之狗，行不勝衣，言不出口，安能干當世之務，觸人主之威，適足以露狂簡而增塵垢，縱使心有至言，言有偏直，此委巷之誠，非朝廷之欲也。今天子以茂德臨天下，以八方六合爲四境，海內無虞，萬國元靜，九夷之從主化，猶洪聲之收清響，黎苗之樂函夏，若遊形之招惠景，鄉曲之徒一介之士，曾諷急就，習甲子者，皆奮筆揚文，議制論道，出草茅，起林藪，御青瑣，入金墉者，無日不有，充三臺之寺，盈中書之閣，有司不能竟其文，當年不能編其籍，此執政之所厭聞也。若乃羣公百辟，卿士常伯，被朱佩紫，耀金帶白，坐而論道者，又充路盈寢，黃幄玉階之內，飽其尺牘矣。若僕之言，皆糞土之說，消磨灰爛，垢辱招穢，適可充衛士之爨，盈掃除之器，譬猶投盈寸之膠，而欲使江海易色，燒一羽之毛，而欲合大鑪增勢，若燎原之煙，彌天之雲，噓之不益其熱，噏之不減其氣，今子見僕入朝，整對便欲坐望高位，吐言數百，便謂陵嶒一世。

何吾子之失評也。僕固脂車以須放，秣馬以待却。反耕於枳落，歸志乎渦瀨。從容乎農夫，優游乎卒歲矣。古者天子畫土以封羣后，羣后受國以臨其邦。懸大實以樂其成，列九伐以討其違。興衰相形，安危相傾。故在位者以求賢爲務，受任者以進才爲急。今也則九州爲一家，萬國爲百郡。政有常道，法有恆訓。因循而禮樂自定，揖讓而天下大順。夫道學之貴游，閭邑之搢紳，皆高門之子，世臣之胤。宏風長譽，推成而進。悠悠者皆天下之彥也。諷詁訓傳詩書，講儒墨說元虛，僕皆不如也。二三公之簡僕於凡庸之肆，顯僕於細猥之中，則爲功也重矣。時而清談，則爲親也周矣。且古之君子不知士，則不明不安。是以居逸而思危，對食而肴乾。今也則否，居位者以善身爲靜，以寡交爲慎，以弱斷爲重，以怯言爲信。不知士者無公誹，不得士者不私愧。彼在位者皆稷契咎益，伊呂周召之倫。叔豹仲熊之儔。稽古則踰黃唐，經緯則越虞夏。蔑昆吾之功，嗤桓文之勳。抵秘管仲，蹉電晏嬰。其遠則欲升鼎湖，近則欲超太平。方將保重嗇神，獨善其身。元白冲虛，佗爾養真。雖力挾太山，將不舉一羽。揚波萬里，將不濯一鱗。咳唾成珠玉，揮袂出風雲。豈肯斲龔鄙事，取才進人。此又吾子之失言也。子獨不聞夫神人乎。噲風飲露，不食五穀。登太清，遊山嶽。靡芝草，弄白玉。不因而獨備，無假而自足。不與人路同嗜欲，不與世務齊榮辱。故能入無窮之門，享不死之年。以此言之，何待進賢。客曰：聖人有言曰：邦有道，貧且賤焉，恥也。今子值有道之世，當太平之會，不攘袂奮氣，發謀出奇，使鳴鶴受和好爵，見糜抑乃沈身。郎署約志勤卑，不亦羸哉。且伊尹之于成湯，甯戚之迂桓公，或投己鼎俎，或庸身飯牛。明廢興之機，歌白水之流。德入殷王，義感齊侯。故伊尹起庖廚而登阿衡，甯戚出車下而階大夫。外無微介，內無請謁。矯身擢手，徑躡名位。吾子亦何不慕賢以自厲，希古以慷慨乎。夏

能入泥。麒麟驂駟之乘。一日而致千里。而驚蹇不能邁。畝百鍊之鑑。別鬚眉之數。而壁土不見泰山。鴻鵠一舉。橫四海之區。出青雲之外。而尺鷃不陵桑榆。此利鈍之較。優劣之決也。夫欲進其身者。不過千萬乘。而僕已上朝堂。答世問。不過顯所知。而僕已竭心思。盡才學。意無雅正可準。論無片言可採。是以頓於鄙劣。而莫之能起也。以此言之。僕何爲其不自銜哉。子不嫌僕德之不劭。而疑其位之不到。是猶反鏡而索照。登木而下釣。僕未以此爲不肖也。若乃伊尹負鼎以干湯。呂尙隱遊以徼文。傅說操築以寤主。甯戚擊角以要君。此非僕所能也。莊周駘蕩以放言。君平坐卜以自賢。接輿陽狂以蔽身。梅福棄家以求仙。又非僕之所安也。若乃季札抗節於延陵。揚雄覃思於太元。伯玉和柔於卷懷。柳惠三緘於士官。僕雖不敏。竊頗彷彿其清塵。

意在素望交游熱中之詞發問語已盡其旨

設詞一類高接著書下論俳戲先後稗販格調相襲知人論世略其轍迹子雲尙矣已有杼袖可尋不若東方先生二篇爲戰國百家之流也班張終執規矩變而成方亭伯夷于班中耶健于張廣徵以下益不振然皇甫變就其命意矯然自異亦可誦已

駢體文鈔卷二十八

【七類】

枚叔七發八首○○○

聖人辨士之辭皆具貌似策士純用六義比興千古奇作之爲鉅製析之各爲小賦楚人之遺則源亦從招魂大招出耳

楚太子有疾而吳客往問之曰伏聞太子玉體不安亦少間乎太子曰憊謹謝客客因稱曰今時天下安寧四字和平太子方富於年意者久耽安樂日夜無極邪氣襲逆中若結轡紛屯澹淡噓唏煩醒惕怵怵休臥不得瞑虛中重聽惡聞人聲精神越渫百病咸生聰明眩曜悅怒不平久執不廢大命乃傾太子豈有是乎太子曰謹謝客賴君之力時時有之然未至於也

客曰今夫貴人之子必宮居而閨處內有保母外有傅父欲交無所飲食則溫淳甘臠腥醲肥厚衣裳則雜選曼煖燂燦熱暑雖有金石之堅猶將銷鑠而挺解也況其在筋骨之間乎哉故曰縱耳目之欲恣支體之安者傷血脉之和且夫出輿入輦命曰蹶痿之機洞房清宮命曰寒熱之媒皓齒蛾眉命曰伐性之斧甘脆肥臠命曰腐腸之藥今太子膚色靡曼四支委隨筋骨挺解血脉淫濯手足惰窳越女待前齊姬奉後往來游醺縱恣於曲房隱間之中此甘餐毒藥戲猛獸之爪牙也所從來者至深遠淹滯永久而不廢雖令扁鵲治內巫咸治外尙何及哉今如太子之病者獨宜世之君子博聞強識承問語事變度易意常無離側以爲羽翼淹沉之樂浩唐之心遁佚之志其奚由至哉太子曰諾病已請事此言客曰今太子之病可無藥石針刺灸療而已可以要言妙道說而去也不欲聞之乎太子曰僕願聞之

客曰。龍門之桐。高百尺而無枝。中鬱結之輪菌。根扶疏以分離。上有千仞之峯。下臨百尺之谿。湍流遡波。又澹淡之。其根半死半生。冬則烈風漂霰。飛雪之所激也。夏則雷霆霹靂之所感也。朝則鷓鴣黃鸝鳴焉。暮則羈雌迷鳥宿焉。獨鷓鴣晨號乎其上。鷓鴣哀鳴翔乎其下。於是背秋涉冬。使琴摯斫斫以爲琴。野蕪之絲以爲絃。孤子之鈞以爲隱。九寡之珥以爲約。使師堂操暢。伯子牙爲之歌。歌曰。麥秀漸兮雉朝飛。向虛壑兮背槁槐。依絕區兮臨迴溪。飛鳥聞之。翕翼而不能去。野獸聞之。垂耳而不能行。蛟螭螻蟻聞之。柱喙而不能前。此亦天下之至悲也。太子能強起聽之乎。太子曰。僕病未能也。

客曰。嚙牛之腴。菜以筍蒲肥。狗之和。冒以山膚。楚苗之食。安胡之飯。搏之不解。一啜而散。於是使伊尹煎熬。易牙調和。熊蹯之臠。勺藥之醬。薄者之炙。鮮鯉之膾。秋黃之蘇。白露之茹。蘭英之酒。酌以滌口。山梁之餐。豸豹之胎。小飯大噉。如湯沃雪。此亦天下之至美也。太子能強起嘗之乎。太子曰。僕病未能也。

客曰。鍾代之牡。齒至之車。前以飛鳥。後類距虛。穉麥服處。躁中煩外。羈堅轡。附易路。於是伯樂相其前後。王良造父爲之御。秦缺樓季爲之右。此兩人者。馬佚能止之。車覆能起之。於是使射千鎰之重。爭千里之逐。此亦天下之至駿也。太子能強起乘之乎。太子曰。僕病未能也。

客曰。旣登景夷之臺。南望荆山。北望汝海。左江湖。其樂無有。於是使博辯之士。原本山川。極命草木。比物屬事。離辭連類。浮游覽觀。乃下置酒於虞懷之宮。連廊四注。臺城層構。紛紜元綠。輦道邪交。黃池紆曲。溷章白鷺。孔雀鸕鷀。鷓鴣鵲。翠鬢紫纓。螭龍德牧。邕邕羣鳴。陽魚騰躍。奮翼振鱗。滌漻壽蓼。蔓草芳苓。

列坐縱酒。蕩樂娛心。景春佐酒。杜連理音。滋味雜陳。肴糝錯該。練色娛目。流聲悅耳。於是乃發激楚之結。風揚鄭衛之皓樂。使先施徵舒。陽文段干吳娃。閭媿傅子之徒。雜裾垂髻。目窈心與。揄流波。雜杜若。蒙清塵。被蘭澤。嬾服而御。此亦天下之靡麗。皓侈廣博之樂也。太子能彊起游乎。太子曰。僕病未能也。

客曰。將爲太子馴騏驥之馬。駕飛輪之輿。乘牡駿之乘。右夏服之勁箭。左烏號之彫弓。游涉乎雲林。周馳乎蘭澤。弭節乎江潯。掩青蘋。游清風。陶陽氣。蕩春心。逐狡獸。集輕禽。於是極犬馬之才。困野獸之足。窮相御之智巧。恐虎豹。懼鷲鳥。逐馬鳴鑣。魚跨麋角。履游麇兔。蹈踐麋鹿。汗流沫墜。寃伏陵窘。無創而死者。固足充後乘矣。此校獵之至壯也。太子能彊起游乎。太子曰。僕病未能也。然陽氣見於眉宇之間。侵淫而上。幾滿大宅。客見太子有悅色也。遂推而進之曰。冥火薄天。兵車雷運。旌旗偃蹇。羽旄肅紛。馳騁角逐。慕味爭先。徽墨廣博。望之有圻。純粹矜犧。獻之公門。太子曰。善。願復聞之。客曰。未旣。於是榛林深澤。煙雲闇莫。咒虎並作。毅武孔猛。袒裼身薄。白刃硲硲。矛戟交錯。收獲掌功。賞賜金帛。掩蘋肆若。爲牧人席。旨酒嘉肴。羞炮膾炙。以御賓客。涌觴並起。動心驚耳。誠必不悔。決絕以諾。貞信之色。形於金石。高歌陳唱。萬歲無斃。此真太子之所喜也。能彊起而游乎。太子曰。僕甚願從。直恐爲諸大夫累耳。然而有起色矣。

客曰。將以八月之望。與諸侯遠方交遊。兄弟並往。觀濤乎廣陵之曲江。至則未見濤之形也。徒觀水力之所到。則卹然足以駭矣。觀其所駕軼者。所拔擢者。所揚汨者。所溫汾者。所滌汔者。雖有心略辭給。固未能縷形其所由然也。恍兮惚兮。聊兮慄兮。混汨汨兮。忽兮恍兮。倂兮儻兮。浩瀆瀆兮。慌曠曠兮。秉意乎南山。通望乎東海。虹洞兮蒼天。極慮乎崖涘。流覽無窮。歸神日母。汨乘流而下降兮。或不知其所止。或紛紜其

流折兮。忽繆往而不來。臨朱汜而遠逝兮。中虛煩而益怠。莫離散而發曙兮。內存心而自持。於時澡概胸中。灑練五藏。澹澈手足。類濯髮齒。揄棄恬怠。輸寫澗濁。分決狐疑。發皇耳目。當是之時。雖有淹病滯疾。猶將伸偃起。蹙發警披。聳而觀望之也。況直眇小煩。懣醒醲病酒之徒哉。故曰發蒙解惑。不足以言也。太子曰善。然則濤何氣哉。客曰不記也。然聞於師曰。似神而非者三。疾雷聞百里。江水逆流。海水上潮。山出內雲。日夜不止。衍溢漂疾。波涌而濤起。其始起也。洪淋淋焉。若白鷺之下翔。其少進也。浩浩澄澄。如素車白馬。帷蓋之張。其波涌而雲亂。擾擾焉如三軍之騰裝。其旁作而奔起也。飄飄焉如輕車之勒兵。六駕蛟龍。附從太白。純馳浩蜺。前後絡繹。顛顛巧巧。据据彊彊。莘莘將將。壁壘重堅。沓雜似軍行。訇隱訇磕。軋盤涌裔。原不可當。觀其兩旁。則滂渤怫鬱。闔漠感突。上擊下律。有似勇壯之卒。突怒而無畏。蹈壁衝津。窮曲隨隈。踰岸出追。遇者死。當者壞。初發乎或圍之津。涯芟軫谷分。迴翔青篾。銜枚檀桓。弭節伍子之山。通厲胥母之場。凌赤岸。篳扶桑。橫奔似雷行。誠奮厥武。如震如怒。沌沌渾渾。狀如奔馬。混混庀庀。聲如雷鼓。發怒屋脊。清升踰躑。候波奮振。合戰於藉藉之口。鳥不及飛。魚不及迴。獸不及走。紛紛翼翼。波涌雲亂。蕩取南山。背擊北岸。覆虧邱陵。平夷西畔。險險戲戲。崩壞陂池。決勝乃罷。滄汨潺湲。披揚流灑。橫暴之極。魚鼈失勢。顛倒偃側。沈沈浚浚。蒲伏連延。神物怪疑。不可勝言。直使人踣焉。洄闊悽愴焉。此天下怪異詭觀也。太子能彊起觀之乎。太子曰。僕病未能也。

客曰。將爲太子奏方術之士有資略者。若莊周魏牟。楊朱墨翟。便娟詹何之流。使之論天下之精微。理萬物之是非。孔老覽觀。孟子持籌而算之。萬不失一。此亦天下要言妙道也。太子豈欲聞之乎。於是太子據

曹子建七啓八首○○文士語耳以意運遂欲抗手枚生

昔枚乘作七發。傅毅作七激。張衡作七辯。崔駰作七依。辭各美麗。余有慕之焉。遂作七啓。并命王粲作焉。元微子隱居太荒之庭。飛遜離俗。澄神定靈。輕祿傲貴。與物無營。耽虛好靜。羨此永生。獨馳思於天雲之際。無物象而能傾。於是鏡機子聞而將往說焉。駕超野之駟。乘追風之輿。經迴漠。出幽墟。入乎泱漭之野。遂屆元微子之所居。其居也。左激水。右高岑。背洞溪。對芳林。冠皮弁。被文裘。出山岫之潛穴。倚峻崖而嬉遊。志飄飄焉。嶢嶢焉。似若狹六合而隘九州。若將飛而未逝。若舉翼而中留。於是鏡機子攀葛藟而登。距巖而立。順風而稱曰。予聞君子不遜俗而遺名。智士不背世而滅勳。今吾子棄道藝之華。遺仁義之英。耗精神乎虛廓。廢人事之紀經。譬若畫形於無象。造響於無聲。未之思乎。何所規之不通也。元微子俯而應之曰。諱有是言乎。夫太極之初。渾沌未分。萬物紛錯。與道俱隆。蓋有形必朽。有跡必窮。茫茫元氣。誰知其終。名穢我身。位累我躬。竊慕古人之所志。仰老莊之遺風。假靈龜以託喻。寧掉尾於塗中。鏡機子曰。夫辯言之豔。能使窮澤生流。枯水發榮。庶感靈而激神。況近在乎人情。僕將爲吾子說游觀之至娛。演聲色之妖靡。論變化之至妙。敷道德之宏麗。願聞之乎。元微子曰。吾子整身倦世。探隱拯沉。不遠遐路。幸見光臨。將敬滌耳。以聽玉音。

鏡機子曰。芳菰精稗。霜蓄露葵。元熊素膚。肥象臙肌。蟬翼之割。剖纖析微。累如疊穀。離若散雪。輕隨風飛。刃不轉切。山鷄斥鷃。珠翠之珍。寒芳苓之巢。龜膾西海之飛鱗。臙江東之潛鼉。鴈滿南之鳴鶉。糝以芳酸。

甘和既醇。元冥適鹹。蓐收調辛。紫蘭丹椒。施和必節。滋味既殊。遺芳射越。乃有春清縹酒。康狄所營。應化則變。感氣而成。彈徵則苦發。叩宮則甘生。於是盛以翠樽。酌以彫觴。浮蟻鼎沸。酷烈馨香。可以和神。可以娛腸。此肴饌之妙也。子能從我而食之乎。元微子曰。予甘藜藿。未暇此食也。

鏡機子曰。步光之劍。華藻繁縟。飾以文犀。彫以翠綠。綴以驪龍之珠。錯以金山之玉。陸斷犀象。未足稱雋。隨波截鴻。水不漸刃。九旒之冕。散耀垂文。華組之纓。從風紛紜。佩則結綠懸黎。寶之妙微。符采照爛。流景揚輝。黼黻之服。紗縠之裳。金華之鳥。動趾遺光。繁飾參差。微鮮若霜。緝佩綢繆。或彫或錯。薰以幽若。流芳肆布。雍容閑步。周旋馳耀。南威爲之解顏。西施爲之巧笑。此容飾之妙也。子能從我而服之乎。元微子曰。予好毛褐。未暇此服也。

鏡機子曰。馳騁足用。蕩思游獵。可以娛情。僕將爲吾子。駕雲龍之飛駟。飾玉輅之繁纓。垂宛虹之長綏。抗招搖之華旌。捷忘歸之矢。乘繁弱之弓。忽躡景而輕驚。逸奔驥而超遺風。於是磔填谷塞。榛藪平夷。緣山置置。彌野張罟。下無漏跡。上無逸飛。鳥集獸屯。然後會圍。獠徒雲布。武騎霧散。丹旗耀野。戈爰皓旰。曳文狐。揜狡兔。捐鷓鴣。拂振鷺。當軌見藉。值足遇踐。飛軒電逝。獸隨輪轉。翼不暇張。足不及騰。動觸飛鋒。舉挂輕罾。搜林索險。探薄窮阻。騰山赴壑。風厲焱舉。機不虛發。中必飲羽。於是人稠網密。地逼勢脅。哮闕之獸。張牙奮鬣。志在觸突。猛氣不懼。乃使北宮東郭之疇。生抽豹尾。分裂獮肩。形不抗手。骨不隱拳。批熊碎掌。拉虎摧斑。野無毛類。林無羽羣。積獸如陵。飛翮成雲。於是駭鐘鳴鼓。收旌弛旃。頓網縱網。罷獠迴邁。駿駮齊驥。揚鑿飛沫。俯倚金較。仰撫翠蓋。雍容暇豫。娛志方外。此羽獵之妙也。子能從我而觀之乎。元微子曰。

予樂恬靜。未暇此觀也。

鏡機子曰。閑宮顯敞。雲屋皓旰。崇景山之高基。迎清風而立觀。彤軒紫柱。文棖華梁。綺井含葩。金犀玉箱。溫房則冬服絺綌。清室則中夏含霜。華閣緣雲。飛陛陵虛。覩眺流星。仰觀八隅。升龍攀而不逮。眇天際而高居。繁巧神怪。變名異形。般輪無所措其斧斤。離婁爲之失明。麗草交植。殊品詭類。綠葉朱榮。熙天曜日。素水盈沼。叢木成林。飛翮陵高。鱗甲隱深。於是逍遙暇豫。忽若忘歸。乃使任子垂釣。魏氏發機。芳餌沈水。輕繳弋飛。落翳雲之翔鳥。援九淵之靈龜。然後采菱花。擢水蘋。弄珠蚌。戲鮫人。諷漢廣之所詠。覲游女於水濱。耀神景於中沚。被輕縠之纖羅。遺芳烈而靖步。抗皓手而清歌。歌曰。望雲際兮有好仇。天路長兮往無由。佩蘭蕙兮爲誰修。燕婉絕兮我心愁。此宮館之妙也。子能從我而居之乎。元微子曰。予耽巖穴。未暇此居也。

鏡機子曰。旣遊觀中原。逍遙閑宮。情放志蕩。淫樂未終。亦將有才人妙伎。遺世越俗。揚北里之流聲。紹陽阿之妙曲。爾乃御文軒。臨洞庭。琴瑟交揮。左箎右笙。鐘鼓俱振。簫管齊鳴。然後姣人乃被文縠之華袿。振輕綺之飄飆。戴金搖之熠燿。揚翠羽之雙翹。揮流芳。耀飛文。歷盤鼓。煥續紛。長裾隨風。悲歌入雲。躡捷若飛。蹈虛遠蹠。凌躍超驥。蜿蟬揮霍。翔爾鴻翥。灑然鼻沒。縱輕體以迅赴。景追形而不逮。飛聲激塵。依違厲響。才捷若神。形難爲象。於是爲歡未溲。白日西頽。散樂變飾。微步中閨。元眉弛兮鉛華落。收亂髮兮拂蘭澤。形媚服兮揚幽若。紅顏宜笑。睇眄流光。時與吾子攜手同行。踐飛除。卽閑房。華燭爛。幄幙張。動朱唇。發清商。揚羅袂。振華裳。九秋之夕。爲歡未央。此聲色之妙也。子能從我而游之乎。元微子曰。予願清虛。未暇

此游也。

鏡機子曰。予聞君子樂奮節以顯義。烈士甘危軀以成仁。是以雄俊之徒。交黨結倫。重氣輕命。感分遺身。故田光伏劍於北燕。公叔畢命於西秦。果毅輕斷。虎步谷風。威懼萬乘。華夏稱雄。辭未及終。而元微子曰。善。鏡機子曰。此乃游俠之徒耳。未足稱妙也。若夫田文無忌之疇。乃上古之俊公子也。寓自皆飛仁揚義。騰躍道藝。游心無方。抗志雲際。凌轢諸侯。驅馳當世。揮袂則九野生風。慷慨則氣成虹蜺。吾子若當此之時。能從我而友之乎。元微子曰。予亮願焉。然方於大道有累如何。

鏡機子曰。世有聖宰。翼帝霸世。同量乾坤。等曜日月。元化參神。與靈合契。惠澤播於黎苗。威靈振乎無外。超隆平於殷周。踵羲皇而齊泰。顯朝惟清。王道遐均。民望如草。我澤如春。河濱無洗耳之士。喬岳無巢居之民。是以俊乂來仕。觀國之光。舉不遺才。進各異方。讚典禮於辟雍。講文德於明堂。正流俗之華說。綜孔氏之舊章。散樂移風。國富民康。神應休臻。屢獲嘉祥。故甘露紛而晨降。景星宵而舒光。觀游龍於神淵。聆鳴鳳於高岡。此霸道之至隆。而雍熙之盛際。然主上猶以沉思之未廣。懼聲教之未厲。采英奇於仄陋。宣皇明於巖穴。此甯子商歌之秋。而呂望所以投綸而逝也。吾子爲太和之民。不欲仕陶唐之世乎。於是元微子攘袂而興曰。韓哉言乎。近者吾子所述華淫。欲以厲我。祇攪予心。至聞天下穆清。明君莅國。覽盈虛之正義。知頑素之迷惑。令予廓爾。身輕若飛。願反初服。從子而歸。

張景揚七命八首

○采句阜境漸平夷回谿小

沖漠公子。含華隱曜。嘉遯龍盤。翫世高蹈。遊心於浩然。玩志乎衆妙。絕景乎大荒之遐阻。吞響乎幽山之

出蒼垠。天清冷而無霞。野曠朗而無塵。臨重岫而攬轡。顧石室而迴輪。遂適沖漠之所居。其居也。嶒嶸幽
藹。蕭瑟虛元。溟海渾濩。涌其後。嶰谷嘯嘈。張其前。尋竹疎莖。蔭其壑。百籟羣鳴。聳其山。衝飈發而迴日。飛
礫起而麗天。於是登絕巘。迺長風。陳辯惑之辭。命公子於巖中。曰。蓋聞聖人不卷道而背時。智士不遺身
而匿迹。生必耀華名於玉牒。歿則勒洪伐於金冊。今公子違世陸沉。避地獨竄。有生之歡滅。資父之義廢。
愁治百年。苦溢千歲。何異促鱗之游汀潭。短羽之棲翳蒼。今將榮子以天人之大寶。悅子以縱性之至娛。
窮地而遊。中天而居。傾四海之歡。殫九州之腴。鑽屈轂之瓠。解疏屬之拘。子欲之乎。公子曰。大夫不遺。來
萃荒外。雖在不敏。敬聽嘉話。

大夫曰。寒山之桐。出自太冥。含黃鐘以吐榦。據蒼岑而孤生。旣乃瓊巘嶒嶸。金岸崢嶸。左當風谷。右臨雲
谿。上無陵虛之巢。下無跣實之蹊。搖別峻。挺茗邈。茗嶢。晞三春之溢露。迺九秋之鳴飈。零雪寫其根。霏霜
封其條。木旣繁而後綠。草未素而先凋。於是構雲梯。陟崢嶸。剪蕤賓之陽柯。剖大呂之陰莖。營匠斲其榦。
伶倫均其聲。器舉樂奏。促調高張。音朗號鐘。韻清繞梁。追逸響於八風。采奇律於歸昌。啓中黃之少宮。發
蓐收之變商。若乃龍火西積。暄氣初收。飛霜迎節。高風送秋。羈旅懷士之徒。流宕百罹之疇。撫促柱則酸
鼻。揮危絃則涕流。若乃追清哇。赴巖節。奏綠水。吐白雪。激楚迴流。風結悲蕤。蕤之朝落。悼望舒之夕缺。瑩
嫠爲之擗。標孀老爲之嗚咽。王子拂纓而傾耳。六馬噓天而仰秣。此蓋音曲之至妙。子豈能從我而聽之
乎。公子曰。子病未能也。

大夫曰。蘭宮祕宇。彫堂綺櫺。雲屏爛汗。瓊壁青蔥。應門八襲。旋臺九重。表以百常之闕。圍以萬雉之墉。爾乃曉榭迎風。秀出中天。翠觀岑青。雕閣霞連。長翼臨雲。飛陞陵山。望玉繩而結極。承倒景而開軒。蘋素炳煥。析拱嵯峨。陰蚪負檐。陽馬承阿。錯以瑤英。鏤以金華。方疏含秀。圓井吐葩。重殿疊起。交綺對楹。幽堂晝密。明室夜朗。焦螟飛而生風。尺蠖動而生響。若乃目厭常玩。體倦帷幄。攜公子而雙游。時娛觀於林麓。登翠阜。臨丹谷。華草錦繁。飛采星燭。陽葉春青。陰條秋綠。華實代新。承意恣歡。仰折神籙。俯采朝蘭。迥惠風於蘅薄。眷椒塗於瑤壇。爾乃浮三翼。戲中泚。潛鯁駭。驚翰起。沉絲結。飛增理。挂歸翮於赤霄之表。出華鱗於紫淵之裏。然後縱棹隨風。弭楫乘波。吹孤竹。拊雲和。淵客唱淮南之曲。榜人奏采陵之歌。歌曰。乘鳧舟兮爲水嬉。臨芳洲兮拔雲芝。樂以忘戚。游以卒時。窮夜爲日。畢歲爲期。此蓋燕居之浩麗。子豈能從我而處之乎。公子曰。余病未能也。

大夫曰。若乃白商素節。月旣授衣。天凝地閉。風厲霜飛。柔條夕勁。密葉晨稀。將因氣以效殺。臨金郊而講師。爾乃列輕武。整戎剛。建雲鬣。啓雄芒。駕紅陽之飛鷲。驂唐公之驢驘。屯羽隊於外林。縱輕翼於中荒。爾乃布飛縲。張修罟。隄陵黃芩。挂青巒。畫長螯以爲限。帶流谿以爲關。旣乃內無疏蹊。外無漏跡。叩鉦數校。舉麾旌獲。設金機。馳鳴鏑。剪剛豪。落勁翮。車騎競驚。駢武齊轍。翁忽揮霍。雲迴風列。聲動響飛。形移景發。舉戈林竦。揮鋒電滅。仰傾雲巢。俯殫地穴。乃有圓文之狎。斑題之縱。鼓鬣風生。怒目電睨。口齧霜刃。足撥飛鋒。甌林蹶石。扣跋幽叢。於是飛黃奮銳。賁石逞技。蹙封豨。債馮豕。拉魑魍。挫獬廌。句爪摧鋸。牙捭瀾。漫狼藉。傾榛倒壑。殞茵挂山。僵踣掩澤。藪爲毛林。隰爲丹薄。於是徹圍頓網。卷旆收鳶。虞人數獸。林衡計鮮。論

最犒勤。息馬韜弦。肴駟連鑣。酒駕方軒。千鍾電醕。萬燧星繁。陵阜霑流膏。谿谷厭芳烟。歡極樂殫。迴節而旋。此亦田遊之壯觀。子豈能從我而爲之乎。公子曰。余病未能也。

大夫曰。楚之陽劍。歐冶所營。耶谿之鋌。赤山之精。銷踰羊頭。鑱越鍛成。乃鍊乃鑠。萬辟千灌。豐隆奮椎。飛廉扇炭。神器化成。陽文陰縵。流綺星連。浮彩豔發。光如散電。質如耀雪。霜鍔水凝。冰刃露潔。形冠豪曹。名珍巨闕。指鄭則三軍白首。麾晉則千里流血。豈徒水截蛟鴻。陸灑奔駟。斷浮翮以爲工。絕重甲而稱利。云爾而已哉。若其靈寶。則舒辟無方。爲鋒異模。形震辭燭。光駭風胡。價兼三鄉。聲貴二都。或馳名傾秦。或夜飛去吳。是以功冠萬載。威曜無窮。揮之者無前。擁之者身雄。可以從服九國。橫制八戎。爪牙景附。函夏承風。此蓋希世之神兵。子豈能從我而服之乎。公子曰。余病未能也。

大夫曰。天驥之駿。逸態超越。稟氣靈淵。受精皎月。眸闕黑照。元采紺發。沫如揮紅。汗如振血。秦青不能識其衆尺。方堙不能覩其若滅。爾乃巾雲軒。踐朝霧。赴春衢。整秋御。蚪踊螭騰。麟超龍翥。望山載奔。視林載赴。氣盛怒發。星飛電駭。志陵九州。勢越四海。影不及形。塵不暇起。浮箭未移。再踐千里。爾乃踰天垠。越地隔。過汗漫之所不游。躡章亥之所未迹。陽烏爲之頓羽。夸父爲之投策。斯蓋天下之雋乘。子豈能從我而御之乎。公子曰。余病未能也。

大夫曰。大梁之黍。瓊山之禾。唐稷播其根。農帝嘗其華。爾乃六禽殊珍。四膳異肴。窮海之錯。極陸之毛。伊公饔鼎。庖子揮刀。味重九沸。和兼芍藥。晨鳧露鷓。霜鷄黃雀。圓案星亂。方丈華錯。封熊之蹠。翰音之跖。鸞髀猩脣。髦殘象白。靈淵之龜。萊黃之鮐。丹穴之鸚。元豹之胎。燁以秋橙。醑以春梅。接以商王之箸。承以帝

辛之杯。范公之鱗。出自九溪。頰尾丹鰓。紫翼青鬢。爾乃命支離。飛霜鏗。紅肌綺散。素膚雪落。婁子之豪。不能廁其細。秋蟬之翼。不足擬其薄。繁肴旣闕。亦有寒羞。商山之果。漢皋之棧。析龍眼之房。剖椰子之殼。芳旨萬選。承意代奏。乃有荆南烏程。豫北竹葉。浮蟻星沸。飛華萍接。元石嘗其味。儀氏進其法。傾壘一朝。可以流湔。千日。箆醪投川。可使三軍告捷。斯神人之所歆。羨觀聽之所煒曄也。子豈能彊起而御之乎。公子曰。耽口爽之饌。甘腊毒之味。服腐腸之藥。御亡國之器。雖子大夫之所榮。故亦吾人之所畏。余病未能也。大夫曰。蓋有晉之融。皇風也。金華啓徵。大人有作。繼明代照。配天光宅。其基德也。隆於姬公之處。岐其垂仁也。富乎有殷之在亳。南箕之風。不能暢其化。離畢之雲。無以豐其澤。皇道煥炳。帝載緝熙。導氣以樂。宣德以詩。教清於雲官之世。治穆乎烏紀之時。王猷四塞。函夏謐寧。丹冥投烽。青徼釋警。却馬於糞車之轅。銘德於昆吳之鼎。羣萌反素。時文載郁。耕父推畔。魚豎讓陸。樵夫恥危冠之飾。輿臺笑短後之服。六合時邕。巍巍蕩蕩。元齡巷歌。黃髮擊壤。解羲皇之繩。錯陶唐之象。若乃華裔之夷。流荒之貊。語不傳於輶軒。地不被乎正朔。莫不駿奔稽顙。委質重譯。于時昆蛟感惠。無思不擾。苑戲九尾之禽。囿棲三足之鳥。鳴鳳在林。夥於黃帝之園。有龍游淵。盈於孔甲之沼。萬物烟燼。天地交泰。義懷靡內。化感無外。林無被褐。山無韋帶。皆象出於百工。兆發乎靈蔡。搢紳濟濟。軒冕藹藹。功與造化爭流。德與二儀比大。言未終。公子蹶然而興。曰。鄙夫固陋。守此狂狷。蓋理有毀之。而爭寶之。訟解。言有怒之。而齊王之疾痊。向子誘我以聾耳之樂。棲我以蔀家之屋。田游馳蕩。利刃駿足。既老氏之攸戒。非吾人之所欲。有靡得而應子。至聞皇風。載蹙時。聖道淳。舉實爲秋。摛藻爲春。下有可封之民。上有大哉之君。余雖不敏。請尋後塵。

何仲言七召○

大樸盡散。秀色可
飡。有句有摘。

假是先生負茲勁挺。狀羣飛之喪侶。似獨行之迷逕。神忽忽而若忘。意衝衝而不定。鑿丹綠其無主。聞鐘鼓以失聽。至乃冬霰積庭。空靡人聲。春花滿野。地無行者。園堵常閑。曲突無烟。同生芻之暫有。共死灰之曠然。篤論公子聞而崛起。雖道術之可忘。亦切磋之所恥。命徒御以絡繹。將有事於巖中。車煜爚而流水。馬泮渙以追風。乃踰汗漫。入蒙龍。至深潭之澳溟。有同室之穹崇。居隱磷而出沒。望嶽岑而下上。竹距石以斜通。水韻松以含響。地不寒而蕭瑟。日無雲而曠朗。於是整容投刺。屣履排門。揚眉就席。舉袂而言。曰。若五秀稟其生靈。六情通其愛惡。憎共集於鄙老。嗜同歸於美樂。今足下羣鳥獸以爲娛。處貧賤而不怍。欲擯實於孤介。乃貽譏乎隕穫。至乃喀喀死于道邊。替替填于溝壑。削松筆以畫虎。鼓鉛刀而刻鷓。身旣勞而不見。事何感而莫懲。欲模名于帶索。豈知命于泥繩。何異走長衢以避影。煎流水以求冰。今欲道足下以衛生之秘術。怡神之妙道。譬愈疫于寒植。同啓尸于仙草。寧願聞乎。先生曰。有爲之生已逼。無益之慮常勞。若見明于礙滯。幸求救于旨膏。

公子曰。千門始搆。百常洞啓。激洛開渠。疏山抗陞。延袤水陸。曠望東西。下臨江海。上屬雲霓。百丈杳冥。以飛跨。九層鬱律。以階梯。步三休而更迴。塗中宿而方迷。雕牆屈曲以交牙。網戶周流以重積。旣陰岑而影響。亦叫嘯而迴易。沙板金鋪。紫柱玉舄。煒煌燿絕。硃罨搏敵。圖雲霧之蔽虧。狀神仙之來往。璧璫自耀。珠綴恆響。蜉蝣動而書喧。熠燿飛而夜朗。旣臨下以寥沉。亦憑高而泱泱。聞疾雷於階陛。弄犇星於帷幌。亘以曲堂。周以洞房。北負連闈。南注長廊。綺疏交映。鏤檻相望。燕飛蓮井。日照杏梁。陽鳥騫其將動。雲鳳矯

而欲翔。若乃浚沼開源。延石崇壤。擬崑閬之巖岬。比滄溟之瀆澆。其中則有桂宮栢寢。吳臺柘館。複道耿介而連雲。阿閣穹隆而仰漢。望虬欄之映水。見丹鶴之出岸。豔草奇色。嘉樹珍名。長生靈壽。男華女貞。河柳垂葉。石榴發英。翫奇花之春滿。摘甘實于夏成。此實宮苑之壯麗。豈能從我而爲榮。先生曰。多言反道。辯口傷實。懼貽弊於蔀家。且自安乎容膝。

公子曰。銅旻玉井。金釜桂薪。六穀九鼎。百果千珍。熊蹯虎掌。雞跖猩唇。鱔魚兩味。元犀五肉。拾卵鳳巢。剖胎豹腹。三鬱甘口。七菹愜目。蒸餅十字。湯官五熟。海椒魯鼓。河鹽蜀薑。劑水火而調和。糝蘇菘以芬芳。崖脯追復而不盡。瀆魚稍割其無傷。黿羹流獸。蜆醬先嘗。鱸溫湖之美。蚶切丙穴之嘉。魴落俎霞散。逐刃飛揚。輕同曳鹽。白似飛霜。蕉有盈丈之名。桃表兼金之實。杏積魏國之貢。菱爲鉅野所出。衡曲黃梨。汶垂蒼栗。隴西白柰。湘南朱橘。荔枝沙棠。蒲萄石蜜。瓜稱素腕之美。棗有細腰之質。竝抗吻以除煩。亦咀牙而消疾。於是三雅陳席。百味開印。玉機星稀。蘭英縹潤。既夷志於坎壈。亦忘懷於鄙恡。此蓋滋旨之極珍。豈能從子而共進。先生曰。不貴媮食。寧甘醇酒。既深悟於腐腸。豈自迷於爽口。

公子曰。秦氏獨立。燕姝絕世。如短如長。不穠不細。信耳目之妖冶。乃古今之佳麗。妍姿豔逸。淑性閑華。效施顰於宋里。經墮馬於梁家。折纖腰以微步。呈皓腕乎輕紗。臨池正領。拂鏡看花。觀堵牆以颯沓。傾城國以誼譁。墨欲歸而抽軫。惠將返而迴車。至乃鄭衛繁聲。抑揚絕調。足使風雲變動。性靈感召。擊哀響則春臺之人。悵焉而雪泣。起歡情則崩城之婦。嫣然而微笑。嶰谷調鳳之竹。龍門獨鵠之柯。綠珠絳樹。宋子韓娥。青春婉婉。上客經過。開洞房以命賞。召才人而合宴。舉輕幔以徐來。隔珠簾而可見。牀披珍象。簾展羅

薦聽促柱之方調。聞簧聲之始轉。步想象以頓足。腕蹠連而拂面。托斜視於遺簪。寄含情而舉扇。俄而夕鳥東返。落日西懸。綺霞映水。蛾月生天。解鴛鴦之繡被。拂距蛩之長氈。燭羽帷而動爛。薰蕙帳而微烟。願橫施以自昵。脫斜領於君前。此乃聲色之妖蕩。將不從我而留連。先生曰。淫聲非篤論之旨。麗色本余情所棄。伐國不問仁人。此言從何而至。

公子曰。歲晚農休。時閑務隙。山火已燎。野霜初白。聊效殺於秋冬。乃從禽於草澤。蜀地五丁。齊國二子。氣動山漂。汗揮雨起。渥注流蘋。蘭池照血。躡飛影於未形。赴犇星於欲滅。革車隱隱。穀騎闐闐。鼓譟誼而振地。烝徒駭而聒天。割玉之刀。飲石之箭。置羅布其一目。罟網周其三面。犬號驤螭。鷹名奔電。暫離已合。忽隱仍見。赴迴超危。衝林跋援。草隨足起。山從眼轉。跨攝岡澗。電舉陵阪。鳥不及飛。獸不遑伏。旣前羈而後掎。亦左排而右蹴。蹶實駭而自救。騰虛亂而相撲。視灑血之丹地。見飛毛之暗目。傍窮刼勢。極搜求文皮。坐裂驕尾。生抽手羈。鐵頂足批。銅頭象折。牙而陵遽。貂拉齒而夷猶。擣高樓之度索。走大樹之神牛。雁聞弦而跼墮。猿抱木而啾啾。笑楚王之雲夢。恥漢帝之中流。此武才之矯猛。豈能從我而畋遊。先生曰。馳騁傷仁。好殺非勇。幸廣內之豐樂。何禽荒之足重。

公子曰。踐烏始照。宮槐遽而欲舒。顧兔纔滿。庭英紛而就落。譬光影於飛浮。比生靈於栖託。擾擾摩肩。麟麟方駕。立忱迫於毀譽。獨殷勤於用舍。嗟向有而今無。歎後榮而前謝。清歌雅舞。暫同於夢寐。廣廈高堂。俄成於幻化。若夫洗精服食。慕道遊仙。尋玉塵於萬里。守金竈於千年。三尸可度。九轉難傳。飛騰水陸。咀嚼靈元。若乃壁上真辭。枕中秘要。彈壓神鬼。吐納靈妙。旣變醜以成妍。亦反老而爲少。虬駕天矯而出沒。

霓裳颯沓而容與。按鷓馭於後乘。追鳳簫於前侶。雨散漫以霑服。雲霏微而襲宇。瞰芝闕以窈窕。見玉臺之相拒。蓋排烟而漸滅。旌拖風而未舉。值解佩於江濱。逢弄珠於漢渚。薄遊元圃。弭節太華。列神童於羽帳。侍玉女於僊車。澗探兮危實。苑拔兮迴花。聽弱水之晨浪。望崑山之夕霞。窮北辰而比壽。指中嶽以爲家。此神僊之恍惚。豈從我而蠲邪。先生曰。捕影之言莫測。繫風之論難盡。未嘗留意於死生。豈稍論於椿菌。

公子曰。洙泗遺文。鄒魯餘烈。其道未遠。其風不絕。方領圓冠。金口木舌。談章句之遠旨。搆紛綸之雅說。陳五禮。明六詩。貫穿微妙。辨析毫釐。既待問以重席。亦覃思而下幃。醞藉愷悌。和樂緝熙。生徒肅肅。賓友師師。竝接袵以聞道。俱援手而受辭。心絕內戰。事無外慾。橫經者比肩。擁箒者繼足。醜申韓之法。令陋桓文之風俗。六郡湊其衣冠。五陵窮其軌躅。信斯文其若水。實斯人之如玉。若夫珠璣產於蚌蛤。珪璧出於山淵。未有玉不瑩而爲寶。人無學而稱賢。蓋持身之管籥。進德之舟船。響似鐘而待叩。明似鏡而常懸。此見重於經術。寧降志於吾賢。先生曰。誠此言之甚美。比斯道之爲曠。恥見嘲於腐儒。豈求珍於席上。公子曰。我大梁之啓基。方邃古而無匹。先天定始。比殷周而餘裕。揖讓受終。考唐虞而不失。道德有序。憲章咸秩。六府孔修。百司盡畢。搜求儒雅。摛拾遺逸。盱食思治。雖聞之於昔談。味且臨朝。乃見之乎茲日。蕩蕩薰風。泱泱大典。道含宏而廣被。澤汪洋而傍闡。採輿人之片言。納匹夫之小善。事在微而畢照。物無憂而不顯。若夫下車布德。伐罪弔民。風無偃稼。雨不破塵。觀勝殘於朞月。見成俗於浹辰。含羣生兮如海。養萬類其猶春。鄉無豕食之隸。野靡狼顧之民。樵者目金而知恥。耕夫讓畔以成仁。何大庭之足競。豈粟陸

之動無天性。故能睦之以九世。齊之以七政。坦坦恢恢。巍巍赫赫。政德洽於霜風。教義窮於足迹。望雲氣而款關。候海水而重譯。所謂府不輟貢。史無虛帛。天瑞磊砢而相尋。地符氤氳而不少。收六穗於征賦。翫九莖於池沼。三足應感而來儀。一角知時而自擾。映景星於初月。聆鳳音於將曉。若乃亭毒不疵。合天地而竝施。陶鈞日月。與造化而齊功。故非言辭之可具。盡筆札之所能窮。懷真獨往之夫。犇走而從事。滅迹藏名之士。顛倒而向風。二漢有同於兒戲。魏晉無礙於胸中。言未畢。先生攝衣而起。曰。子前所說。似玉卮之無當。徒費辭而難領。譬由背日而視秋毫。却行而求鄢郢。一聞皇王之盛。則豁然神悟。而理據志無時。而可卷。邦有道而宜舒。敢以殘智。請從後車。

梁簡文帝七勵

○遂欲爭勝仲言。研選日工措注日陝。

藏名外臣。體道好異。遁跡埋影。剗心人事。任性于蓼水之側。放心于自得之場。情苞六合。德貫九方。巖栖谷飲。絕際濠梁。於是寂鏡公子。聞而往說。乃飛車翠蓋。翔駕絳螭。丹旌風轉。碧幔雪移。映玉軼之綺靡。照銀車之陸離。經九嶠之負阻。歷五曲之噴危。路入閩風。道經通谷。橋塗泱泱。路林蕭蕭。石磴穹窿。松關重復。羊腸望斷。邃路迂餘。攀林稅駕。乃遇藏名之所居。其居則蘚苔沒砌。幄葉斜林。千峯沓頂。萬仞懸深。南危碧流。北障芳林。左縈重陸。右背高岑。煙霞罩日。石澗籠陰。聲諧百籟。響弄千禽。寂鏡公子曰。蓋聞智者不懷道沒志。遺俗埋名。迷邦碎寶。却粒辭榮。今欲說子以默語之述。寧欲聞乎。藏名曰。僕雖幽栖。遠紆名德。寧忘潔己以受至言。

公子曰。夫怡情託體。實寄閑宮。跨危樓于插漢。挂日景於迎風。玩靈華於仙掌。度窈窕于飛虹。金枝照曜。玉璧玲瓏。文窗洞右。飛閣陵東。桂柱通光。雄梁亘日。璧鏡鈕懸。抽荷并出。中宿綿延。長廊周密。青錢碧影。金墀玉律。冬閨溫煦。夏室含霜。圖以珍怪。畫以禎祥。瓊茅秋蘼。綠蕙春香。植宜男於粉閣。樹君子于椒房。迴風烟于璇題。垂珠璣于玉箱。文魚水宿。錦鳥雲翔。乃登陟遊踐。望遠通疎。擢素藕于石鏡。攀蔓草于康衢。若荆山之琢玉。似隨水之弄珠。若斯宮之閑麗。子能與我而共居。外臣曰。僕游心蓬葦。未暇斯處。

公子曰。夫靚妝嚴服。託體必嘉。五絲擅美。獨璽稱華。組帷粲綵。緹服含葩。丹墀聚葉。縷檻飛花。至如稷下縫掖。泗上章甫。雉緝霜鮮。秦絲園縷。鳳色龍分。鴛文鷓聚。瑠紛瑤席。綺飾瓊珮。齊都滑石。南海瑇瑁。散似綴珠。離如並績。蜘蛛弄巧。越女調謳。夏則桃笙竹席。冬則青筩金鬚。溫麗瓊臺。密華承寢。當戶之穀。大文之錦。華蒲萄之綺衾。麗芬若之丹枕。金蘇翠帷。玉案象牀。子能從我。樂此芬芳。外臣曰。帶索披裘。自得山性。雕章麗服。未敢攸同。

公子曰。五飪調神。三芝輔性。用康仁壽。以宏貞正。乃使有伊之徒。調嘗鼎味。九州珍雜。八方豐貴。名兼天地之聲。殺竭山海之味。蟬鳴秋稻。燕頷玉精。離紅之脍。芍藥之羹。蒙山擅重。灌水傳聲。桂蠹石瓊。龍胎鳳肺。四膳八珍。五肉七菜。纍似穀雜。切均鮮繪。色若紫蘭。紛如紅綵。若乃越梅變實。楚醴方添。陳晨鳧之美。薦雉鷲之肥甜。洗以三危之露水。調以大夏之香鹽。霜薤沸烈。露葵繁舒。芳菰之菜。白霜之茹。澄瓊漿之素色。雜金筍之甘菹。素醪浮氣。鄙醪凝清。獻三爵之踰雅。等千日之芳醴。酌玉斗之英麗。照銀杯之輕蟻。此亦天下之美味。子能從我而享之乎。外臣曰。藜藿可膳。薇蕨堪飡。五味口爽。寧假玉盤。

律奏白雪之楚緩。陳亭蓆之吳疾。躍鳥追飛。潛魚伴出。將使漸離擊筑。雍門鼓琴。鳴繞梁之妙響。發愁眉之清音。至如五陵金穴。六郡豪家。表流歌于東夏。出秘舞于京華。金鈿設翠步搖。藏花遙同暮雨。逼似朝霞。髮鬢如點。纖腰成削。玉齒笑容。紅妝綽約。疾趨巧步。霧袖芬披。舒蛾眉之窈窕。委弱骨之逶迤。載金翠之婉嬋。珥瑤璫之陸離。芬芳于梧春之苑。灼爍于長洲之中。于時斜光西委。薄霧舒紅。隋珠照影。羅衣從風。觀者方堤。覩者盈淇。令二鸞之綴翼。使八鶴之增悲。明君爲之斂泣。西施爲之解眉。于是蘭閨寂晚。曲韻相和。對輕風之落景。望明月以清歌。歌曰。酣醕半兮樂旣陳。長歌促節綺羅人。拂鏡弄影情未極。迴簪轉笑思自親。此亦聲音之盡妙。子能從我而聽之乎。外臣曰。淫聲亂耳。未足入聽。方追山壑。永弄清泉。公子曰。夫心游百氏。理奧六經。樞機性道。陰陽窅冥。昭玉牒于年史。覽石記而照情。若夫鄒枚上客。揚馬俊人。揮金入趙。易服歸秦。賣舌彈劍。買義追仁。商權萬古。弋釣陶甄。池中水黑。席上稱珍。判二氣之氛氳。辨六爻之終始。鳥變龍工。鳳書雲紀。辭宏八索。辨崇三耳。至如范雎折脅。豫讓拉齒。禮竭忠心。報深國士。碎玉爭城。藏圖解劍。見碣石之金堤。望楚都之揚塹。美陳平之反間。揖子房之智謀。想秦君之傳器。仁漢后之解裘。此亦天下之奧籍。得性之林圃。子能同覽悅目。以齊此心。外臣于是色動清顏。頓解高意。曰。僕雖野陋。頗悅帶經。但負薪多疾。未甘斯說。

公子曰。夫氛氳構象。純雜不同。共工折柱。雖播英風。自古而然。曾何足道。但吹沙役寇。抑自羲年。吐霧藏妖。聞之堯日。至于今者。昌運天啓。握歷寶年。風猷駕層漢。道德漏重泉。至如元蹄外境。紫舌頑人。悖而無

禮不沫皇仁。于是騰三泉之宵漫。載五旗之飄揚。引玉車於西隴。鳴金鼓于北邙。拭龍泉之雄劍。瑩魏國之寶刀。銛踰巨闕。利擬豪曹。至如牽鈎壯氣。斗膽雄心。緣腰白玉。帶珮黃金。酬恩報死。剋遠長岑。驥裹白燕。耀躍青離。五玉察善。十相無遺。連腰錦帶。半足塵飛。標威于雁門之境。振旅于龍突之鄉。若乃驚沙絕岸。苦霧綿長。秋河曉碧。落蕙山黃。紅顏改素。元鬢斑霜。征夫抵掌而飲膳。壯士憤氣而沸腸。迴雲鳥之密陣。背却月而相望。旗纒轉而漂杵。鋒未至而驂傷。前鋒紛其易幟。後騎決其沙囊。何湯雪之能比。豈拾塵之可方。于是呼韓頓顙。龜茲銜璧。羊牽旣袒。熊山已積。九截同文。八極齊軌。帝曰念功。班茅賜履。青紫如拾。賞歸詔美。此天下之壯績。子能從我而效之乎。外臣曰。葛伯不祀。雖聞湯誥。野叟力弱。未敢振衣。公子曰。堯舜垂拱。煥彼前聞。今惟聖歷。萬代一君。璧儀照氣。玉井珠分。德合天地。道方華勳。滄海碧徹。黃河黛文。愛人育德。澤等春雲。宣尼茂典。周姬禮容。黃裳進士。清襟俊童。邦知改俗。國化移風。賣藥無藏名之老。河濱無洗耳之翁。德星夜映。慶雲晝色。異草雙條。靈禽北翼。狐尾旣九。茅脊復三。金船漾寶。銀甕呈甘。康歌壤笑。悅禮樞談。隆周謝德。盛漢知慚。慈照無礙。化湛靈覺。散滴宏淳。拯澆敦朴。國被仁壽。家欣教學。三明鑒道。六度宏風。出塵照苦。入冥觀空。善識無盡。因性必通。天不愛寶。地不隱瑞。百神受職。三苗奉義。石策紫泥。繩金玉刺。或託諷梁甫。權臥德而龍盤。或織箔涓涓。恥藏名而鳳跂。于是露點飴蜜。溜泓澄于玉掌。雲垂五采。覆旂旄于仙樓。漾醴泉于浪井。拂垂楊于御溝。或聯七葉。一姓五侯。外臣于是觀色內動。神貌外移。忽正山中而言曰。蓋聞幽居獨善。見譏往聖。儻不遺矇叟。亦願順來命。

七林閱麗。有章法。有句格。駢儷家之科律也。樞其利鈍。則枚叔語語用意。高不可企。陳思鬱伊。意內言外。非苟作者。景陽已病。蔓辭。而形容變化。不無深沈之思。繼此則斧藻而已。但後人運入雜文。便見遺

不厚不
賢不

駢體文鈔卷二十九

【連珠類】

揚子雲連珠

此體昉於韓非之內外儲說。淮南之說山。傅休奕謂連珠興於漢章帝之世。班固賈逵傅毅三子受詔作之。而藝文類聚所載有揚子雲恐非其實。

臣聞天下有三樂。有三憂焉。陰陽和調。四時不忒。年穀豐遂。無有夭折。灾害不生。兵戎不作。天下之樂也。聖明在上。祿不遺賢。罰不偏罪。君子小人各處其位。衆臣之樂也。吏不苟暴。役賦不重。財力不傷。安土樂業。民之樂也。亂則反焉。故曰三憂。

班孟堅連珠

臣聞聽決價而費玉者。無楚和之名。因近習而取士者。無伯王之功。故璵璠之爲寶。非黜僧之術也。伊呂之佐。非左右之舊。

臣聞鸞鳳養六翮以凌雲。帝王棄英雄以濟民。易曰。鴻漸于陸。其羽可以爲儀。

潘勗擬連珠

臣聞媚上以市利者。臣之常情。主之所患。忘身以憂國者。臣之所難。主之所願。是以忠臣背利而修所難。明主排患而獲所願。

陸士衡演連珠五十首

○ ○ ○ 熟讀深思
章局奧盡闢

臣聞日薄星迴穹天所以紀物山盈川冲后土所以播氣五行錯而致用四時遠而成歲是以百官恪居以赴八音之離明君執契以要克諧之會

臣聞任重於力才盡則困用廣其器應博則凶是以物勝權而衡殆形過鏡則照窮故明主程才以效業貞臣底力而辭豐

臣聞髦俊之才世所希乏邱園之秀因時則揚是以大人基命不擢才於后土明主聿興不降佐於昊蒼臣聞世之所遺未爲非寶主之所珍不必適治是以俊乂之藪希蒙翹車之招金碧之巖必辱鳳舉之使臣聞祿放於寵非隆家之舉官私於親非興邦之選是以三卿世及東國多衰弊之政五侯竝軌西京有陵夷之運

臣聞靈輝朝覲稱物納照時風夕灑程形賦音是以至道之行萬類取足於世大化既洽百姓無匱於心臣聞頓網探淵不能招龍振綱羅雲不必招鳳是以巢箕之叟不眇邱園之幣洗渭之民不發傅巖之夢臣聞鑑之積也無厚而照有重淵之深目之察也有畔而眦周天壤之際何則應事以精不以形造物以神不以器是以萬邦凱樂非悅鐘鼓之娛天下歸仁非感玉帛之惠

臣聞積實雖微必動於物崇虛雖廣不能移心是以都人冶容不悅西施之影乘馬班如不輟太山之陰臣聞應物有方居難則易藏器在身所乏者時是以充堂之芳非幽蘭所難繞梁之音實縈絃所思臣聞智周通塞不爲時窮才經夷險不爲世屈是以凌飈之羽不求反風耀夜之目不思倒日

臣聞忠臣率志。不謀其報。貞士發憤。期在明賢。是以柳莊黜殯。非貪瓜衍之賞。禽息碎首。豈要先茅之田。臣聞利眼臨雲。不能垂照。朗璞蒙垢。不能吐輝。是以明哲之君。時有蔽壅之累。俊乂之臣。屢抱後時之悲。臣聞郁烈之芳。出於委灰。繁會之音。生於絕絃。是以貞女要名於沒世。烈士赴節於當年。臣聞良宰謀朝。不必借威。貞臣衛主。修身則足。是以三晉之強。屈於齊堂之俎。千乘之勢。弱於陽門之哭。臣聞赴曲之音。洪細入韻。蹈節之容。俯仰依詠。是以言苟適事。精羸可施。士苟適道。修短可命。臣聞因雲灑潤。則芬澤易流。乘風載響。則音徽自遠。是以德教俟物而濟。榮名緣時而顯。臣聞覽影偶質。不能解獨。指迹慕遠。無救於遲。是以循虛器者。非應物之具。翫空言者。非致治之機。臣聞鑽燧吐火。以續陽谷之晷。揮翻生風。而繼飛廉之功。是以物有微而毗著。事有瑣而助洪。臣聞春風朝煦。蕭艾蒙其溫。秋霜宵墜。芝蕙被其涼。是故威以齊物。爲肅德以普濟。爲宏。臣聞巧盡於器。習數則貫。道繫於神。人亡則滅。是以輪匠肆目。不乏奚仲之妙。瞽叟清耳。而無伶倫之察。臣聞性之所期。貴賤同量。理之所極。卑高一歸。是以準月稟水。不能加涼。晞日引火。不必增輝。臣聞絕節高唱。非凡耳所悲。肆義芳訊。非庸聽所善。是以南荆有寡和之歌。東野有不釋之辨。臣聞尋煙染芬。薰息猶芳。徵音錄響。操終則絕。何則。垂於世者可繼。止乎身者難結。是以元晏之風。恆存。動神之化。已滅。

臣聞託閣藏形。不爲巧密。倚智隱情。不足自匿。是以重光發藻。尋虛捕景。大人貞觀。探心昭忒。臣聞披雲看霄。則天文清。澄風觀水。則川流平。是以四族放而唐劭。二臣誅而楚寧。

臣聞音以比耳爲美。色以悅目爲歡。是以衆聽所傾。非假北里之操。萬夫婉孌。非俟西子之顏。故聖人隨世以擢佐。明主因時而命官。

臣聞出乎身者。非假物所隆。牽乎時者。非克己所勗。是以利盡萬物。不能叡童昏之心。德表生民。不能救棲遑之辱。

臣聞動循定檢。天有可察。應無常節。身或難照。是以望景揆日。盈數可期。撫臆論心。有時而謬。

臣聞傾耳求音。眊優聽苦。澄心徇物。形逸神勞。是以天殊其數。雖同方不能分其感。理塞其通。則竝質不能共其休。

臣聞遜世之士。非受匏瓜之性。幽居之女。非無懷春之情。是以名勝欲。故偶影之操。矜窮愈達。故凌霄之節厲。

臣聞聽極於音。不慕鈞天之樂。身足於蔭。無假垂天之雲。是以蒲密之黎。遺時雍之世。豐沛之士。忘桓撥之君。

臣聞飛轡西頓。則離朱與矇瞍收察。懸景東秀。則夜光與璣珠匿耀。是以才換世則俱困。功偶時而竝勗。臣聞示應於近遠。有可察。託驗於顯微。或可包。是以寸管下僚。天地不能以氣欺。尺素逆立。日月不能以形逃。

臣聞絃有常音。故曲終則改。鏡無畜影。故觸形則照。是以虛己應物。必究千變之容。挾情適事。不觀萬殊之妙。

臣聞目無常音之察。耳無照景之神。故在乎我者。不誅之於己。存乎物者。不求備於人。

臣聞放身而居。體逸則安。肆口而食。屬厭則充。是以王鮪登俎。不假吞波之魚。蘭膏停室。不思銜燭之龍。臣聞衝波安流。則龍舟不能以漂。震風洞發。則夏屋有時而傾。何則。牽乎動。則靜凝。係乎靜。則動貞。是以淫風大行。貞女蒙冶容之誨。淳化殷流。盜跖挾曾史之情。

臣聞達之所服。貴有或遺。窮之所接。賤而必尋。是以江漢之君。悲其墜履。少原之婦。哭其亡簪。

臣聞觸非其類。雖疾弗應。感以其方。雖微則順。是以商飈漂山。不興盈尺之雲。谷風乘條。必降彌天之潤。故暗於治者。唱繁而和寡。審乎物者。力約而功峻。

臣聞煙出於火。非火之和。情生於性。非性之適。故火壯則煙微。性充則情約。是以殷墟有感物之悲。周京無佇立之跡。

臣聞適物之技。俯仰異用。應事之器。通塞異任。是以鳥棲雲而繳飛。魚藏淵而網沉。賁鼓密而含響。朗笛疏而吐音。

臣聞理之所守。勢所常奪。道之所閉。權所必開。是以生重於利。故據圖無揮劍之痛。義貴於身。故臨川有投迹之哀。

臣聞通於變者。用約而利博。明其要者。器淺而應元。是以天地之賾。該於六位。萬殊之曲。窮於五絃。臣聞圖形於影。未盡纖麗之容。察火於灰。不覩洪赫之烈。是以問道存乎其人。觀物必造其質。

臣聞情見於物。雖遠猶疎。神藏於形。雖近則密。是以儀天步晷。而修短可量。臨淵揆水。而淺深難察。臣聞虐暑熏天。不滅堅冰之寒。涸陰凝地。無累陵火之熱。是以吞縱之強。不能反蹈海之志。漂鹵之威。不能降西山之節。

臣聞理之所開。力所常達。數之所塞。威有必窮。是以烈火流金。不能焚景。沉寒凝海。不能結風。臣聞足於性者。天損不能入。貞於期者。時累不能淫。是以迅風陵雨。不謬晨禽之察。勁陰殺節。不凋寒木之心。

謝惠連連珠

蓋聞修己知足。慮得其逸。貪榮昧進。志忘其審。是以飲河滿腹。求安愈泰。綠木務高。畏下滋甚。

顏延年範連珠

蓋聞匹夫履順。則天地不違。一物投誠。則神明可交。事有微而愈著。理有闇而必昭。是以魯陽傾首。離光爲之反舍。有鳥沸波。河伯爲之不潮。

王仲寶暢連珠

蓋聞王佐之才。雖遠。豈必見采於當世。凌雲之氣。徒盛。無以自致於雲間。是以魏人捐玉於外野。和氏泣血於荆山。

沈休文連珠

臣聞鳴籟布響。非有志於要風。涓流長邁。寧厝心於歸海。是以萬竅怒號。不叩而咸應。百川是納。用卑而

爲宰

庾子山擬連珠四十四首

與哀江南賦相表裏

但敘身世無關理要連珠之別格也

蓋聞經天緯地之才拔山超海之力戰陣勇於風颯謀謨出乎胸臆斬長鯨之鱗截飛虎之翼是以一怒而諸侯懼安居而天下息

蓋聞蕭曹贊務雄略所資魯衛前驅威風所假是以黃池之會可以爭長諸侯鴻溝之盟可以中分天下蓋聞解封豕之結塞長蛇之源必須製裳千里唾血轅門是以開百里之圍用陳平之一策盟千乘之國須季路之一言

蓋聞得賢斯在不藉揮鋒股肱良哉無論應變是以屈倪參乘諸侯解方城之圍干木爲臣天下無西河之戰

蓋聞邯鄲已危徒思馬服薊城去矣空用荆軻是以竹杖扶危不能正武擔之石蘆灰縮水不能救宣房之河

蓋聞穴蟻衝泉未知遠慮元禽巢幕何能支久是以大廈旣焚不可灑之以淚長河一決不可障之以手蓋聞膏脣喋喋市井營營或以如簧自進或以狙詐相傾是以子貢使乎五都交亂張儀見用六國縱橫蓋聞謀猷是習權變須長時增齊竈或臥燕牆是以井陘之兵如鴻毛之遇火長平之卒若秋草之中霜蓋聞彼黍離離大夫有喪亂之感麥秀漸漸君子有去國之悲是以建章低昂不得猶瞻灞岸德陽淪沒

非復能臨偃師。

蓋聞市朝遷貿。山川悠遠。是以狐兔所處。由來建始之宮。荆棘參天。昔日長洲之范。

蓋聞天方薦瘥。喪亂宏多。空思說劍。徒聞枕戈。是以劉琨之英略。莫知自免。祖逖之慷慨。裁能渡河。

蓋聞穀林長遠。蒼梧不從。惟桐惟葛。無樹無封。是以隨珠日月。無益驪山之火。雀臺絃管。空望西陵之松。

蓋聞雷驚獸駭。電激風驅。陵歷關塞。枕跨江湖。是以城形月偃。陣氣雲鋪。非綠林之散卒。卽驪山之叛徒。

蓋聞死別長城。生離函谷。遼東寡婦之悲。代郡孀妻之哭。是以流慟所感。還崩杞梁之城。灑淚所沾。終變

湘陵之竹。

蓋聞三世用兵。旣非貽厥。陰謀累葉。必以凶終。是以李都尉之風霜。上蘭山而箭盡。陸平原之意氣。登河

橋而路窮。

蓋聞營魂不反。燐火宵飛。時遭獵夜之兵。或斃空亭之鬼。是以射聲營之風雨。時有冤魂。廣莫郡之陰寒。

偏多夜哭。

蓋聞江黃戎馬之徼。鄢郢風飄之格。乍有去而不歸。或無期而遠客。是以章華之下。必有思子之臺。雲夢

之傍。應多望夫之石。

蓋聞無怨生離。恩情中絕。空思出水之蓮。無復迴風之雪。是以樓中對酒。而綠珠前去。帳裏悲歌。而虞姬

永別。

蓋聞樹彼司牧。旣懸百姓之命。及乎厭世。復傾天下之心。是以一馬之奔。無一毛而不動。一舟之覆。無一

物而不沉。

蓋聞嚴霜之零。無所不肅。長林之斃。無所不標。是以楚塹既填。遊魚無託。吳宮已火。歸燕何巢。

蓋聞名高八俊。傷於闒豎之黨。智周三傑。斃于婦女之訐。是以洪澤之蛟。遂挫長饑之虎。平皋之蟻。能摧失水之龍。

蓋聞吳艘蜀艇。不能無水而浮。以紅間綠。不能無弦而射。是以籠樊之鶴。寧有六翮之期。骯髒之馬。無復千金之價。

蓋聞性靈屈折。鬱抑不揚。乍感無情。或傷非類。是以嗟怨之水。特結憤泉。感哀之雲。偏含愁氣。

蓋聞遷移白羽。流徙房陵。離家析里。悽恨撫膺。是以吳起之去西河。潸然出涕。荆軻之別燕市。悲不自勝。

蓋聞廉將軍之客館。翟廷尉之高門。盈虛倏忽。貴賤何論。是以平生故人。灌夫不去。門下賓客。任安獨存。

蓋聞執珪事楚。博士留秦。晉陽思歸之客。臨淄羈旅之臣。是以親友會同。無不撫懷。悽愴山河。雖異不妨。風月關人。

蓋聞五十之年。壯情久歇。憂能傷人。故其哀矣。是以譬之交讓。實半死而言生。如彼梧桐。雖殘生而猶死。

蓋聞秋之爲氣。惆悵自憐。耿恭之悲。疎勒班超之念。酒泉是以韓非客秦。避讒無路。信陵在趙。思歸有年。

蓋聞懸鶉百結。知命不憂。十日一炊。無時何恥。是以素王之業。乃東門之貧民。孤竹之君。實西山之饑士。

蓋聞胸中無學。猶手中無錢。今之學也。未見能賢。是以扶風之高鳳。無故棄麥。中牟之甯越。徒勞不眠。

蓋聞十室之邑。忠信在焉。五步之內。芬芳可錄。是以日南枯蚌。猶含明月之珠。龍門死樹。尙抱咸池之曲。

蓋聞百尺之高。累于九基之上。千鈞之重。懸于一木之枝。是以截虎尾而非險。傷龍鱗而未危。蓋聞居蘭處鮑。在其所習。白羽素絲。隨其所染。是以金性雖質。處劍卽凶。水德雖平。經風卽險。蓋聞豫章七年。斃于豐草。芳蘭九畹。淪于幽谷。是以欲求其真。晉陽有自理之蒿。若賞其聲。吳亭有已枯之竹。

蓋聞明鏡蒸食。未爲得所。干將補履。尤可傷嗟。是以氣足凌雲。不應止爲武騎。才堪王佐。不應直放長沙。蓋聞勢之所歸。威之所假。必能繫風捕影。暴虎馮河。是以輕則鴻毛沉水。重則磐石陵波。

蓋聞意氣難干。非資扛鼎。風神自勇。無待翹關。是以曹劌登壇。汶陽之田遽反。相如睨柱。連城之璧更還。蓋聞卷旄不死。誰必有心。甘焦自長。故知無節。是以螺蚌得路。恐異驪淵。雀鼠同歸。應非丹穴。

蓋聞北邙之高。魏君不能削。穀洛之鬪。周王不能改。是以愚公何德。遂荷鍤而移山。精衛何禽。欲銜石而塞海。

蓋聞君子無其道。則不能有其財。忘其貧。則不能恥其食。是以顏回瓢飲。賢慶封之玉杯。子思銀珮。美虞公之垂棘。

蓋聞水之激也。實濁其源。木之蠹也。將拔其根。是以延年之家。預論掃墓。羊舌之族。先知滅門。蓋聞磨礪唇吻。脂膏齒牙。陵風扇毒。向影吹沙。是以敬而遠之。豺有五子。吁可畏也。鬼有一車。

蓋聞虛舟不忤。令德無虞。忠信爲琴瑟。仁義爲庖廚。是以從莊生。則萬物自細。歸老氏。則衆有皆無。蓋聞三關頓足。長城垂翅。旣羈旣旅。非才非智。是以烏江艤檝。知無路可歸。白鴈抱書。定無家可寄。

承學之用。不外事理。駢驅辭夸。不能盡理。述之精微。事之曲折。乃爲談古者所鄙夷。庶有達者。識予卮言。

駢體文鈔卷三十

【牋牘類】

魏文帝與吳季重書

○繫拂有致

季重無恙。途路雖局。官守有限。願言之懷。良不可任。足下所治僻左。書問致簡。益用增勞。每念昔日南皮之游。誠不可忘。既妙思六經。逍遙百氏。彈碁間設。終以六博。高談娛心。哀箏順耳。馳騁北場。旅食南館。浮甘瓜于清泉。沉朱李于寒水。白日既匿。繼以朗月。同乘並載。以遊後園。輿輪徐動。參從無聲。清風夜起。悲笳微吟。樂往哀來。淒然傷懷。余顧而言。斯樂難常。足下之徒。咸以爲然。今果分別。各在一方。元瑜長逝。化爲異物。每一念至。何時可言。方今蕤賓紀時。景風扇物。天氣和暖。衆果具繁。時駕而游。北遵河曲。從者鳴笳。以啓路。文學托乘於後車。時同節異。物是人非。我勞如何。今遣騎到鄴。故使枉道相過。行矣自愛。

魏文帝與鐘大理書

書已似賦

丕白。良玉比德君子。珪璋見美詩人。晉之垂棘。魯之瓊璠。宋之結綠。楚之和璞。價越萬金。貴重都城。有稱疇昔。流聲將來。是以垂棘出晉。虞虢雙禽。和璧入秦。相如抗節。竊見玉書稱美玉。白如截肪。黑譬純漆。赤擬雞冠。黃侔蒸栗。側聞斯語。未覩厥狀。雖德非君子。義無詩人。高山景行。私所慕仰。然四寶邈焉已遠。秦漢未聞有良比也。求之曠年。不遇厥真。私願不果。飢渴未副。近日南陽宗會。叔稱君侯。昔有美珎。聞之驚喜。笑與抃會。當自白書。恐傳言未審。是以令舍弟子建。因荀仲茂。時從容喻鄙旨。乃不忽遺。厚見周稱。鄴

騎既到。寶玦初至。捧匣跪發。五內震駭。繩窮匣開。爛然滿目。猥以蒙鄙之姿。得覩希世之寶。不煩一介之使。不損連城之價。既有秦昭章臺之觀。而無蘭生詭奪之誑。嘉貺益腆。敢不欽承。謹奉賦一篇。以讚揚麗質。不白。

魏文帝與吳質書

○以感逝爲主。不立問架。自成章法。

二月三日。不白。歲月易得。別來行復四年。三年不見。東山猶歎其遠。況乃過之。思何可支。雖書疏往返。未足解其勞結。昔年疾疫。親故多離其災。徐陳應劉。一時俱逝。痛可言邪。昔日游處。行則連輿。止則接席。何曾須臾相失。每至觴酌。流行絲竹。並奏酒酣。耳熱。仰而賦詩。當此之時。忽然不自知樂也。謂百年已分。可長共相保。何圖數年之間。零落略盡。言之傷心。頃撰其遺文。都爲一集。觀其姓名。已爲鬼錄。追思昔游。猶在心目。而此諸子。化爲糞壤。可復道哉。觀古今文人。類不護細行。鮮能以名節自立。而偉長獨懷文抱質。恬淡寡欲。有箕山之志。可謂彬彬君子者矣。著中論二十餘篇。成一家之言。辭義典雅。足傳于後。此子爲不朽矣。德璉常斐然有述作之意。其才學足以著書。美志不遂。良可惜。間者。歷覽諸子之文。對之投淚。旣痛逝者。行自念也。孔璋章表。殊健。微爲繁富。公幹有逸氣。但未逾耳。其五言詩之善者。妙絕時人。元瑜書記翩翩。致足樂也。仲宣續自善于辭賦。惜其體弱。不足起其文。至于所善。古今無以遠過。昔伯牙絕絃于鍾期。仲尼覆醢于子路。痛知音之難遇。傷門人之莫逮。諸子但爲未及古人。自一時之雋也。今之存者。已不逮矣。後生可畏。來者難誣。恐吾與足下不及見也。年行已長大。所懷萬端。時有所慮。至通夜不瞑。志意何時復類昔日。已成老翁。但未白頭耳。光武言年三十餘。在兵中十歲。所更非一。吾德不及之。年與之。

少壯眞當努力。年一過往。何可攀援。古人思炳燭夜游。良有以也。頃何以自娛。頗復有所述造否。東望于邑。裁書敍心。丕白。

吳季重答魏太子牋

二月八日庚寅。臣質言奉讀手命。追亡慮存。恩哀之隆。形于文墨。日月冉冉。歲不與我。昔侍左右。廁坐衆賢。出有微行之游。入有管絃之權。置酒樂飲。賦詩稱壽。自謂可終始相保。並騁材力。效節明主。何意數年之間。死喪略盡。臣獨何德。以堪久長。陳徐劉應。才學所著。誠如來命。惜其不遂。可爲痛切。凡此數子。于雍容侍從。實其人也。若乃邊境有虞。羣下鼎沸。軍書輻至。羽檄交馳。于彼諸賢。非其任也。往者孝武之世。文章爲盛。若東方朔枚皋之徒。不能持論。卽阮陳之儔也。其唯嚴助壽王。與聞政事。然皆不慎其身。善謀于國。卒以敗亡。臣竊恥之。至于司馬長卿。稱疾避事。以著書爲務。則徐生庶幾焉。而今各逝。已爲異物矣。後來君子。實可畏也。伏惟所天。優游典籍之場。休息篇章之圃。發言抗論。窮理盡微。摛藻下筆。鸞龍之文。奮矣。雖年齊蕭王。才實百之。此衆議所以歸高。遠近所以同聲也。然年歲若墜。今質已四十二矣。白髮生鬢。所慮日深。實不復若平日之時也。但欲保身。敕行不蹈有過之地。以爲知己之累耳。游宴之歡。難可再遇。盛年一過。實不可追。臣幸得下愚之才。值風雲之會。時邁齒載。猶欲觸胸奮首。展其割裂之用也。不勝懷懷。以來命備悉。故略陳至情。實死罪死罪。略具姿致。

曹子建與吳季重書

○傲睨風刺

植白。季重足下。前日雖因常調。得爲密坐。雖讌飲彌日。其於別遠會稀。猶不盡其勞積也。若夫觴酌凌波。於前簫笳發音於後。足下鷹揚其體。鳳觀虎視。謂蕭曹不足儔。衛霍不足侔也。左顧右盼。謂若無人。豈非吾子壯志哉。過屠門而大嚼。雖不得肉。貴且快意。當斯之時。願舉泰山以爲肉。傾東海以爲酒。伐雲夢之竹以爲笛。斬泗濱之梓以爲箏。食若填巨壑。飲若灌漏卮。其樂固難量。豈非大丈夫之樂哉。然日不我與。曜靈急節。面有逸景之速。別有參差之闊。思欲抑六龍之首。頓羲和之轡。折若木之華。閉濛汜之谷。天路高邈。良無由緣。懷戀反側。如何如何。得所來訊。文采委曲。擘若春榮。瀏若清風。申詠反覆。曠若復面。其諸賢所著文章。想還所治。復申詠之也。可令熹事小史。諷而誦之。夫文章之難。非獨今也。古之君子。亦猶病諸家有千里驥。而不珍焉。人懷盈尺。和氏而無貴矣。夫君子而不知音樂。古之達論。謂之通而蔽。墨翟不好伎。何爲過朝歌。而迴車乎。足下好伎。而正值墨氏迴車之縣。想足下助我張目也。又聞足下在彼。自有佳政。夫求而不得者。有之矣。未有不求而得者也。且改轍而行。非良樂之御。易民而治。非楚鄭之政。願足下勉之而已矣。適對嘉賓。口授不悉。往來數相聞。曹植曰。

吳季重答東阿王書

○夸激不情之言。所謂強作周旋也。往還兩書。皆足以府怨。不如其已。

質白。信到。奉所惠貺。發函伸紙。是何文采之巨麗。而慰喻之綢繆乎。夫登東嶽者。然後知衆山之邈。池也。奉至尊者。然後知百里之卑微也。自旋之初。伏念五六日。至于旬時。精散思越。惘若有失。非敢羨龍光之休慕。猗頓之富誠。以身賤犬馬。德輕鴻毛。至乃歷元闕。排金門。升玉堂。伏虛檻于前殿。臨曲池而行觴。既威儀虧替。言辭漏渫。雖恃平原養士之懿。愧無毛遂擢穎之才。深蒙薛公折節之禮。而無馮諼三窟之效。

屢獲信陵虛左之德。又無侯生可述之美。凡此數者。乃質之所以憤積於胸臆。懷眷而情邑者也。若追前宴。謂之未究。欲傾海爲酒。舉山爲肉。伐竹雲夢。斬梓泗濱。然後極雅意。盡歡情。信公子之壯觀。非鄙人之所庶幾也。若質之志。實在所天。思投印釋轂。朝夕侍坐。鑽仲父之遺訓。覽老氏之要言。對清醕而不酌。抑嘉肴而不享。使西施出帷。嫫母侍側。斯盛德之所蹈。明哲之所保也。若乃近者之觀。實蕩鄙心。秦箏發徽。二八迭奏。塤簫激于華屋。靈鼓動于座右。耳嘈嘈于無聞。情踴躍于鞍馬。謂可北懾肅慎。使貢其楛矢。南震百越。使獻其白雉。又況權備。夫何足視乎。還治諷采。所著觀省英瑋。實賦頌之宗。作者之師也。衆賢所述。亦各有志。昔趙武過鄭。七子賦詩。春秋列載。以爲美談。質小人也。無以承命。又所答貺辭。醜義陋申之再三。赧然汗下。此邦之人。閑習辭賦。三事大夫。莫不諷誦。何但小吏之有乎。重惠苦言。訓以政事。惻隱之恩。形乎文墨。墨子迴車。而質四年。雖無德與民。式歌且舞。儒墨不同。固以久矣。然一旅之衆。不足以揚名步武之間。不足以騁跡。若不改轍易御。將何以效其力哉。今處此而求大功。猶絆良驥之足。而責千里之任。檻猿猴之勢。而望其巧捷之能者也。不勝見恤。謹附遣白答。不敢繁辭。吳質白。

曹子建與楊德祖書

○有波瀾
○有性情

植白。數日不見。思子爲勞。想同之也。僕少小好爲文章。迄至于今。二十有五年矣。然今世作者。可略而言也。昔仲宣獨步于漢南。孔璋鷹揚于河朔。偉長擅名于青土。公幹振藻于海隅。德璉發跡于北魏。足下高視于上京。當此之時。人人自謂握靈蛇之珠。家家自謂抱荆山之玉。吾王于是設天網以該之。頓八紘以掩之。今悉集茲國矣。然此數子。猶復不能飛軒絕跡。一舉千里。以孔璋之才。不閑于辭賦。而多自謂能與

司馬長卿同風。譬畫虎未成。反爲狗也。前有書嘲之。反作論盛道。僕讚其文。夫鍾期不失聽。于今稱之。吾亦不能妄歎者。畏後世之嗤余也。世人之著述。不能無病。僕嘗好人譏彈其文。有不善者。應時改定。昔丁敬禮常作小文。使僕潤飾之。僕自以才不過若人。辭不爲也。敬禮謂僕。卿何所疑難。文之佳惡。吾自得之。後世誰相知。定吾文者邪。吾常歎此達言。以爲美談。昔尼父之文辭。與人通流。至于春秋游夏之徒。乃不能措一辭。過此而言不病者。吾未之見也。蓋有南威之容。乃可以論于淑媛。有龍泉之利。乃可以議于斷割。劉季緒才不能逮于作者。而好詆訶文章。倚撫利病。昔田巴毀五帝。罪三王。皆五霸于稷下一旦。而服千人。魯連一說。使終身杜口。劉生之辨。未若田氏。今之仲連。求之不難。可無歎息乎。人各有好尚。蘭茝蓀蕙之芳。衆人所好。而海畔有逐臭之夫。咸池六莖之發。衆人所共樂。而墨翟有非之之論。豈可同哉。今往僕少小。所著辭賦。一通相與。夫街談巷說。必有可采。擊轅之歌。有應風雅。匹夫之思。未易輕棄也。辭賦小道。固未足以揄揚大義。彰示來世也。昔揚子雲先朝執戟之臣。猶稱壯夫不爲也。吾雖德薄。位爲蕃侯。猶庶幾戮力上國。流惠下民。建永世之業。留金石之功。豈徒以翰墨爲勳績。辭賦爲君子哉。若吾志未果。吾道不行。則將采庶官之實錄。辯時俗之得失。定仁義之衷。成一家之言。雖未能藏之于名山。將以傳之于同好。非要之皓首。豈今日之論乎。其言不慚。恃惠子之知我也。明早相迎。書不盡懷。植白。

楊德祖答臨淄侯牋

○措辭不匱。恍如面語。

修死罪死罪。不待數日。若彌年載。豈由愛顧之隆。使係仰之情深耶。損辱嘉命。蔚矣其文。誦讀反覆。雖諷雅頌。不復過此。若仲宣之擅漢表。陳氏之跨冀域。徐劉之顯青豫。應生之發魏國。斯皆然矣。至於修者。聽

徒謂能宣昭懿德。光贊大業而已。不復謂能兼覽傳記。留思文章。今乃含王超陳。度越數子矣。觀者駭視而拭目。聽者傾首而竦耳。非夫體通性達。受之自然。其孰能至於此乎。又嘗親見執事握牘持筆。有所造作。若成誦在心。借書於手。曾不斯須少留思慮。仲尼日月無得踰焉。修之仰望。殆如此矣。是以對鷗而辭。作暑賦。彌日而不獻。見西施之容。歸憎其貌者也。伏想執事不知其然。猥受顧錫。教使刊定。春秋之成。莫能損益。呂氏淮南。字值千金。然而弟子箝口。市人拱手者。聖賢卓犖。固所以殊絕凡庸也。今之賦頌。古詩之流。不更孔公風雅。無別耳。修家子雲。老不曉事。強著一書。悔其少作。若比仲山周旦之疇。爲皆有譽耶。君侯忘聖賢之顯迹。述鄙宗之過言。竊以爲未之思也。若乃不忘經國之大美。流千載之英聲。銘功景鐘。書名竹帛。斯自雅量素所蓄也。豈與文章相妨害哉。輒受所惠。竊備矇眊。誦詠而已。敢望惠施。以忝莊氏季緒。瓊瓊何足以云。反答造次。不能宣備。修死罪死罪。

吳季重在元城與魏太子牋

○沾漑後人探源國策

臣質言。前蒙延納。侍宴終日。曜靈匿景。繼以華燈。雖虞卿適趙。平原入秦。受贈千金。浮觴旬日。無以過也。小器易盈。先取沉頓。醒寤之後。不識所言。卽以五日到官。初至承前。未知深淺。然觀地形。察土宜。西帶恆山。連岡平代。北鄰柏人。乃高帝之所忌也。重以泚水。漸漬疆宇。喟然歎息。思淮陰之奇譎。亮成安之失策。南望邯鄲。想廉藺之風。東接鉅鹿。存李齊之流。都人士女。服習禮教。皆懷慷慨之節。包左車之計。而質闕弱。無以莅之。若乃邁德種恩。樹之風聲。使農夫逸豫於疆畔。女工吟詠於機杼。固非質之所能也。至於奉

遵科教。班揚明令。下無威福之吏。邑無豪俠之傑。賦事行刑。資於故實。抑亦懷懷有庶幾之心。往者嚴助。釋承明之歡。受會稽之位。壽王去侍從之娛。統東郡之任。其後皆克復舊職。追尋前軌。今獨不然。不亦異乎。張敞在外。自謂無奇。陳咸憤積。思入京城。彼豈虛談夸論。誑曜世俗哉。斯實薄郡守之榮。顯左右之勤也。古今一揆。先後不買焉。知來者之不如。今聊以當觀。不敢多云。質死罪死罪。

陳孔璋答東阿王牋

琳死罪死罪。昨加恩辱命。并示龜賦。披覽粲然。君侯體高世之才。秉青萍干將之器。拂鐘無聲。應機立斷。此乃天然異稟。非鑽仰者所庶幾也。音義既遠。清辭妙句。焱絕煥炳。譬猶飛兔流星。超山越海。龍驥所不敢追。況於駑馬。可得齊足。夫聽白雪之音。觀綠水之節。然後東野巴人。蚩鄙益著。載權載笑。欲罷不能。謹韞櫝玩耽。以爲吟頌。琳死罪死罪。亦是詔令。

陳孔璋爲曹洪與魏文帝書

○語搖筆有滑稽之意。故先後皆不爲莊語。而行文迅疾。旋起旋落。處可悟。

十一月五日。洪白。前初破賊。情侈意奢。說事頗過其實。得九月二十日書。讀之喜笑。把玩無厭。亦欲令陳琳作報。琳頃多事。不能得爲。念欲遠以爲歡。故自竭老夫之思。辭多不可一一。籠舉大綱。以當談笑。漢中地形。實有險固。四嶽三塗。皆不及也。彼有精甲數萬。臨高守要。一夫揮戟。萬人不得進。而我軍過之。若駭駭之。決細網。奔兕之觸魯縞。未足以喻其易。雖云王者之師。有征無戰。不義而彊。古今常有。故唐虞之世。蠻夷猾夏。周宣之盛。亦讐大邦。詩書歎載。言其難也。斯皆憑阻恃遠。故使其然。是以察茲地勢。謂爲中材處之。殆難倉卒。來命陳其妖惑之罪。敍王師曠蕩之德。豈不信然。是夏殷所以喪。苗扈所以斃。我之所以

年之征。文王有退修之軍。孟津有再駕之役。然後殪戎勝殷。有此武功。未有星流景集。飈奮霆擊。長驅山河。朝至暮捷。若今者也。由此觀之。彼固不逮下愚。則中才之守。不然明矣。在中才則謂不然。而來示乃以爲彼之惡稔。雖有孫田墨騫。猶無所救。竊又疑焉。何者。古之用兵。敵國雖亂。尙有賢人。則不伐也。是故三仁未去。武王還師。宮奇在虞。晉不加戎。季梁猶在。強楚挫謀。暨至衆賢奔紂。三國爲墟。明其無道。有人猶可救也。且夫墨子之守。縈帶爲垣。高不可登。折箸爲械。堅不可入。若乃距陽平。據石門。據八陣之列。騁奔牛之權。焉肯土崩魚爛哉。設令守無巧拙。皆可攀附。則公輸已陵宋城。樂毅已拔卽墨矣。墨翟之術。何稱田單之志。何貴老夫不敏。未之前聞。蓋聞過高唐者。効王豹之謳。遊睢渙者。學藻績之綵。間自入益部。仰司馬揚王遺風。有子勝斐然之志。故頗奮文辭。異於他日。怪乃輕其家邱。謂爲倩人。是何言歟。夫騷驥垂耳於坵牧。鴻雀戢翼於汚池。褻之者固以爲園囿之凡鳥。外廢之下乘也。及其整蘭筋。揮勁翮。陵厲清浮。顧盼千里。豈可謂其借翰於晨風。假足於六駮哉。恐猶未信。邱言必大噓也。洪白。

繁休伯與魏文帝牋

○入微語妙絕古今。遂乃抗手傳毅舞賦。然當時文士已開江孔狎客之風矣。

正月八日壬寅。領主簿欽死罪死罪。近屢奉牋。不足自宣。頃諸鼓吹。廣求異妓。時都尉薛訪車子。年始十四。能喉嚨引聲。與笳同音。白上呈見。果如其言。卽日故共觀試。乃知天壤之所生。誠有自然之妙物也。潛氣內轉。哀音外激。大不抗越。細不幽散。聲悲舊笳。曲美常均。及與黃門鼓吹。溫胡迭唱。迭和。喉所發音。無不響應。曲折沉浮。尋變入節。自初呈試。中間二句。胡欲傲其所不知。尙之以一曲。巧竭意匱。旣已不能。而

此孺子遺聲抑揚不可勝窮。優游轉化。餘弄未盡。暨其清激悲吟。雜以怨慕。詠北狄之遐征。奏胡馬之長思。淒入肝脾。哀感頑豔。是時日在西隅。涼風拂衽。背山臨溪。流泉東逝。同坐仰歎。觀者俯聽。莫不泣泣。涕悲懷慷慨。自左驥史。炳譽姐名倡。能識以來。耳目所見。僉曰詭異。未之聞也。竊惟聖體兼愛好奇。是以因賤先白委曲。伏想御聞。必含餘懽。冀事速訖。旋侍光塵。寓目階庭。與聽斯調。宴喜之樂。蓋亦無量。欽死罪死罪。

應德璉報龐惠恭書○

夫蕭艾之歌。發於中宿。子矜之思。起於嗣音。況實三載。能不有懷。雖萱草樹背。皋蘇在側。悒憤不逞。祇以增毒。朝隱之官。賓不往來。喬木之下。曠無休息。抱勞而已。足下剖符南面。振威千里。行人子羽。朝夕相繼。曾不枉咫尺之路。問蓬室之舊。過意賜書。辭不半紙。慰藉輕於繒綺。譏望重於邱山。是角弓之詩。所以爲刺也。值鷺羽於苑邱。騁駿足於株林。發明月之輝光。照姦人之窈窕。斯亦所以眩耳目之觀聽。亡聲命於知友者也。正爾徘徊不徒切直

應休璉與滿炳書○

璩白。昨者不遺猥見。照臨雖昔。侯生納顧於夷門。毛公受眷於逆旅。無以過也。外嘉郎君謙下之德。內幸頑才見誠。知己歡欣。踴躍情有無量。是以奔騁御僕。宣命周求。陽晝喻於詹何。楊倩說於范武。故使鮮魚出自潛淵。芳旨發自幽巷。繁俎綺錯。羽爵飛騰。牙曠高徽。義渠哀激。當此之時。仲孺不辭同產之服。孟公不顧尙書之期。徒恨宴樂始酣。白日傾夕。驪駒就駕。意不宜展。追惟耿介。迄于明發。適欲遣書。會承來命。

風肅穆。是京臺之樂也。得無流而不反乎。適有事務。須自經營。不獲侍坐。良增邑邑。因白不悉。諧婉出以

應休璉與廣川長岑文瑜書○

璉白。頃者炎旱。日更增甚。沙礫銷鑠。草木焦卷。處涼臺而有鬱蒸之煩。浴寒水而有灼爛之慘。宇宙雖廣。無陰以憩。雲漢之詩。何以過此。土龍矯首於元寺。泥人鶴立於闕里。修之歷旬。靜無徵效。明勸教之術。非致雨之備也。知恤下民。躬自暴露。拜起靈壇。勤亦至矣。昔夏禹之解陽盱。殷湯之禱桑林。言未發而水旋流。辭未卒而澤滂沛。今者雲重積而復散。雨垂落而復收。得無賢聖殊品。優劣異姿。割髮宜及。膚翦爪宜侵肌乎。周征殷而年豐。衛伐邢而致雨。善否之應。甚於影響。未可以爲不然也。想雅思所未及。謹書起予。

應璉白。二應傲然。有縱橫策士之遺風。

應休璉與侍郎曹長思書○

璉白。足下去後。甚相思想。叔田有無人之歌。闔閣有匪存之思。風人之作。豈虛也哉。王肅以宿德顯授。何曾以後進見拔。皆鷹揚虎視。有萬里之望。薄援助者。不能追參於高妙。復斂翼於故枝。塊然獨處。有離羣之志。汲黯樂在郎署。何武恥爲宰相。千載揆之。知其有由也。德非陳平。門無結駟之跡。學非楊雄。堂無好事之客。才劣仲舒。無下帷之思。家貧孟公。無置酒之樂。悲風起於閨闔。紅塵蔽於几榻。幸有袁生。時步玉趾。樵蘇不爨。清談而已。有似周黨之過閔子。夫皮朽者毛落。川涸者魚逝。春生者繁華。秋榮者零悴。自然

之歎。豈有恨哉。聊與大弟陳其苦懷耳。想還在近。故不益言。瓌白。尺幅有噴薄之勢。

應休璉與從弟君苗君胄書。○法然亦剽矣。銳入處可悟文。

瓌報問者北遊。喜歡無量。登芒濟河。曠若發矇。風伯掃途。雨師灑道。按轡清路。周望山野。亦既至止。酌彼春酒。接武茅茨。涼過大夏。扶寸肴修。味踰方丈。逍遙陂塘之上。吟詠苑柳之下。結春芳以崇佩。折若華以翳日。弋下高雲之鳥。餌出深淵之魚。蒲且讚善。便嬛稱妙。何其樂哉。雖仲尼忘味於虞韶。楚人流遜於京臺。無以過也。班嗣之書。信不虛矣。來還京都。塊然獨處。營宅濱洛。困於囂塵。思樂汶上。發於寤寐。昔伊尹輟耕。邗揮投竿。思致君於有虞。濟蒸人於塗炭。而吾方欲秉耒耜於山陽。沉鑄緡於丹水。知其不如古人遠矣。然山父不貪天下之樂。曾參不慕晉楚之富。亦其志也。前者邑人念弟無已。欲令州郡崇禮。師官授邑。誠美意也。歷觀前後。來入軍府。至有皓首猶未遇也。徒有飢寒駿奔之勞。俟河之清。人壽幾何。且宦無金張之援。遊無子孟之資。而圖富貴之榮。望殊異之寵。是隴西之遊。越人之射耳。幸賴先君之靈。免負擔之勤。追蹤丈人。畜雞種黍。潛精墳籍。立身揚名。斯爲可矣。無或遊言以增邑邑。郊牧之田。宜以爲意。廣開土宇。吾將老焉。劉桂二生。想數往來。朱明之期。已復至矣。相見在近。故不復爲書。慎夏自愛。瓌白。

陸士仁答從兄安成王書

奉告清言。溢目眷逮。周委炎光。已盛。願此勝宜。仰承發止。已次新林。引邁務殷。無妨怡賞。三湘奧區。九嶷形勝。浮洲動浪。聞眠鷗之舊說。安流洞浦。憶採石之遺風。昔景伯出蕃。高風振古。叔英之部。清約見稱。兄政譽平宣。威和兼濟。加以夏石奇雲。秋江迴月。翰飛紙落。理豐辭膩。賞未興餘。時希逮憶。睽離方遠。川途

修曠炎涼放改願加珍勗綠字可傳白雲終間心傷淚灑投筆無宣

陸士龍答車茂安書○

奇情蹴起在始皇一節敘風土語亦致工是爲有意爲文

雲白前書未報重得來況知賢甥石季甫當屈鄧令尊堂憂灼賢姊涕泣上下愁勞舉家慘感何可爾耶輒爲足下且說鄧縣土地之性非徒浮言華豔而已皆有實徵也縣去郡治不出三日直東而出水陸並通西有大湖廣縱千頃北有名山南有林澤東臨巨海往往無涯汎船長驅一舉千里北接青徐東洞交廣海物惟錯不可稱名遇長川以爲陂燔茂草以爲田火耕水種不煩人力決泄任意高下在心舉鍬成雲下鍬成雨既浸既潤隨時代序也官無逋滯之穀民無饑乏之慮衣食常充倉庫盈實榮辱既明禮節甚備爲君甚簡爲民亦易季冬之月收穫既畢嚴霜隕而蒹葭萎林鳥祭而麝羅設因民所欲順時游獵結罝繞堽密網彌山放鷹走犬弓弩亂發鳥不得飛獸不得逸真光赫之觀盤戲之至樂也若乃斷遏海浦隔截曲隈隨潮進退采蚌捕魚鱧鮪赤尾鰐齒比目不可紀名鱸鰠鰻炙製鱖烝石首臙鯨鯨真東海之俊味肴膳之至妙也及其蚌蛤之屬目所希見耳所不聞品類數百難可盡言也昔秦始皇至尊至貴前臨終南退燕阿房離宮別館隨意所居沈綸涇渭飲馬昆明四方奇麗天下珍玩無所不有猶以不如吳會也東鄉觀滄海遂御六軍南巡狩登稽嶽刻文石身在鄧縣三十餘日夫以帝王之尊不憚爾行季甫年少受命牧民武城之歌足以興化桑弧蓬矢丈夫之志經營四方古人所歎何足憂乎且彼吏民恭謹篤慎敬愛官長鞭朴不施聲教風靡漢吳以來臨此縣者無不遷變尊大人賢姊上下當爲喜慶歌舞相送勿爲慮也足下急啓喻寬慰具說此意吾不虛言也停及不一陸雲白

鮑明遠登大雷岸與妹書○

○嬌厲奇工足與行路難並美向嘗欲以比興求之所謂詩人之文也

吾自發寒雨。全行日少。加秋潦浩汗。山溪猥至。渡泝無邊。險徑游歷。棧石星飯。結荷水宿。旅客貧辛。波路壯闊。始以今日食時。僅及大雷。塗登千里。日踰十晨。嚴霜慘節。悲風斷肌。去親爲客。如何如何。向因涉頓。憑觀川陸。遨神清渚。流睇方曠。東顧五洲之隔。西眺九派之分。窺地門之絕景。望天際之孤雲。長圖大念。隱心者久矣。南則積山萬狀。爭氣負高。含霞飲景。參差代雄。凌跨長隴。前後相屬。帶天有匝。橫地無窮。東則砥原遠隰。亡端靡際。寒蓬夕卷。古樹雲平。旋風四起。思鳥羣歸。靜聽無聞。極視不見。北則陂池潛演。湖脈通連。芡蒿攸積。菰蘆所繁。棲波之鳥。水化之蟲。智吞愚彊。捕小號噪。驚聒紛物。乎其中。西則迴江永指。長波天合。滔滔何窮。漫漫安竭。創古迄今。舳艫相接。思盡波濤。悲滿潭壑。煙歸八表。終爲野塵。而是注集。長寫不測。修靈浩盪。知其何故哉。西南望廬山。又特驚異。基壓江湖。峯與辰漢。連接上常。積雲霞雕錦。縵若華夕。曜巖澤氣。通傳明散。赫似絳天。左右青靄。表裏紫霄。從嶺而上。氣盡金光。半山以下。純爲黛色。信可以神居帝郊。鎮控湘漢者也。若濼洞所積。溪壑所射。鼓怒之所。怒擊湧復之所。宕滌則上窮荻浦。下至狶洲。南薄燕瓜。北極雷澱。削長埤短。可數百里。其中騰波觸天。高浪灌日。吞吐百川。寫泄萬壑。輕煙不流。華鼎振滂。弱草朱靡。洪漣隴蹙。散渙長驚。電透箭疾。穹溘崩聚。坻飛嶺覆。回沫冠山。奔濤空谷。砥石爲之摧碎。碕岸爲之鑿落。仰視大火。俯聽波聲。愁魄脅息。心驚慄矣。至於繁化殊育。詭質怪章。則有江鷺海鴨。魚鮫水虎之類。豚首象鼻。芒鬚針尾之族。石蟹土蚌。燕箕雀蛤之儔。拼甲曲牙。逆鱗返舌之屬。掩沙漲被草渚。浴雨排風。吹澇弄翻。夕景欲沉。曉霧將合。孤鶴寒嘯。游鴻遠吟。樵蘇十歎。舟子再泣。誠足悲憂。不

書所親臨塗草盛辭意不周。

無語不工不及古人亦在此。

蕭子良與荊州隱士劉虬書。

繁于簡文靡于昭明然格調亦相出入。

玉燭登年金商在律災涼始賀動觀惟安勤味道腴幸遵雅尚豈不樂哉僕誠幸甚百姓一心衆生不疾比屋可封將又何求但良書獨擁善談無析願言之子實侮我心所以不遠千里尺書道意自淳清既辨澆漓代襲隱顯之術參差默語之途紛互或飾智以驚愚或激情以悟俗或穢己以闢通或謬歌以明道屠羊馭馬未足磷其堅佯狂如愚豈能緇其白官楚蕃魏人外之氣逾逸入漢游梁區中之韻彌少及摧其輕重品其得失則淵懷洞賞寧或符之僕夙養間襟長慕出槩迹塵珪組心逸江湖未面自親聞風如舊而迴駕之念徒軫式閭之禮無階固已佇軸深衷頃篋遐路者矣君矯然獨遠確乎難伐素志與白雲同悠高情與青松共爽宜習質文緇林枯而重葭昭辨空有連河壅而復滔所謂忘言之人可論天人之際豈能鳳舉鶴翻有心儀萃高逾愛海比策禪衢沾濠射之冥游屈祇鷺之法侶闡三乘於窮子發二諦於困蒙有是因也何其暢歟今皇風具穆至道宏被四海不溢五嶽無塵膠序肇修經法敷廣人賤璣璜家習禮讓樵蘇必時郊林全鬱罋網有節鱗羽偕翔至於層山絕澗環帶畿畎膏田沃野亘望無纏信可以招往隱淪棲集勝寄故文舉築室冶城之阿次宗植木西山之麓葛洪考槃於海岫釋遠肥遁於鍾幽每踐其遺蹤輒深九原之歎若高步可遷復何懷乎四子昔宣尼之見伯雪師利之往維摩豈不知相忘之道哉諒有以也未敘之間爲道自愛一二令凌居之口具

江文通與交友論隱書

淹者海濱窟穴。弋釣爲伍。自度非奇力異才。不足見開於諸侯。每承梁伯鸞臥於會稽之野。高伯達坐於華陰之山。心常慕之。而未能及也。嘗感子路之言。不拜官而仕。無青組紫紱。龜紐虎符之志。但欲史歷巫卜。爲世俗賤事耳。而影然十載。竟不免衣食之敗。何則。性有所短。不可韋弦者有五。一則體本疲緩。臥不肯起。二則人間應修。酷懶作書。三則賓客相對。口不能言。四則性甚畏動。事絕不行。五則愚婞妄發。輒被口語。有五短而無一長。豈可處人間耶。知短而不可易者。所謂輪椎分定也。猶如雞鶩之有毛。不能得鸞鳳之光采矣。況今年已三十。白髮雜生。長夜輾轉。亂憂非一。以溘至之命。如星殞天。促光半路。不攀長意。徒自欺取。筋驚髓冷。殊多災恙。心頑質堅。偏好冥默。旣信神農服食之言。久固天竺道士之說。守清淨煉神丹。心甚愛之。行善業。度一世。意甚美之。今但願拾薇藿。誦詩書。樂天理性。斂骨折步。不踐過失之地耳。猶以妻孥未奪。桃李須陰。望在五畝之宅。半頃之田。鳥赴簷上。水匝階下。則請從此隱。長謝故人。若乃登峨嵎。度流沙。殄金石。讀仙經。嘗聞其驗。非今日之所言也。誰謂難知。青鳥明之。貴布筆墨。然亦焉足道哉。

五短。頗規叔夜文體。不自結束。妻孥兩行。近人洪稚存學之。遂欲出藍。

梁昭明太子答湘東王求文集詩苑書○

得疏。知須詩苑英華。及諸文製。發函伸紙。閱覽無輟。雖事涉烏有。義異擬倫。而清新卓爾。殊爲佳作。夫文典則累野。麗則傷浮。能麗而不浮。典而不野。文質彬彬。有君子之致。吾嘗欲爲之。但恨未遑耳。觀汝諸文。殊與意會。至於此書。彌見其美。遠兼邃古。傍槩典墳。學以聚益。居焉可賞。吾少好斯文。迄茲無倦。譚經之

發鶯鳴和春泉生。暄風至陶嘉月而熙游。藉芳草而眺矚。或朱炎受謝。白藏紀時。金露夕流。金風時扇。悟秋士之心。登高而遠託。或夏條可結。睠於邑而屬詞。冬雪千里。覩紛霏而興咏。密親離則手爲心使。昆弟宴則墨以歡露。又愛賢之情。與時而篤。冀同市駿。庶匪畏龍。不追子晉。而事似洛濱之游。多愧子桓。而與同漳川之賞。漾舟元圃。必集應阮之儔。徐輪博望。亦招龍淵之侶。校覈仁義。源本山川。旨酒盈壘。嘉餚益俎。曜靈既隱。繼之以朗月。高春既夕。申之以清夜。並命連篇。在茲彌博。又往年因暇。搜採英華。上下數千年間。未易詳悉。猶有遺恨。而其書已傳。雖未爲精覈。亦粗足諷覽。集乃不工。而並作多麗。汝旣須之。皆遣送也。某啓。書牘至此。祇有麗華可采。

梁昭明太子與何胤書

措語婉弱。

園公道勝。漢盈屈節。春卿明經。孝莊北面。況乃義兼乎此。而顧揆不肖哉。但經途千里。眇焉莫因。何嘗不夢姑胥而鬱陶。想具區而杼柚。心往形留。於茲有年矣。方今朱明在謝。清風戒寒。想攝養得宜。與時休適。耽精義。味元理。息囂塵。玩泉石。激揚碩學。誘接後進。志與秋天競高。理與春泉爭溢。樂可言乎。樂可言乎。豈與口厭芻豢。耳聆絲竹者之娛。同年語哉。方今泰階端平。天下無事。修日養夕。差得從容。每鑽閱六經。汎濫百氏。研尋物理。顧略清言。旣以自慰。且以自警。而才性有限。思力匪長。熱疾憤其神。風眩弊其體。多慚過目。釋卷便忘。是以蒙求之懷。於茲彌軫。

梁簡文帝答徐摛書

山濤有言。東宮養德而已。但今與古殊。時有監撫之務。竟不能黜邪進善。少助國章。獻可替否。仰裨聖政。以此慚惶。無忘夕惕。馳驅五嶺。在戎十年。險阻艱難。備更之矣。觀夫全軀具臣。刀筆小吏。未嘗識山川之形勢。介冑之勤勞。細民之疾苦。風俗之嗜好。高閣之間。可來高門之地。徒重玉饌。羅前黃金。在握泥營粟。斯容與自烹。亦復言義軒已來一人而已。使人見此。良足長歎。簡脫。

梁簡文帝與蕭臨川書

○溥錦零機。把玩而已。

零雨送秋。輕寒迎節。江楓曉落。林葉初黃。登舟已積。殊足勞止。解維金闕。定在何日。八區內侍。厭直御史之廬。九棘外府。且息官曹之務。應分竹南川。剖符千里。但黑水初旋。未申十千之飲。桂宮既啓。復乖雙闕之宴。文雅縱橫。卽事分阻。清夜西園。眇然未尅。想征艫而結歎。望桂席而霑衿。若使宏農書疏。脫還鄴下。河南口占。儻歸鄉里。必遲青泥之封。且覲朱明之詩。白雲在天。蒼波無極。瞻之岐路。眷慨良深。愛護波潮。敬勗光彩。

梁簡文帝敕南康簡王薨上東宮啓

方當逸足長衢。克固蕃屏。而峯摧壁毀。一朝云及。綱兄弟各從王役。東守西撫。常願陪承甲館。同奉畫堂。預得西苑賦文。北場旅食。豈謂不幸。獨隔昭世。異林有悲。飛鳴斯切。伏惟陛下。愛睦恩深。從棣天篤。北海云亡。騎傳餘藁。東平告盡。驛問留書。嗚呼此恨。復在茲日。語似未完。前後當皆有佚文。

劉孝儀從弟喪上東宮啓

亡從弟遵。百行無點。千里立志。同氣三荆之友。假寢十起之慈。皆體之於自然。行之如俛拾。自碣宮陪晏。

皮書憶阮瑀。行經北館。歌悼子侯。不足輩此深仁。齊茲舊愛。

此有章法

陶宏景答謝中書書

山川之美。古來共談。高峯入雲。清流見底。兩岸石壁。五色交暉。青林翠竹。四時俱備。曉霧將歇。猿鳥亂鳴。夕日欲頽。沈鱗競躍。實是欲界之仙都。自康樂以來。未復有能與其奇者。

亦應尙有起訖

任彥升爲庾杲之與劉居士虬書○

自別荆南。迄將二紀。杲之牽滯形有。推遷勿保。丈人沒志外身。超然獨善。雖心路咫尺。而事阻山河。悠悠白雲。依然有道。金涼佇運。想恆納宜。冲明在襟。履候無爽。體道爲用。蹈理則和。杲之牽綴疲朽。愧心已多。訪德則山林杳然。觀道則風雲自遠。歲暮之期。指塗衡岳。神虛氣懋。無待怡和。江湖相望。安事行李。司徒竟陵王。茂於神者。言象所絕。接乎士者。遐邇所宗。鐘石非禮樂之本。纓褐豈朝野之謂。想關投之懷。不以形體爲阻。一日通籍梁邸。親奉話言。夢想清塵。爲歲已積。以丈人非羔雁所榮。故息蒲幣之典。勝寄冥通。諒有風期之遲。君王卜居郊郭。縈帶川阜。顯不絢功。晦不標迹。從容乎人野之間。以窮二者之致。且宏護爲心。廣孚真俗。思聞繫表。共剖衆心。妙域筵山河。虛館帶川涘。實望賁然。少酬側遲。昔東平樂善。旌君夫於東閣。今王愛素。致吾子於西山。豈不盛歟。百齡飄驟。凝滯自物。千載一朝。爲仁由己。且凌雪戒塗。非滅迹之郊。鴻鐘在御。豈銷聲之道。已標異人之迹。故有同物之勞。夫山水無情。應之以會。愛閑在我。觸目蕭條。衡岳何親。鍾嶺何薄。想宏思有在。不俟繁言。

巧麗出於自然

沈休文報博士劉杳書

生平愛嗜不在人中。林壑之權多與時奪。日暮塗殫。此心往矣。猶復少存間遠。激懷清曠。結宇東郊。匪云止息。政復頗寄夙心。時得休偃。仲長游居之地。休漣所述之美。望慕空深。何可髣髴。君愛素情多。惠以二贊。辭采妍富。事義畢舉。句韻之間。光影相照。便覺此地自然十倍。故知麗辭之益。其事宏多。輒當置之閣上。坐臥嗟覽。別卷諸篇。並爲名製。又山寺旣爲警策。諸賢從時復高奇。解頤愈疾。義兼乎此。遲比敝會。更共申析。任沈清英音如叩玉。

沈休文陳情書與徐勉

○酸咽如蠶。

吾弱年孤苦。傍無期屬。往者將墜於地。契闊屯遭。困於朝夕。崎嶇薄宦。事非爲己。望得小祿。傍此東歸。歲逾十稔。方忝襄陽縣公私情計。非所了具。以身資物。不得不任人事。永明末。出守東陽。意在止足。而建武肇運。人世膠加。一去不返。行之未易。及昏猜之始。王政多門。因此謀退。庶幾可果。託卿布懷於徐令。想記未忘。聖道聿興。謬逢嘉運。往志宿心。復成乖爽。今歲開元。禮年云至。懸車之請。事由恩奪。誠不能宏宣風政。光闡朝猷。尙欲討尋文簿。時議同異。而開年以來。病增慮切。當由生靈有限。勞役過差。總此凋竭。歸之暮年。牽策行止。努力祇事。外觀傍覽。尙似全人。而形骸力用。不相綜攝。常須過自束持。方可僴俛。解衣一臥。支體不復相關。上熱下冷。月增日篤。取煖則煩。加寒必利。後差不及。前差後劇。必甚前劇。百日數旬。革帶常應。移孔以手握臂。率計月小半分。以此推算。豈能支久。若此不休。日復一日。將貽聖主不追之恨。冒欲表聞。乞歸老之秩。若天假其年。還得平健。才力所堪。惟恩是策。

劉孝綽答湘東王書

綴辭平帖

伏承自辭皇邑。爰至荆臺。未勞刺舉。且擯高麗。近雖預觀尺錦。而不覩全玉。昔臨淄詞賦。悉與楊修。未殫寶筭。顧慚先哲。渚宮舊俗。朝衣多故。李固之薦二邦。徐珍之奏七邑。威懷之道。兼而有之。當欲使金石流功。恥用翰墨垂迹。雖乖知二。偶達聖心。爰是退居素里。却掃窮閭。比楊倫之不出。譬張摯之杜門。昔趙卿窮愁。肆言得失。漢臣鬱志。廣敍盛衰。彼此一時。擬非其匹。竊以文豹何辜。以文爲罪。由此而談。又何容易。故韜翰吮墨。多歷寒暑。旣闕子幼南山之歌。又微敬通渭水之賦。無以自同。獻笑少酬。褒誘且才。乖體物。不擬作於元根。事殊宿諾。寧怡懼於朱亥。顧已反躬。載懷累息。但瞻言漢廣。邈若天涯。區區一心。分宵九逝。殿下情白屋。存問相尋。食椹懷音。矧伊人矣。

謝幾卿答湘東王書

巧處不斲

下官自奉遠南浦。卷迹東郊。望日臨風。瞻言佇立。仰尋惠渥。陪奉遊宴。漾桂棹於清池。席落英於曾岨。蘭香兼御。羽觴競集。側聽餘論。沐浴元流。濤波之辯。懸河不足。譬春藻之辭。麗文無以匹。莫不相顧動容。服心勝口。不覺春日爲遙。更謂修夜爲促。嘉會難常。搏雲易遠。言念如昨。忽焉素秋。恩光不遺。善謔遠降。因事罷歸。豈云棲史闕匪商官史闕理就一廩。田家作苦。實符清誨。本乏金羈之飾。無假玉璧爲資。徒以老使形疎。疾令心阻。沈滯牀簟。彌歷七旬。夢幻俄頃。憂傷在念。竟知無益。思自祛遣。尋理滌意。卽以任命爲膏酥。擘鏡照形。翻以支離代萱樹。故得仰慕徽猷。永言前哲。鬼谷深棲。接輿高舉。遞名屠肆。發迹關市。其人緬邈。餘流可想。若令亡者有知。寧不縈悲元壤。恨隔芳塵。如其逝者可作。必當昭被光景。懽同遊豫。使夫一

介老圃得筵虛心末席去日已疎來侍未辱連劍飛鳧擬非其類懷私茂德竊用涕零

吳叔庠與施從事書

故鄣縣東三十五里有青山絕壁干天孤峯入漢綠嶂百重青崖萬轉歸飛之鳥千翼競來企水之猿百臂相接秋露爲霜春蘿被逕風雨如晦雞鳴不已信足蕩累頤物悟衷散賞談助

吳叔庠與顧章書造句

僕去月謝病還覓薜蘿梅溪之西有石門山者森壁爭霞孤峯限日幽岫含雲深溪蓄翠蟬吟鶴唳水響猿啼英英相雜緜緜成韻既素重幽居遂葺宇其上幸富菊華偏饒竹實山谷所資於斯已辦仁智所樂豈徒語哉

吳叔庠與朱元思書

風煙俱淨天山共色從流飄蕩任意東西自富陽至桐廬一百許里奇山異水天下獨絕水皆縹碧千丈見底遊魚細石直視無礙急湍甚箭猛浪若奔夾嶂高山皆生高樹負勢競上互相軒邈爭高直指千百成峯泉水激石泠泠作響好鳥相鳴嚶嚶成韻蟬則千轉不成猿則百叫無絕鳶飛戾天者望風息心經綸世務者窺谷忘反橫柯上蔽在晝猶昏疎條交映有時見日巧構形似助以山川

庾子山答趙王啓○

仰承張幕全韓連營上地澠池置陣解鄧禹之圍函谷開關削王元之印蜂旗朝上刁斗夜鳴彌雄壯士

將軍大樹已復花開。雲氣浮壘。流星泛枕。細舞長歌。橫簫直笛。當乎此時。青雲之上。信不學無術。本分泥沉。忽逢天造。搜揚仄陋。今者遂總憲司。預聞刊鼎。獻歲刑書。既應懸法。上春木鐸。方須狗人。但年髮已秋。性靈久竭。嘉石肺石。無以測量。舌端筆端。惟知繁擁。乖展一月。遂涉兩年。傾首東瞻。山河千里。風塵未盡。

霜露霑衣。仰願珍宜。以爲身寶。

藻績鮮華

庾子山答移市教

○詞事相副出唐人溫李輩往往竄僞矣

昔張楷碩儒。尙移宏農之市。官妙篆。猶致酒壚之客。况復德總郇周。聲高梁楚。希風慕義之士。舉袂成帷。臥轍反車之流。摩肩相接。遂使王充閱市之處。遠出荒郊。石苞販鐵之所。翻臨崖岸。聖德謙虛。未忘諠湫。欲令吹簫舞鶴。還反舊鄗。賣卜屠羊。請辭新闔。而交貿之黨。好留鹵岐之衆。難遣。

周宏讓與徐陵薦方圓書

○吾荷朝恩。得安邱壑。身名兩泰。夫復奚言。但願沐浴堯風。遨遊舜日。安服飽食。以送餘齒。然性靈未能灰弭。其間復須友生。言晤後來。英俊並出。方爲時生。林谷之中。鮮逢退逸。惟趙郡方圓。棲遲天目。年過強仕。不慕時榮。文史足用。學藝優敏。中歲暫游宛洛。蒙弟識異其人。方儲之允。衣冠未絕。雅奉閒逸。得性邱林。與吾朋遊。積有年歲。今復同在巖壑。畢志風雲。琴按清商。詩題空谷。比幽貞道缺。考槃絕詠。賁五履二兩。爰無聞方。今公且作輔。億兆攸賴。激貪懲競。儻自圓起。弟以搜揚佐世。水鏡求賢。脫能登此仄陋。綸言是屬。翹弓遠賁。則山谷咸勸。足令廉風復振。懦夫能立。豈不宏哉。圓若蒙此旌招。未必不鑿坏而遞於廊廟之用。脫不能賁然來思。而於退讓之道。於斯爲貴。恐弟未究東川人士。聊復起予。今言吾家上宰之貴。無

以微裨萬一。此舉脫復入聽。少得不負夙心。周宏讓白。充隱。數名。一時風尚。然文自朗朗。

徐孝穆答周處士宏讓書○

辱去年三月二十七日告。仰披華翰。甚慰翹結。承歸來天目。得肆閒居。差有弄玉之俱仙。非無孟光之同隱。優游俯仰。極素女之經文。升降盈虛。盡軒皇之圖藝。雖復考盤在阿。不爲獨宿。詎勞金液。唯飲玉泉。比夫煑石紛紜。終年不爛。燒丹辛苦。至老方成。及其得道冥真。何勞逸之相懸也。又承有方生。亦在天目。理當仰稟明師。總斯祕要。豈如張陵弟子。自墜高巖。孫泰門人。競投滄海。何其樂乎。聖朝虛心。版築尙想邱園。若彼能赴嘉招。便當謹申高命。但其人往歲。亦望至京師。觀此風神。確乎難拔。故以忘懷爵祿。詎持犧牲之談。高視公卿。獨騁蜡蠅之訓。所恐有道三辟。公車十徵。若斯者。終當不屈。此既然矣。請復詳言。昔楚國兩龔。同時紆組。漢陰二老。相攜抱甕。兄之幽貞。若其鑿坏。負石方同。形影結綬。彈冠無容。越楚。況乎糞土夔龍。羶臊名器。己所不欲。非應及人。忽承來音。良以多惑。何則。潁陽巢父。不曾令薦。許由。商洛園公。未聞求徵。綺季。斯所未喻。高懷而躊躇於矛楯也。唯遲山阿近信。更惠芳音。如或誠言。謹便聞奏。夙勞比劇。不復多呈。調笑中。文氣排宕。

徐孝穆與李邢書○從容抒寫。神骨甚清。

籍甚清名。常懷虛眷。山川緬邈。河渭象於經星。顧望風流。長安遠於朝日。青萋戒節。白露爲霜。君子惟宜。福履多豫。雍容廊廟。獻納便蕃。留使催書。駐馬成檄。車騎將軍。賓客盈座。丞相長史。瞻對有勞。脫惠箋繪。慰其翹想。吾棲遲茂陵之下。臥病漳水之濱。迫以崦嵫。難爲砭藥。平生壯意。竊愛篇章。忽覲高文。載懷勞

州大乘寺宜陽石像碑四首。鏗鏘並奏。能驚趙鞅之魂。輝煥相華。時瞬安豐之眼。山澤唵靄。松竹參差。若見三巖之峯。依然四皓之廟。甘泉鹵簿。盡在清文。扶風輦路。悉陳華簡。昔魏武虛帳。韓王故臺。自古文人。皆爲詞賦。未有登茲舊閣。歎此幽宮。標句清新。發言哀斷。豈止悲聞帝瑟。泣望羊碑。一詠歌梁之言。便掩盈懷之淚。至如披文相質。意致縱橫。才壯風雲。義深淵海。方今二乘斯悟。同免化城。六道知歸。皆踰火宅。宜陽之作。特會幽衿。所覩黃絹之詞。彌懷白雪之頌。但恨耆閣遠嶽。檀特高峯。開士羅浮。康公懸溜。不獲銘茲雅頌。耀彼幽巖。循環省覽。用忘飢渴。握之不置。恆如趙璧。翫之不足。同於玉枕。京師長者。好事才人。爭造蓬門。請觀高製。軒車滿路。如看太學之碑。街巷相填。無異華陰之市。但豐城兩劍。尙不俱來。韓子雙環。必希皆見。莫以好龍無別。木雁可嗤。載望瓊瑤。因乏行李。金風已勁。玉質宜調。書不盡言。但聞爻繫。徐陵頓首。

李那答徐陵書○

繁霜應管。能響豐山之鐘。元雲觸石。又動流泉之奏。矧伊物候。且或冥符。況乃衿期。相忘道術。楚齊風馬。吳會浮雲。行李無因。音塵不嗣。殷御正銜。命來歸。嘉言累札。江南橘茂。薊北桑枯。陰慘陽舒。行止多福。足下稽山竹箭。浙水明珠。海內風流。江南獨步。扶風計吏。議折祥禽。平陵孝廉。辨誦文豹。況復麗藻星鋪。雕文錦緝。風雲景物。義盡緣情。經綸憲章。辭殫表奏。久以京師紙貴。天下家藏。調移齊右之音。韻改河西之俗。豈直揚雲藻翰。獨留千金。嗣宗文雅。唯傳好事。僕世傳經術。才謝劉歆。家有賜書。學匪班嗣。弱年有意。

類愛雕蟲。歲月三餘。無忘肄業。戶牖之間。時安筆硯。嘖眉難巧。學步非工。恆經牧孺之譏。屢被陳思之誚。羞逢仲子。類居山之鼓琴。屢見予將。同本初之車服。不謂殷侯。虛談成價。遂同布鼓。輕嚮雷門。燕石空雕。終慚比德。楚軍雖拂。實愧棲桐。豈若邯鄲舉袖。唯聞變曲。協律飛塵。必應不顧。是以日南寶貝。遙望歸秦。合浦文犀。更希還漢。芳春行獻。鷺其鳴矣。懸豫章之牀。置長安之驛。厚築牆垣。思逢鄭僑之聘。工歌周頌。佇奏延陵之樂。書繪有復。道意無伸。李那頓首。工力悉敵。

王子淵與周處士書

嗣宗窮途。楊朱歧路。征蓬長逝。流水不歸。舒慘殊方。炎涼異節。木皮春厚。桂樹冬榮。想攝衛惟宜。動靜多豫。賢兄入關。敬承款曲。猶依杜陵之水。尙保池陽之田。鏟迹幽蹊。銷聲穹谷。何其愉樂。幸甚幸甚。弟昔因多疾。亟覽九仙之方。晚涉世途。常懷五嶽之舉。同夫關吏。物色異人。譬彼客卿。服膺高士。上經說道。屢聽元牝之談。中藥養神。每稟丹砂之說。頃年事逾盡。容髮衰謝。芸其黃矣。零落無時。還念生涯。繁憂總集。視陰愒日。猶趙孟之徂年。負杖行吟。同劉琨之積慘。河陽北臨。空思鞏縣。霸陵南望。還見長安。所冀書生之魂。來依舊壤。射聲之鬼。無恨他鄉。白雲在天。長離別矣。會見之期。邈無日矣。援筆攬紙。龍鍾橫集。情語可味。

周宏讓答王褒書

甚矣悲哉。此之爲別也。雲飛泥沈。金鑠蘭滅。玉音不嗣。瑤華莫因。家兄至自鎬。致書於穹谷。故人之跡。有如對面。開題申紙。流臉沾膝。江南燠熱。橘柚冬青。渭北沍寒。楊榆晚葉。土風氣候。各集所安。餐衛適時。寢興多福。甚善甚善。與弟分袂西陝。言反東區。雖保周陵。還依蔣徑。三姜離析。二仲不歸。麋鹿爲曹。更多悲

緒丹經在握。貧病莫諧。芝朮可求。恆爲採掇。昔吾壯日。及弟富年。俱值邕熙。並歡衡泌。南風雅操。清商妙曲。絃琴促坐。無乏名晨。玉瀝金華。冀獲難老。不虞一旦。翻覆波瀾。吾已悒陰。弟非茂齒。禽尙之契。各在天涯。永念生平。難爲胸臆。且次房遊。魂不反遠。產骸無託。但願愛玉。骸珍金箱。保期頤享。黃髮猶冀蒼鷹。頽鯉時傳尺素。清風朗月。俱寄相思。子淵子淵。長爲別矣。握管操觚。聲淚俱咽。斐然可裁。當時文體。

史世休答東宮啓○搔頭弄姿。

行人戾止。奉所賜況。恩紀綢繆。形於文墨。不悟飛雪增冰之地。忽載三陽。毳幙韋韞之鄉。俄聞九奏。精駭思越。莫知啓處。祥少不學。軍旅長遇。升平幸以先人緒餘。備職宿衛。懼驚塞無致遠之用。朽薄非折衝之材。豈欲追蹤古人。語其優劣。曩者王師薄伐。天人受脈。絕漠揚旌。威震海外。當此之時。猛將如雲。謀夫如雨。至若祥者。列於卒伍。預聞指蹤之規。得免逗遛之責。循涯揣分。實爲幸甚。爰以情喻。雷陳事方。劉葛信聖人之屈已。非庸人之擬議。何則。川澤之大。汙潦攸歸。松柏之高。蔦蘿斯託。微心眷眷。孟侯所知也。仰惟體元良之德。煥重離之暉。三善克修。萬邦以正。斯固道高周誦。契叶商皓。豈在管蠡。所能窺測。伏承監國多暇。養德怡神。咀嚼六經。逍遙百氏。追西園之愛客。眷南皮之出遊。疇昔之恩。無忘造次。祥自忝式遏。載罹寒暑。身在邊隅。情馳魏闕。每至清風夕起。朗月孤照。想鳴葭之啓路。思託乘於後車。塞表京華。山川悠遠。瞻望浮雲。伏增潛結。

祖鴻勳與陽休之書○有句可摘。頗病直致。

已涉纖俗。

陽生大弟。吾比以家貧親老。時還故郡。在本縣之西界。有雕山焉。其處閒遠。水石清麗。高巖四匝。良田數頃。家先有野舍於斯。而遭亂荒廢。今復經始。卽石成基。憑林起棟。蘿生映宇。泉流繞階。月松風草。綠庭綺合。日華雲實。傍沼星羅。簷下流煙。共霄氣而舒卷。園中桃李。雜椿柏而葱蒨。時一褰裳涉澗。負杖登峯。心悠悠以孤上。身飄飄而將逝。杳然不復自知在天地間矣。若此者久之。乃還所住。孤坐危石。撫琴對水。獨詠山阿。舉酒望月。聽風聲以興思。聞鶴唳以動懷。企莊生之逍遙。慕尚子之清曠。首戴萌蒲。身衣縑襪。出藝梁稻。歸奉慈親。緩步當車。無事爲貴。斯已適矣。豈必撫塵哉。而吾生旣繫名聲之韁鎖。就良工之劖劘。振佩紫臺之上。鼓袖丹墀之下。采金匱之漏簡。訪玉山之遺文。敝精神於邱墳。盡心力於河漢。摛藻期之聲繡。發議必在芳香。茲自美耳。吾無取焉。嘗試論之。夫崑峯積玉。光澤者前毀。瑤山叢桂。芳茂者先折。是以東都有挂冕之臣。南國有捐情之士。斯豈惡梁錦。好蔬布哉。蓋欲保其七尺。終其百年耳。今弟官位旣達。聲華已遠。象由齒斃。膏用明煎。旣覽老子谷神之談。應體留侯止足之逸。若能翻然清尚。解佩捐簪。則吾于茲山莊。可辦一得。把臂入林。挂巾垂枝。攜酒登巘。舒席平山。道素志。論舊款。訪丹法。語元書。斯亦樂矣。何必富貴乎。去矣。陽子。途乖趣別。緬尋此旨。杳然天漢已矣。哉。書不盡意。

劉孝標追答劉沼書○

劉侯旣重有斯難。值予有天倫之感。竟未之致也。尋而此君長逝。化爲異物。緒言餘論。蘊而莫傳。或有自其家得而示余者。余悲其音徽未沫。而其人已亡。青簡尙新。而宿草將列。泫然不知涕之無從也。雖隙駟不留。尺波電謝。而秋菊春蘭。英華靡絕。故存其梗概。更酬其旨。若使墨翟之言無爽。宣室之談有徵。冀東

平之樹。望咸陽而西靡。蓋山之泉。聞絃歌而赴節。但懸劍空壠。有恨如何。上道。

何仲言爲衡山侯與婦書○繡巧如翦
綵宮花

昔人遨遊洛汭。會遇陽臺。神女髣髴。有如今別。雖帳前微笑。涉想猶存。而幄裏餘香。從風且歇。掩屏爲疾。引領成勞。鏡想分鸞。琴悲別鶴。心如膏火。獨夜自煎。思等流波。終朝不息。始知萋萋萱草。忘憂之言不實。團團輕扇。合歡之用爲虛。路邇人遐。音塵寂絕。一日三秋。不足爲喻。弗陳往翰。寧寫款懷。遲枉瓊瑤。慰其杼柚。

庾子山爲上黃侯世子與婦書○氣舉
其辭

昔仙人導引。尙刻三秋。神女將梳。猶期九日。未有龍飛劍匣。鶴別琴臺。莫不銜怨而心悲。聞猿而下淚。人非新市。何處尋家。別異邯鄲。那應知路。想鏡中看影。當不含啼。欄外將花。居然俱笑。分杯帳裏。卻扇牀前。故是不思。何時能憶。當學海神。逐潮風而來往。勿如織女。待填河而相見。

伏知道爲王寬與婦義安主書○嬌嬈
欲語

昔魚嶺逢車。芝田息駕。雖見妖嬈。終成揮忽。遂使家勝陽臺。爲歡非夢。人慚蕭史。相偶成仙。輕扇初開。欣看笑靨。長眉始畫。愁對離妝。猶聞徒佩。顧長廊之未盡。尙分行幃。迴冀陌之難迴。廣攝金屏。莫令愁擁。恆開錦幔。速望人歸。鏡臺新去。應餘落粉。熏爐未徙。定有餘煙。淚滴芳衾。錦花長溼。愁隨玉軫。琴鶴恆驚。已覺錦水丹鱗。素書稀遠。玉山青鳥。仙使難通。綵筆試操。香牋遂滿。行雲可託。夢想還勞。九重千日。詎想倡家。單枕一宵。便如蕩子。當令照影。雙來一鸞。羞鏡勿使窺窗。獨坐嫦娥。笑人六朝小啓
五代填詞

王元長謝竟陵王示扇啓

竊以六翮風流。五明氣重。若比圓綃。有兼玩寶。輕踰雪羽。潔並霜文。子淑賞其如規。班姬佩之明月。豈直魏王九華。漢臣百綺。況復動製聖衷。垂言炯戒。載摹聽眎。式範樞機。

王元長謝武陵王賜弓啓

殿下摛藻蕙樓。暢藝蘭苑。啓積玉於風筵。疊連珠於月的。兔園掩秀。鄴水慚奇。融揖讓未工。濫陪升飲之賞。操弧反正。繆奉招賢之錫。文韜鏤景。逸幹稍雲。玩溢百齡。佩流千載。

謝元暉謝隨王賜紫梨啓

味出靈關之陰。旨珍玉津之澁。豈徒真定歸美。大谷慚滋。將恐帝臺妙棠。安期靈棗。不得孤擅玉盤。獨甘仙席。雖秦君傳器。漢后推粲。望古可儔。於今何答。

謝元暉謝隨王賜左傳啓

昭晰殺青。近發中汗。恩勸挾冊。慈勗下帷。眺未睹山笥。早憎河籍。業謝專門。說非章句。庶得既困而學。括羽瑩其蒙心。家藏賜書。籙金遺其貽厥。披覽神勝。吟諷知厚。

昭明太子謝勅賚水犀如意啓

臣統啓。應勅左右伯佛掌。奉宣勅旨。垂賚水犀如意一柄。式是道義所須。白玉照彩。方斯非貴。珊瑚挺質。匹此未珍。雕削旣成。先被庸薄。如蒙漢帝之簪。似獲趙堯之印。謹仰承威神。陳諸講席。方使歡喜羅漢。懷棄鉢之嗟。王式碩儒。忻驪駒之辨。熊飾寶刀。子桓惡其大賚。犛牛輕拂。張敞慚其舊儀。殊恩特降。伏深荷

躍不任下情。謹啓事謝聞。謹啓。

昭明太子謝勅賚制大涅槃經講疏啓

臣統啓。後閣應勅木佛子奉宣勅旨。垂賚制旨大涅槃經講疏一部十卷。合目百一卷。寒鄉覩日。未足稱奇。探藥逢仙。曾何驚喜。臣伏以六爻所明。至邃窮于幾象。四書所總。施命止于域中。豈有牢籠因果。辨斯寶城之教。網羅真俗。開茲月滿之文。方當道洽大千。化均百億。雲彌識種。雨遍身田。豈復論唐帝龜書。周王策府。何待刊寢孟津。屏黜邱索。甘露妙典。先降殊恩。揣已循愚。不勝慶荷。不任頂戴之至。謹奉啓。

昭明太子十二月啓

伏以北斗周天。送元英之故節。東風拂地。啓青陽之芳辰。梅花舒兩歲之裝。柏葉汎三光之酒。飄飆餘雪。入簫管而成歌。皎潔清冰。對蟾光而寫鏡。敬想足下。神游書帳。性縱琴堂。談叢發流水之源。筆陣引崩雲之勢。昔時文會。長思風月之交。今日言離。永歎參商之隔。但某執鞭賤品。耕鑿庸流。沈形南畝之間。滯迹東臯之上。長懷盛德。聊吐愚衷。謹憑黃耳之傳。佇望白雲之信。正月太簇伏以節應佳辰。時登令月。和風拂迥。淑氣浮空。走野馬于桃源。飛少女于李徑。花明麗月。光浮竇氏之機。鳥弄芳園。韻響王喬之館。敬想足下。優游泉石。放曠煙霞。尋五柳之先生。琴尊雅興。謁孤松之君子。鸞鳳騰翔。成萬世之良規。實百年之令範。但某席戶幽人。蓬門下客。三冬勤學。慕方朔之雄才。萬卷常披。習鄭元之逸氣。旣而風塵頓隔。仁智並乖。非無衰侶之憂。誠有離羣之恨。謹伸數字。用寫寸誠。夾鐘二月伏以景逼徂春。時臨變節。啼鶯出谷。爭傳求友之音。翔葉飛林。競散佳人之靨。魚游碧沼。疑呈遠道之書。燕語雕梁。狀對幽閨之語。鶴帶雲而成蓋。遙籠

大夫之松。虹跨澗以成橋。遠現美人之影。對茲節物。寧不依然。敬想足下。聲馳海內。名播雲間。持郭璞之
毫鸞詞。場月白。吞羅含之彩鳳。辯囿日新。某山北逸人。牆東隱士。龍門退水。望冠冕以何年。鷓路頽風。志
簪纓于幾載。既違語默。且阻江湖。聊寄八行之書。代申千里之契。姑洗三月節屆朱明。晷鍾丹陸。依依聳蓋。俱
臨帝女之桑。鬱鬱丹城。並挂陶潛之柳。梅風拂戶。牖之內。麥氣擁宮。闕之前。敬思足下。聲聞九皋。詩成七
步。涵蚌胎于學海。卓爾超羣。蘊鵲抵于文山。儼然孤秀。但某窮塗異縣。岐路他鄉。非無阮籍之悲。誠有楊
朱之泣。每遇秋風。振響鶉鷩。子夏之衣。夜月流輝。鵲繞將軍之樹。既乖連璧之契。終隔斷金之情。中心藏
之。卑誠至矣。今因去雁。聊寄芻蕘。如遇回鱗。希垂玉翰。中呂四月麥隴移秋。桑津漸暮。蓮花汎水。豔如越女之
顛。蘋葉漂風。影亂秦臺之鏡。炎風以之扇戶。暑氣于是盈樓。凍雨洗梅樹之中。火雲燒桂林之上。敬想足
下。追涼竹徑。托蔭松間。彈伯牙之素琴。酌嵇康之綠酒。縱橫流水。酩酊頽山。實君子之佳游。乃王孫之雅
事。某沈疴漳浦。臥病泉山。頓懷劉幹之勞。鎖抱相如之酷。是知枯榮莫測。生死難量。驗風燭之不停。如水
泡之易滅。聊伸弊札。以代勞人。佇覩芳詞。希垂愈病。蕤賓五月三伏漸終。九夏將謝。螢飛腐草。光浮帳裏之書。
蟬噪煩柯。影入機中之鬢。濯枝遷而潦溢。芳槿茂而發榮。山土焦而流金。海水沸而漂燦。敬想足下。藏形
月府。遁跡冰牀。披莊子之七篇。逍遙物外。玩老氏之兩卷。恍惚懷中。但某白社狂人。青紉末學。不從州縣
之職。聊立松篁之間。時假德以爲鄰。或借書而取友。三千年之獨鶴。暫逐雞羣。九萬里之孤鵬。權潛燕侶。
既非得意。正可忘言。諸不具伸。應俟來會。林鐘六月素商驚辰。白藏屆節。金風曉振。偏傷征客之心。玉露夜凝。
直。茲仙人之掌。桂吐花于小山之上。梨翻葉于大谷之中。故知節物變衰。草木搖落。敬想足下。時稱獨步。

世號無雙。萬頃澄波。黃叔度之器量。千尋聳幹。嵇中散之楷模。但某一介庸才。三隅頑學。懷經問道。不遇披雲負笈。尋師罕逢。見日俛仰興歎。形影自憐。不知龍前。不知龍後。鸞鵬雖異。風月是同。幸矣擇交。希垂影拂。夷則七月一歎分飛。三秋限隔。遐思盛德。將何以伸。白雲斷而音信稀。春山暝而江湖遠。敬想足下羽儀勝瞻。領哀嘉賓。傾玉醕于風前。弄瓊駒于月下。但某登山失路。涉海迷津。聞猿嘯而寸寸斷腸。聽雁聲而雙雙下淚。當以黃花笑冷。白羽悲秋。既傳蘇子之書。更汎陶公之酌。聊因三鳥。略敘二難。而會取書不能盡述。或叨鳳念。不黜魚緘。南呂八月宿昔親朋。平生益友。不謂窮通有分。雲雨將乖。既深伐木之聲。更問采葵之詠。屬以重陽。變鼓節景。窮秋霜抱樹。而擁柯。風拂林。而下葉金堤。翠柳帶星采。而均調。紫塞蒼鴻。追風光而結陣。敬想足下秀標東箭。價重南金。才過吞烏之聲。德邁懷蛟之智。但某衡門賤士。甕牖微生。既無白馬之談。且乏碧雞之辯。歎分飛之有處。嗟會面之無期。聊伸布服之言。用述併糧之志。無射九月節屆元靈。鐘應陰律。愁雲拂岫。帶枯葉以飄空。朔氣浮川。映危樓而疊迴。胡風起。截耳之凍。趙日興。曝背之思。敬想足下。山岳鍾神。星辰挺秀。潛明晦跡。隱於朝市之間。縱法化人。不混鄉閭之下。某陋巷孤游。穿牆自活。終朝息爨。若孔子之爲貧。竟日停炊。如范生之在職。牛衣當被。畏見王章。犢鼻親操。恐逢犬子。雖此慚賤。而不羞貧。綺服有時。此言何述。應鐘十月日往月來。灰移火變。暫乖語默。頓隔秦吳。既傳蘇李之書。更有范張之志。冷風盛而結鼻。寒氣切而凝唇。虹入漢而藏形。鶴臨橋而送語。彤雲垂四面之葉。玉雪開六出之花。敬想足下。世號冰壺。時稱武庫。命長袂而留客。施大被以招賢。酌醇酒而拒切骨之寒。溫獸炭而祛透心之冷。某攜戈日久。荷戟年深。揮白刃而萬定死生。引虹旗而千決成敗。退龍劍而却步。月下開營。進鯨鼓而

橫行雲前起陣。徒勞斬斫。豈用功勳。諸不具陳。謹伸微意。黃鐘一月分手未遙。翹心且積。引領企踵。朝夕不忘。眷友思仁。行坐未捨。既屬嚴風極冷。苦霧添寒。冰堅漢地之池。雪積袁安之宅。敬想足下。棲神鶴駕。眷想龍間。披玩之間。願無捐德。某種瓜賤。士賣餅貧生。入罽竈以揚聲。不逢蔡子。駕鹽車而顯跡。罕遇孫陽。徒懷叩角之心。終想暴腮之患。既爲久要。聊吐短章。紙短墨窮。何能懇露。大呂十月

二月

句法變換
四六所珍

梁簡文帝答南平嗣王餉舞簾書

濯龍之木。文闕飾壇。淮南之臺。紫羅爲薦。未若五離九折。出桃枝之翠筍。綺爛霞舒。製雲母之修竹。南湖點淚。喻此未奇。東宮赤花。擬之非妙。

梁簡文帝答蕭子雲上飛白書屏風書

得所送飛白書。縑屏風十牒。冠六書而獨美。超二篆而擅奇。乍寫星區。特圖鳥翅。非觀觸石。已覺雲飛。豈待金璫。便覩蟬翼。問諸衣帛。前哲未巧。懸彼帳中。昔賢掩色。

梁簡文帝答新安公主餉胡子一頭

方言異俗。極有可觀。山高水遠。宛在其貌。不使去來執轡。媿彼青衣。正當出入燒香。還依當轂。豈直王濟女奴。獨有羅袴。方使樂府行胡。羞論歌舞。垂賚新奇。伏增荷抃。

梁簡文帝謝賚扇啓

臣綱啓。傳詔饒僧明。奉宣敕旨。垂賚細綾大文畫柳蟬山扇二柄。文均析縷。香發海檀。肅肅清風。卽令象簾非貴。依依散采。便覺夏室含霜。飲露青蜩。應三伏之修景。羣飛黃雀。送六月之南風。蔽日垂陰。薰澤慚

采浮涼滌暑。蘋末愧吹。聖人造物之巧。俯萃庸薄。王府好玩之恩。於茲下被。頂戴曲私。伏增欣躍。謹奉啓事謝聞謹啓。

梁簡文帝謝東宮賜裘啓

網啓。蒙賚豹裘一領。降斯止謗。垂茲信物。服華雉毳。名高鷲羽。綱才慚齊相。受白狐之飾。德謝漢藩。均黑貂之賜。地捲朔風。庭流花雪。故以裾生惠氣。袖起陽春。荷澤知慚。瞻恩興戀。不任下情。謹啓事謝聞謹啓。

梁簡文帝東宮上掘得慈覺寺鐘啓

轉折有長篇法

竊以白亭舊室。絕顯禎祥之氣。闕里故堂。暫聞鐘石之響。猶復存諸良史。汗彼篆素。豈如杏梁遺飾。迴成紺殿。椒擘昔處。仍構寶階。啓彝鐘於殊里。記靈文於福地。雖魏廟出璽。魯祠現碧。固以推茲孝感。慙此禎契。將郭舍鄙其開金。羊田陋其產玉。豈直季武庭樹。愧韓起之譽。蜀相宅基。慚孝安之碣。伏惟覽啓增思。撫瑞深悲。慟切示奩。哀喻封篋。

梁元帝謝勅賜第啓

竊以漢錫五倫。實云清吏。魏寵衛臻。用旌庸直。未如靈光輪奐。睢陽爽塏。北連城闕。有似甄侯之舍。東望市廛。榮深豫章之圃。昔狼望未平。冠軍辭宅。馬池猶隔。雍邱讓邸。臣慚霍曹遠志。但識君命無違。再思庸陋。九殞非答。

梁元帝上東宮古跡啓

師宜八分之巧。元常三體之妙。史籀李斯之篆。梁鵠曹喜之書。莫不總華桂宮。盈滿甲館。竊以鸞鷲之勢。

既聞之於索靖。鷹跖之巧。又顯之於蔡邕。是以遊霧重雲。傳敬禮之法。烏頡魚頰。表楊泉之賦。頗好六文。多慚三禮。尙方大篆。既其牢落。柱下方書。何曾髣髴。空慕河間之聚書。竟微東平之獻表。齊攸尺牘。顧已缺然。北海楷隸。終成難擬。

梁元帝謝東宮賜白牙縷管筆啓

春坊漆管。曲降深恩。北宮象牙。猥蒙霑逮。雕鑄精巧。似遼東之仙物。圖寫奇麗。笑蜀郡之儒生。故知稽賦非工。王銘未善。昔伯喈致贈。纔屬友人。葛龔所酬。止聞通識。豈若遠降鴻慈。曲覃庸陋。方覺瑠璃無當。隨珠過侈。但有羨卜商。無因則削。徒懷曹植。恆願執鞭。

梁元帝謝晉安王賜馬啓

釋武媿。仲都。遂蒙大驪之錫。儒謝春卿。空頌名馬之賚。故以取方驎友。自匹龍媒。不待景公。婉如齊畫。無勞馬援。翻等漢銅。豈有滅沒黑龍。連翩白馬。錢文見重。津名取貴。相彼騏驥。猶深戀主。矧伊伏櫪。彌結懷恩。

梁元帝爲妾宏夜姝謝東宮賚合心花釵啓

未得投壺。先應含笑。不因鸞鳳。自能歌舞。夜姝昔住陽臺。雖逢四照。曾遊灃浦。慣識九衢。未有仍代爵釵。還勝翠羽。飾以南金。裝茲麗玉。修靡夫人。本分章華之裏。中山孺子。獨荷春宮之恩。有志當熊。無期投閣。劉孝儀謝鄱陽王賜鉢啓

珍窮貨貢。製極範金。用貴寶樽。文包龍鼎。雕鏤海籍。圖載山經。閱衆神于器中。弄神姦于掌裏。足令任后

所欲遠慚漢世少君有覲遙荒齊寢

劉孝儀謝晉安王賜宣城酒啓

歲暮不聊在陰卽慘惟斯二理總萃一時少府鬪猴莫能致笑大夫落雉不足解顏忽值餅瀉椒芳壺開玉液漢罇莫過殷杯未逢方平醉而遁仙羲和眈而廢職仰憑殊途便申私飲未曷疊恥已觀幘岸傾耳求音不聞霆擊澄神密眠豈覲山高愈疾銷憂于斯已驗遺榮忽賤卽事不欺酩酊之中猶知銘刻

劉孝儀謝東宮賜城傍橘啓

多置守民晉爲厚秩坐入縑素漢譬封君固以俛正穰橙俯連楚柚寧似魏瓜借清泉而得冷豈如蜀食待飴密而成甜重以倒影陽池垂華金堞信可珍若榴於式乾貴蒲萄於別館

劉孝儀謝東宮賜淨饌啓

糜獻牛牧飯出龍宮千品甘露之食百花珍藥之菓餅兼髓乳漿苞蔗奈雕盤流其滋旨寶器委其色香足使三世長者羞彼識味一角僊人恥其呪術微物多幸叨奉曲恩性命可捐殊私難答

劉孝威謝賚錦被啓

色豔蒲桃采踰聯璧鄂君慚繡楚侍羞珠雖復帝賜鶴綾客贈鴛綺高懸麗藻遠謝鮮明漢老悅其怪文魏馬驚其香氣

張伯緒謝東宮賚園啓

○折旋有意然
文似未完

性愛山泉頗樂閒曠雖復伏膺堯門情存魏闕至於一邱一壑自謂出處無辨常願卜居幽僻屏避喧塵

傍山臨流。而郊負郭。依林結宇。憩桃李之夏陰。對鏡開軒。採橘柚之秋實。而王畿陸海。畝號一金。涇渭土膏。豪傑所競。徒居好時。必待使越之裝。別館河陽。亦資牧荆之富。此園左帶平湖。修陂千頃。右臨長薄。清潭百仞。前逼逸陌。朝夕爽塏之容。後望鍾阜。表裏煙霞之氣。每膺春迎夏華。卉競發。背秋向冬。雲物澄霽。窺瞰戶牖。不異登臨。升降塔墀。已窮歷覽。舟楫所屆。累日不能究其源。魚鳥之豐。山澤不能喻其美。任孝恭謝賚錢治宅啓

繩樞斷續。薄雨已傾。席戶穿闌。微風自捲。不悟恩隆問舍。降自天造。事深更宅。乃被庸微。跪條可授。毀垣再築。遂得牕臨上路。戶望東家。人悅爽塏。里驚輪奐。門學于公。逆容駟馬。巷均王璿。豫擬幡旗。庾慎之謝東宮賜宅啓

肩吾居異道南。才非巷北。流寓建春之外。寄息靈臺之下。豈望地無湫溢。里號乘軒。巷轉旛旗。門容幘蓋。況乃交垂五柳。若元亮之居。夾植雙槐。似安仁之縣。却瞻鍾阜。前枕洛橋。池通西舍之流。窗映東鄰之棗。來歸高里。翻成待封之門。夜坐書臺。非復通燈之壁。才下應王禮加溫阮。官成名立。無事非恩。

庾慎之謝東宮賚米啓

滢水鳴蟬。香聞七里。瓊山含穎。租歸十縣。某人慚振藻。徒降雲間之松。職濫更繁。空散家承之俸。成珠委地。事重逢仙。遊玉爲糧。珍踰入楚。雖復激水滄流。不待監河之說。春風掃地。方諳文學之篇。

庾慎之謝東宮賚古跡啓

竊以仙巖遺傳。入握成塵。孔壁藏文。隨開已蠹。石書乍暗。廚畫猶飛。豈有跡經四代。年踰十紀。芝英雲氣。

之巧未損松鋁。鵲反鸞驚之勢。不侵蒲竹。必使酒肆人來。池流色變。將損北海之牘。還代西河之簡。庾慎之謝梨啓

睢陽東苑。子圍三尺。新豐箭谷。枝懸六斤。未有生因汾水。產自桐邱。影連鄧橘。林交苑柿。遠薦中廚。爵頒下室。事同靈棗。有願還年。恐似仙桃。無因留核。

庾慎之謝武陵王賚白綺綾啓

圖雲緝鶴。鄴市稀逢。寫霧傳花。叢臺罕遇。雖復馬均。騁思此巧。猶慚虞卿。受金方恩未重。比扁舟獨反。燕路有心。載寶言歸。銜珠無日。

庾慎之謝歷日啓

凌渠所奏。弦望既符。鄧平之言。鎔銖皆合。登臺視朔。覩雲物之必書。拂管移灰。識權衡之有度。初開卷始。暫謂春留。未覽篇終。便傷冬及。徘徊厚渥。比日爲年。

庾慎之答陶隱居賚朮煎啓

竊以綠葉抽條。生於首峯之側。紫花標色。出自鄒嶺之下。百邪外禦。六府內充。山精見書。葉神在錄。木榮火謝。盡探擷之難。啓旦移申。窮淋漉之劑。故能競爽雲珠。爭奇冰玉。自非身疲掌硯。役倦僊桃。豈可立致還年。坐生羽翼。臨洮丹井。方覺可捐。酈縣菊泉。無勞復汲。庶得遨遊海岸。追涓子之塵。馳驚霍山。共陳生爲侶。謠俗輕施。尙曰難酬。出世鴻恩。寧知上報。

庾子山謝滕王集序啓

○豐健欲飛。幽咽如訴。子山文詞。篇篇可誦。

紫微懸映。如傳闕里之書。青鳥遙飛。似送層城之壁。若夫甘泉宮裏。玉樹一叢。元武闕前。明珠六寸。不得
譬此光芒。方斯照燭。有節有度。卽是能平八風。愈唱愈高。殆欲去天三尺。殿下雄才。蓋代逸氣。橫雲濟北。
顏淵關西。孔子譬其毫翰。則風雨爭飛。論其文采。則魚龍百變。蒲桃繞館。新開碣石之宮。修竹夾池。始作
睢陽之苑。琉璃泛酒。鸚鵡承杯。鳳穴歌聲。鸞林舞曲。況復行雲逐雨。迴雪隨風。湖陽之尉。旣成爲喜之音。
春陵之侯。便是銷憂之地。某本乏材用。無多述作。加以建鄴陽九。劣免儒礪。江陵百六。幾從士隴。至如殘
編落簡。並入塵埃。赤軸青箱。多從灰燼。比年痾恙。彌留光陰。視息桑榆。已逼蒲柳。方衰不無秋氣之悲。實
有窮途之恨。是以精采。替亂頗同。宋玉言辭。塞吃更甚。揚雄一吟一詠。其可知矣。好事者不求知音者不
用。非有班超之志。遂已棄筆。未見陸機之文。久同燒硯。至於凋零之後。殘缺所餘。又以雜用補袍。隨時覆
醬。聖慈憐愍。遂垂存錄。始知揄揚過差。君子失辭。比擬縱橫。小人迷惑。荆玉抵鵲。正恐輕用重寶。龍淵削
玉。豈不徒勞神慮。匠石迴顧。朽材變於彫梁。孫陽一言。奔蹄成於駿馬。故知假人延譽。重於連城。借人羽
毛。榮於尺玉。溟池九萬里。無踰此澤之深。華山五千仞。終愧斯恩之重。卽日金門細管。未動春灰。石壁輕
雷。尙藏冬蟄。伏願聖躬。與時納豫。南陽寶雉。幸足觀瞻。鄆縣菊泉。差能延壽。伏遲至鄴。可期從梁。有日同
杞子之盟會。必欲瞻仰風塵。共辭侯而來朝。謹當逢迎冠蓋。魚腸尺素。鳳足數行。書此謝辭。終知不盡。
庾子山謝趙王賚馬并繖啓

某啓。奉教垂賚紫駟馬。并銀釘乘具。紫紬繖一張。上天降雨。特垂深澤。若木流光。偏蒙私照。迴茲翠蓋。事
重劉基之恩。降此青驪。榮深李忠之賜。北部丹帷。便須高捲。西河竹馬。卽已郊迎。在命之輕。鴻毛浮于弱

水知恩之重。鼇背負于靈山。況復驚鴻別水。但見裴徊。黃鶴去關。惟知反顧。棲戀之心。事同于此。

庾子山謝明帝賜絲布等啓○寒乞太甚

臣某啓。奉勅垂賜雜色絲布絺絹三十段。銀錢二百文。某比年以來。殊有闕乏。白社之內。拂草看冰。靈臺之中。吹塵視甑。對妻狠妾。既嗟且憎。瘠子羸孫。虛恭實怨。王人忽降。大賚先臨。天帝賜年。無踰此樂。仙童贈藥。未均斯喜。張袖而舞。元鶴欲來。撫節而歌。行雲幾斷。所謂舟楫無岸。海若爲之反風。薺麥將枯。山靈爲之出雨。況復全抽素蠶。雪板宜傾。併落青鳧。銀山或動。是知青牛道士。更延將盡之年。白鹿真人。能生已枯之骨。雖復拔山超海。負德未勝。垂露懸針。書恩不盡。蓬萊謝恩之雀。白玉四環。漢水報德之蛇。明珠一寸。某之觀此。寧無愧心。直以物受其生。於天不謝。

庾子山謝趙王賚息絲布啓

某啓。某息苟娘。昨蒙恩引。曲賜絲布等五段。南冠獲宥。既預禮延。稚子勝衣。還蒙拜謁。關尹津梁之織。鄴地雙絲。扶風彩文之機。仙園獨蠶。青衿宜襲。書生無廢學之詩。春服既成。童子得零沂之舞。況復棲鳥挾子。同知桂樹之恩。澤雉將雛。共喜行春之令。根株一潤。枝葉俱榮。謹啓。

庾子山謝趙王賚絲布啓

某啓。奉教垂賚雜色絲布三十段。去冬凝閉。今春嚴勁。霞似瓊田。凌如鹽浦。張超之壁。未足鄣風。袁安之門。無人開雪。覆鳥毛而不暖。燃獸炭而逾寒。遠降聖慈。曲垂矜賑。諭其蠶月。殆罄桑車。津實秉杼。幾空織室。遂令新市數錢。忽疑販綵。平陵月夜。驚聞擣衣。妾遇新縑。自然心伏。妻聞裂帛。方當含笑。莊周車轍。實

有涸魚。信陵鞭前元。非窮鳥。仰蒙經濟。伏荷深慈。運事甚巧。

庾子山謝趙王示新詩啓

八體六文。足驚毫翰。四始六義。實動性靈。落落詞高。飄飄意遠。文異水而湧泉。筆非秋而垂露。藏之山窟。可使雲霧鬱起。濟之江浦。必當蛟龍繞船。首夏清和。聖躬怡裕。琉璃彤管。鵲顧鸞迴。婉轉綠沉。猿驚雁落。下風傾首。以日爲年。犍爲舍人。實有誠願。碧雞主簿。無由遂心。寂寞荆扉。疎蕪蘭徑。驂駕來梁。未期卜日。遣騎到鄴。希垂枉道。

庾子山謝趙王賚白羅袍袴啓

程據上表。空論雉頭。王恭入雪。虛稱鶴氅。未有懸機巧綜。變躡奇文。鳳不去而恆飛。花雖寒而不落。披千金之暫暖。棄百結之長寒。永無黃葛之嗟。方見青綾之重。對天山之積雪。尙得開襟。冒廣樂之長風。猶當揮汗。白龜報主。終自無期。黃雀謝恩。竟知何日。

庾子山謝滕王賚馬啓

某啓。奉教垂賚烏騮馬一疋。柳谷未開。翻逢紫鷲。臨源猶遠。忽見桃花。流電爭光。浮雲連影。張敞畫眉之暇。直走章臺。王濟飲酒之歡。長驅金埒。

庾子山謝趙王賚犀帶啓

某啓。奉教垂賚犀裝帶錢十貫。魏君寶帶。特賜劉楨。趙王國租。偏資裴楷。貫藏文馬。如燒安息之銀。帶插通犀。似獵雲南之獸。北郭騷之長貧。是所甘愜。南宮敬之載寶。殊非念望。花開四照。惟見其榮。鼈戴三山。

深知其重。昔沈羲將盡。逢司命而還生。士燮行埋。值僊人而更活。今日慈矜。斯之謂矣。馬前驅而導路。或以識恩。雞未曉而開關。容能報主。謹啓。

庾子山謝趙王賚米啓

某啓。奉教垂賚米十石。丹烏銜稭。既集西周。黃雀隨車。還飛東市。漬而爲種。不無霜雪之精。取以論兵。卽有山川之勢。某陋巷簞瓢。榴風沐雨。剝榆皮於秋塞。握鷲鷲於寒山。仰費國租。遂開塵甑。非丹竈而流珠。異荆臺而炊玉。東方朔之捧米。旣息長饑。西門豹之墾田。方慚此賚。

庾子山謝趙王賚乾魚啓

某啓。蒙賚乾魚十番。澧水朝浮。光疑朱鼈。文鱗夜觸。翼似青鸞。況復洞庭鮮鮓。溫湖美鯽。波瀾成雨。鱗甲防寒。某本吳人。常想江湖之味。乃其饑也。唯資藜藿之餘。慈賚渥恩。膏腴流竈。不勞獅子之亭。卽勝雷池之長。翻驚河伯。獨不愛人。足笑任公。終年垂釣。謹啓。

應世之用。書啓最繁。情深爲上。意足次之。修辭未矣。

駢體文鈔卷三十一

【雜文】

王子淵從續古文苑本○

蜀郡王子淵以事到湔止寡婦楊惠舍惠有夫時奴名便了子淵倩奴行酤酒便了拽大杖上夫冢巔曰

大夫買便了時但要守家不要為他人男子酤酒子淵大怒曰奴寧欲賣耶惠曰奴大忤人人無欲者子

淵即決買券云云案本誤不重今補奴復曰欲使皆上券不上券便了不能為也子淵曰諾券文曰神爵三年正

月十五日資中男子王子淵從成都安志里女子楊惠買亡夫時戶下髻奴便了決買萬五千奴當從百

役使不得有二言晨起早掃食了洗滌居當穿白縛帶裁孟鑿斗浚渠縛落鉏園斫陌案句絕章樵誤以

知落陌杜堉堉脾地刻大枷屈竹作杷削治鹿盧出入不得騎馬載車蹠坐大啞下床振頭捶案本誤鉤

此字依藝劉芻結葦臘繡汲水此二字依酪初學記醜音醜音摸音織履作麤黏雀張烏結網捕魚繳

雁彈鳧登山射鹿入水捕龜後園縱養雁鶩百餘驅逐鴟鳥持梢牧豬種薑養芋案本誤長育豚駒糞除

堂廡此二字依餽食苑音伺馬牛鼓四起坐夜半益芻二月春分被隄杜疆落桑皮樓御覽注云樓栢欄也

種瓜苑音鑿御覽瓠別茄披葱焚槎發芋御覽注云蜀土收芋壟集破封日中早燾苑復音○案此字

引中無以訂之章樵本雞鳴起春調治馬戶兼落三重御覽注云馬戶水門也蜀每以舍中有客提壺行

酌然與復音苑滌杯整按園中拔蒜斷蘇切脯築肉耀芋膾魚鯨鼈烹茶盡具已而此字依蓋藏關門

塞竇餒猪縱犬勿與鄰里爭鬪奴當飯豆飲水不得嗜酒欲飲美酒唯得染唇漬口不得傾盃覆斗不得

辰出夜入交關伴偶舍後有樹當裁作船上至江州下到渝案句絕章樵誤連下讀蓋不知船湍錢為韻主為府掾求用錢推

訪聖御覽注云白塔也販樓索縣亭買席往來都落當為婦女求脂澤販于小市歸都擔泉轉出旁蹉御覽注云蹉市名

牽犬販鵝武都買茶御覽注云都縣名出茶楊氏案御覽池中之擔荷御覽注云楊氏池名出荷往來市聚慎護奸偷入市不得

夷蹲旁臥惡言醜罵多作刀矛持入益州貨易羊牛案本誤奴自教精慧不得癡愚持斧入山斷轆裁轅

御覽注云轆車輞也若有餘殘當作俎豆几木屐及堯盤御覽注云堯盤猪槽也焚薪作炭堯苑力切石薄岸御覽注云石以薄岸也

力迫切死及初學記力非治舍蓋屋削書案本誤伐牘日暮欲歸當送乾薪兩三束四月當披

九月當穫十月收豆御覽注云十月民輸租十掄麥窰芋御覽注云掄今正南安拾栗探橘御覽注云南持車載轆御覽注

有利也○案已上正文十四字多取蒲苧苑音益作繩索雨墮無所為當編蔣織薄種植桃李梨柿柘桑

三丈一樹八樹文此類聚為行果類相從縱橫相當果熟收斂不得吮嘗犬吠當起驚告鄰里根門柱戶

上樓擊鼓御覽注云漢時官樓急鼓以告邑里令救取也荷此字依初學記盾曳矛還落三周勤心疾作不得遨

遊奴老力索種莞織席事訖休息當春一石夜半無事浣衣當白若有私錢主給賓客奴不得有奸私事

事當關白奴不聽教當笞一百讀券文適訖詞窮詐索乞乞叩頭兩手自搏目淚下落鼻涕長一尺審如

王大夫所言不如早歸黃土陌邱蚓鑽額早知當爾為此字依藝文王大夫酤酒真不敢作惡案此文在

取自初學記故大段全開有一二小異而已考太平御覽五百九十八亦載之雖非完篇然古依以訂

凡此御覽正文皆未嘗誤也而章樵單用今本鄂書燕說豈不陋哉其舊注未悉撰人名氏惜御覽載之

不盡乃就取所有兼采藝文類聚初學記亦附鄙見詳加校定重載于此初學記古文苑皆言此文相傳多誤茲巴粗得通庶垂之方來也不能有二後世亦未見有寫仿之者間有用其句法

王子淵責髯奴文

我觀人鬚長而復黑。再弱而調。離離若緣坡之竹。鬱鬱若春田之苗。因風披拂。隨手飄飆。爾乃附以豐頤。表以蛾眉。發以表顏。呈以妍姿。約之以絀綫。潤之以芳脂。莘莘翼翼。靡靡綏綏。振之發耀。勦若元圭之垂。于是搖鬚奮髯。則論說虞唐。鼓鬢動鬣。則研覈否臧。內育瓌形。外闡宮商。相如以之。閒都顯孫。以之堂堂。豈若子鬚。既亂且赭。枯槁禿瘁。劬勞辛苦。汗垢流離。汗穢泥土。僉囁穰擣。與塵爲伍。無素顏可依。無豐頤可怙。動則困于惚滅。靜則窘于囚虜。薄命爲髯。正著子頤。爲身不能庇其四體。爲智不能飾其形骸。癩鬚瘦面。常如死灰。曾不如犬羊之毛尾。狐狸之毫釐。爲子鬚者。不亦難乎。

陸士龍牛責季友文

天造草昧。萬物化淳。類族殊品。莫同乎人。今子履方象以矩地。戴圓規以儀天。該芳靈之款素。挺協氣于皓元。故神窮來哲。思洞無間。踊翰則憤凌風波。吐辭則辨解連環。子何不絕淵而躍。照日之光。使穎秀揚谷。景溢扶桑。俯經見龍之輝。仰集天人之堂。維子之服。既元而素。今子之滯。年時云暮。而冕不易物。車不改度。子何不使元貂左餌。華蟬右顧。令牛朝服青軒。夕駕軺輅。望紫微而風行。踐蘭塗而安步。而崎嶇隴坂。息駕郊牧。玉容含楚。孤牛在疾。何子崇道與德。而遺貴與富之甚哉。日月逝矣。歲聿其暮。嗟乎季友。盛時可惜。迨良期於風柔。競悲飈于葉落。陳讜言于洪範。圖遺形于霄閣。使景絕而音流芬。身薦而榮赫奕。子如不能建功。以及時。予請迹于桃林之薄。

吞道元與吞公賤

道居在城南。接水墟。草木幽鬱。蚊虻所藏。茅茨陋宇。纔容數床。積汗累燻。體貌萎黃。冬則兩幅之薄被。心有牽黎與敝絮。撤以三股之絲縵。袷以四升之麤布。狹領不掩其巨形。促緣不覆其長度。伸脚則足出。攣捲則齋露。

奴曰高安。兩手並殘。指如竹筒。畏風惡寒。小者家生。厥名曰饒。腹中痕堅。大如飯搯。飽食終日。不能作勞。借一小兒。僮公吳母。近因冬節。暫詣其舅。狗咬一脛。肉落如手。攣筋徹骨。跛而不愈。長婢來成。左目失明。動則入井。已死復生。次婢良信。有桓公司馬之癩。行步雖曠。了無前進。隱疾難明。辭不盡韻。小婢從成。南方之奚。形如驚麀。言語嘍儻。聲音駭人。惟堪馱雞。它無所役。遣詣阿稽。復被狗咋。困熟如泥。俱非全文。

戴文讓失父零丁

敬白諸君行路者。敢告重罪。自爲禍。積惡致災。天困我。今月七日。失阿爹。念此酷毒。可痛傷。當以重贈。用相償。請爲諸君說事狀。我父軀體與衆異。脊背偃。僂捲如戟。唇吻參差。不相值。此其庶形何足備。請復重陳其面目。鴟頭。鵠頸。獾狗。此下脫字。眼淚鼻涕。相追逐。吻中含納。無齒牙。食不能嚼。左右蹉。似西域駱駝。有脫字。請復重陳其形駭。爲人雖長。甚細材。面目芒蒼。如死灰。眼眶白陷。如羹枯。此文亦未全。御覽云。戴良字文讓。而後漢書獨行傳。戴良字叔。

驚未知其爲一人與否。

吳叔庠餅記

宋公至長安。得姚泓時。故大官丞程季者。了了人也。公曰。今日之食。何者最先。季曰。仲秋禦景。離蟬欲靜。

變變曉風淒淒夜冷臣當此景唯能說餅公曰善季乃稱曰安定噎鳩之麥洛陽董德之磨河東長若之葱隴西舐背之犢枹罕赤髓之羊張液北門之豉然以銀屑煎以金銚洞庭負霜之橘仇池連蒂之椒調以濟北之鹽剉以新豐之雞細如華山之玉屑白如梁甫之銀泥既聞香而口悶亦見色而心迷公曰善班孟堅奕旨

大冠言博既終或進而問之曰孔子稱有博奕今博行於世而奕獨絕博義既宏奕義不述問之論家師不能說其聲可聞乎曰學不廣博無以應客北方之人謂碁爲奕宏而說之舉其大略厥義深矣局必方正象地則也道必正直神明德也碁有白黑陰陽分也駢羅列布效天文也四象既陳行之在人蓋王政也成敗臧否爲仁由己危之正也夫博懸於投不專在行優者有不遇劣者有僥倖踦拏相凌氣勢力爭雖有雄雌未足以爲平也至於奕則不然高下相推人有等級若孔氏之門回賜相服循名責實謀以計策若唐虞之朝考功黜陟器用有常施設無所因敵爲資應時屈伸續之不復變化日新或虛設豫置以自護衛蓋象庖羲罔罟之制隄防周起障塞漏決有似夏后治水之勢一孔有闕壤頽不振有似瓠子汎濫之敗一碁破窆亡地復還曹子之威作伏設詐突圍橫行田單之奇要厄相刼割地取償蘇張之資固本自廣敵人恐懼三分有二釋而不誅周文之德知者之慮也既有過失能量弱強逡巡儒行保角依旁却自補續雖敗不亡繆公之智中庸之方也上有天地之象次有帝王之治中有五霸之權下有戰國之事覽其得失古今略備及其晏也至於發憤忘食樂以忘憂推而高之仲尼概也樂而不淫哀而不傷質之詩書關雎類也紕專知柔陰陽代至施之養性彭祖氣也外若無爲默而識淨泊自守以道意隱居放

言遠咎悔。行象虞仲。信可喜。感乎大冠。論未備。故因問者。喻其事。

劉孝儀探物作豔體連珠

妾聞洛妃高髻。不資於芳澤。元妻長髮。無藉於金鈿。故雲名由於自美。蟬稱得於天然。是以梁妻獨其妖豔。衛姬專其可憐。

妾聞芳性深情。雖欲忘而不歇。薰芬動慮。事逾久而更思。是以津亭掩馥。祇結秦婦之恨。爵臺餘妬。追生魏妾之悲。

陶通明授陸敬游十賚文

隱居先生。遣總事弟子載烜。秉策執簡。膝授前學弟子吳郡陸敬游。建連石之邑。爲棲靜處士。策文曰。咨爾敬游。昔我紆紱。帝闈侍笏。梁席雖迹。混教途。而心標逸境。芝田之想。無忘曉夜。濠潁之志。歲月已深。至德有鄰。風雲相會。爾之來也。爰移兩春。于是褫帶青屨。掛冠朱闕。攜手東驅。創居茲嶺。脉潤通水。徙石開基。登崖斲幹。越壘負卉。筋力盡于登築。氣血疲乎趨走。肌色憔悴。不以暴露爲苦。心魂空慊。寧顧饑寒之弊。棟宇旣立。載罹霜暑。于時七稔。經始甫訖。今日之安。爾有勤焉。君子不獨居其榮。仁人必與物同泰。是用邑爾。長阿北阪。積金山。連石之鄉。方七十步。澗水屬焉。茂爾嘉業。永爲華陽上賓。爾其蒞之。其一爾以

誠慤爲性。恬澹爲情。質直居本。沉重樹志。不邀世才。高謝時俗。概謀詭譎。非意所欲。今故賚爾。爲棲靜處

士。可以因德立號。克終斯美。其二爾基架館境。營劃援域。堂壇宏敞。樓路通嚴。官私行止。並有棲憩。繕築之

勞。莫匪爾力。今故賚爾。四靈飛軒。廂廊側屋。可以安身靜臥。顯祇遐福。其三爾奉上惟勤。接下以惠。稼穡艱

難備嘗勞苦。貨殖之宜。允瞻糧服。手足胼胝。未獲告休。櫛風沐雨。于焉尤切。今故賚爾蒼頭一人。厥名多益。可以傳代薪水。省息劬勩。其四爾族惟舊。緒身乃邦。聞道雖一貫。事望宜分。今故賚爾鋼鐵如意。可以揮對賓僚。卽名立事。其五爾崇教惟善。法無偏執。器服表用。爰寄玩習。今故賚爾筇竹錫杖。可以振動三界。精祇憚響。其六爾期誠元契。遐想靈風。至懷所詣。因心則通。今故賚爾香爐一枚。熏陸副之。可以騰烟紫閣。昭感上司。其七爾澡形潔藏。香糧既去。宜導松朮。實資芳醕。今故賚爾杯盤一具。可以夕挹桂漿。朝承菊露。其八爾敬事經誥。遵尙楷模。翰墨之用于是乎在。今故賚爾大硯一面。紙筆副之。可以臨文寫字。對真受言。其九爾真心內固。清行外彰。滌蕩紛穢。表裏雪霜。今故賚爾鍤石澡罐。手巾爲副。可以登齋朝拜。出入盥漱。其十今賚爾十事。事準前史。可對揚嘉策。循言求理。無或驕惰。以騫斯旨。援筆申懷。敢告處士。

袁陽源鷄九錫文并勸進

維神雀元年。歲在辛酉。八月己酉朔十三日丁酉。帝顓頊遣征西大將軍下雉公王鳳。西中郎將白門侯扁鵲。咨爾浚雞山子維君天姿英茂。乘機晨鳴。雖風雨之如晦。抗不已之奇聲。今以君爲使持節。金西蠻校尉。西河太守。以揚州之會稽。封君爲會稽公。以前浚雞山子爲湯沐邑。君其祇承予命。使西海之水如帶。浚雞之山如礪。國以永存。爰及苗裔。

浚山侍郎丁鴻。舍人鳧亭。男梁鴻。郎中蘇鵠。死罪。伏惟君德著朝野。勳加鷄鶩。故天王鳳皇。特錫位封。今鳳鵠等在柏外。願時拜受。不勝欣豫之情。謹詣樓下以聞。

韋琳鮪表

○亦是山膏罵人

臣鉅言伏見除書以臣爲粽一作熬將軍油蒸校尉隴州刺史脯腊如故肅承將命含灰屏息憑籠臨鼎

載兢載惕臣美愧夏鱣味慚冬鯉常懷鮎服之誚每懼鼈巖之饑是以漱流湖底枕石泥中不意高賞殊

私曲蒙鈞拔遂得超升綺席忝預玉盤遠廁玳筵猥頒象箸澤覃紫膾恩加黃腹方當鳴姜動椒紆蘇佩

纓輕瓢纒動則樞盤如烟濃汁暫停則蘭肴成列宛轉綠壘之中逍遙朱脣之內銜恩噬澤九殞弗辭不

任屏營之誠謹列銅鎗門奉表以聞

詔答曰省表具知卿池沼縉紳陂渠俊乂穿蒲入荇肥滑有聞允堪茲選無勞謝也

沈休文修竹彈甘蔗文○寓意甚顯權要所不樂聞然亦望而知爲趨世之士非有道者言

長兼淇園貞幹臣修竹稽首臣聞芟夷蘊崇農夫之善法無使滋蔓翦惡之良圖未有蠹苗害稼不加窮

伐者也切尋蘇臺前甘蔗一叢宿漸雲露荏苒歲月擢本盈尋垂蔭含丈階緣寵渥銓衡百卉而予奪乖

爽高下在心每叨天功以爲己力風聞籍聽非復一塗猶謂愛憎異說所以未挂嚴綱今月某日有臺西

階澤蘭萱草到園同訴自稱雖慚杞梓頗異蒿蓬陽景所臨由來無隔今月某日巫岫斂雲秦樓開照乾

光宏並罔幽不矚而甘蔗攢莖布影獨見鄣蔽雖處臺隅遂同幽谷臣謂偏僻難信敢察以情登攝甘蔗

左近杜若江蘼依源辨覆兩草各處異列同款既有證據羌非風聞切尋甘蔗出自藥草本無芬馥之香

柯條之任非有松柏後凋之心蓋闕葵藿傾陽之識馮藉慶會稽絕倫等而得人之譽靡卽稱平之聲寂

寞遂使言樹之草忘憂之用莫施無絕之芳當門之弊斯在妨賢敗政孰過于此而不除戮憲章安用請

以見事徙根剪葉斥出臺外庶懲彼將來謝此衆屈

吳叔庠檄江神責周穆王璧

昔穆王南巡。自郢徂閩。遺我文璧。僉曰此津。貫緯百紀。薦歷千春。念茲文璧。故問水濱。江漢勗之。自求多益。反我名瑞。躍此華璧。則富有漢川。世爲江伯。如有負穢心迷。懷覺情戚。藏玉泥中。匿珪魚腹。使公孫躡波而長吁。子羽濟川而怒目。倏飛舞劍而東臨。蓄邱躍馬而南逐。打素蛤而爲粉。碎紫貝其如粥。又有川人勇俊。處乎閩濮。水居百里。泥行萬宿。右睨而河傾。左咤而海覆。乃把昆吾之銅。純鈎之鐵。被魚鱗之衣。赴螺蚌之穴。引澍東隅。移燠北島。使蓬萊之根。鬱而生塵。瀛洲之足。淨而可掃。按驪龍。取其領下之珠。擲鯨魚。拔其眼中之寶。皇恩所被。繁枯潤涸。威之所加。窮河絕漠。願子三思。反此明玉。

孔德璋北山移文

鍾山之英。草堂之靈。馳煙驛路。勒移山庭。夫以耿介拔俗之標。蕭灑出塵之想。度白雪以方潔。干雲青而直上。吾方知之矣。若其亭亭物表。皎皎霞外。芥千金而不盼。屣萬乘其如脫。聞鳳吹於洛浦。值薪歌於延瀨。固亦有焉。豈其終始參差。蒼黃翻覆。淚翟子之悲慟。朱公之哭。乍迴跡以心染。或先貞而後黷。何其謬哉。嗚呼。尙生不存。仲氏既往。山阿寂寥。千載誰賞。世有周子。儁俗之士。旣文旣博。亦元亦史。然而學遁東魯。習隱南郭。竊吹草堂。濫巾北岳。誘我松桂。欺我雲壑。雖假容於江皋。乃櫻情於好爵。其始至也。將欲排巢父。拉許由。傲百氏。蔑王侯。風情張日。霜氣橫秋。或歎幽人長往。或怨王孫不游。談空空於釋部。覈元元於道流。務光何足比。涓子不能儔。及其鳴騶入谷。鶴書赴隴。形馳魄散。志變神動。爾乃眉軒席次。袂簞筵上。焚芰製之荷衣。抗塵容而走俗狀。風雲懷其帶憤。石泉咽而下愴。望林巒而有失。顧草木而如喪。至其

紐金章。綰墨綬。跨屬城之雄。冠百里之首。張英風於海甸。馳妙譽於浙右。道帙長擯。法筵久埋。敲扑諠囂。犯其慮牒。訴倥偬裝其懷。琴歌既斷。酒賦無續。常綢繆於結課。每紛紜於折獄。籠張趙於往圖。架卓魯於前籙。希蹤三輔。豪馳聲九州。牧使我高霞孤映。明月獨舉。青松落陰。白雲誰侶。澗戶摧絕。無與歸。石逕荒涼。徒延佇。至於還飈入幕。寫霧出楹。蕙帳空兮夜鵠怨。山人去兮曉猿驚。昔聞投簪逸海岸。今見解帶縛塵纓。於是南岳獻嘲。北隴騰笑。引壑爭譏。攢峯竦諠。慨游子之我欺。悲無人以赴弔。故其林慙無盡。澗愧不歇。秋桂遣風。春蘿罷月。騁西山之逸議。馳東臯之素謁。今又促裝下邑。浪梗上京。雖情殷於魏闕。或假步於山扃。豈可使芳杜厚顏。薜荔無恥。碧嶺再辱。丹崖重滓。塵游躅於蕙路。污淥池以洗耳。宜肩岫幌。掩雲關。斂輕霧。藏鳴湍。截來轅於谷口。杜妄轡於郊端。於是叢條瞑膽。壘穎怒魄。或飛柯以折輪。乍低枝而掃跡。請廻俗士駕。爲君謝逋客。

俗調
開山

糜元弔夷齊文○塊壘
填齊

少承洪烈。從戎於王。側聞先生。餓于首陽。敢不敬弔。寄之山岡。嗚呼哀哉。夫五德更運。天秩靡常。如有絕

代之主。必有受命之王。故堯德終于虞舜。禹祚殄于成湯。且夏后之末祀。亦殷氏之所亡。若周武爲有失。則帝乙亦有傷。子不棄殷而餓死。何獨背周而深藏。是識春香之爲醜。而不知秋蘭之亦芳也。所在誰路。而子絕之。首陽誰山。而子匿之。彼薇誰菜。而子食之。行周之道。藏周之林。讀周之書。彈周之琴。飲周之水。食周之芩。而謗周之主。謂周之淫。是誦聖之文。聽聖之音。居聖之世。而異聖之心。嗟乎二子。何痛之深。

陸士衡弔魏武帝文并

序○當與豪士
賦序並觀

元康八年。機始以臺郎出補著作。游乎祕閣。而見魏武帝遺令。愴然歎息。傷懷者久之。客曰。夫始終者。萬物之大歸。生死者。性命之區域。是以臨喪殯而後悲。覩陳根而絕哭。今乃傷心百年之際。興哀無情之地。意者。無乃知哀之可有。而未識情之可無乎。機答之曰。夫日食由乎交分。山崩起於朽壤。亦云數而已矣。然百姓怪焉者。豈不以資高明之質。而不免卑濁之累。居長安之勢。而終嬰傾離之患。故乎。夫以廻天倒日之力。而不能振形骸之內。濟世夷難之智。而受困魏闕之下。已而格乎上下者。藏於區區之木。光乎四表者。翳乎叢爾之土。雄心摧乎弱情。壯圖終於哀志。長算屈於短日。遠跡頓於促路。嗚呼。豈特瞽史之異闕。景黔黎之怪頽。岸乎觀其所以。顧命冢嗣。貽謀四子。經國之略。既遠。隆家之訓。亦宏。又云。吾在軍中。持法是也。至於小忿。怒大過失。不當效也。善乎。達人之讜言矣。持姬女而指季豹。以示四子曰。以累汝。因泣下。傷哉。曩以天下自任。今以愛子託人。同乎盡者無餘。而得乎亡者無存。然而婉孌房闔之內。綢繆家人之務。則幾乎密與。又曰。吾婕妤伎人。皆著銅雀臺。於臺堂上。施八尺牀。繡帳。朝晡上脯。脯之屬。月朝十五。輒向帳作伎。汝等時時登銅雀臺。望吾西陵墓田。又云。餘香可分與諸夫人。諸舍中無所爲。學作履組賣也。吾歷官所得。綬皆著藏中。吾餘衣裘。可別爲一藏。不能者。兄弟可共分之。既而竟分焉。亡者可以勿求。存者可以勿違。求與違。不其兩傷乎。悲夫。愛有大而必失。惡有甚而必得。智慧不能去其惡。威力不能全其愛。故前識所不用心。而聖人罕言焉。若乃繫情棄於外物。留曲念於閨房。亦賢俊之所宜廢乎。於是遂憤懣而獻弔云爾。

接皇漢之末緒。值王途之多違。佇重淵以育鱗。撫慶雲而遐飛。運神道以載德。乘露風而扇威。摧羣雄而

電擊舉勁敵。其如遺指八極以遠略。必翦焉而後綏。釐三才之闕典。啓天地之禁闈。舉修綱之絕紀。紐大音之解徽。掃雲物以貞觀。要萬途而來歸。丕大德以宏覆。援日月而齊輝。濟元功於九有。固舉世之所推。彼人事之大遺。夫何往而不臻。將覆篲於浚谷。擠爲山乎九天。苟理窮而性盡。豈長算之所研。悟臨川之有悲。固梁木其必顛。當建安之三八。實大命之所艱。雖光昭於曩載。將稅駕於此年。惟降神之繇邈。眇千載而遠期。信斯武之未喪。膺靈符而在茲。雖龍飛於文昌。非王心之所怡。憤西夏以鞠旅。泝秦川而舉旗。踰鎬京而不豫。臨渭濱而有疑。冀翌日之云瘳。彌四句而成災。詠歸塗以反旆。登嶠澗而竭來。次洛汭而大漸。指六軍曰念哉。伊君王之赫奕。實終古之所難。威先天而蓋世。力盪海而拔山。厄奚險而弗濟。敵何彊而不殘。每因禍以禔福。亦踐危而必安。迄在茲而蒙昧。慮噤閉而無端。委軀命以待難。痛沒世而永言。撫四子以深念。循膚體而頽歎。迨營魄之未離。假餘息乎音翰。執姬女以嘯瘁。指季豹而濯焉。氣衝襟以嗚咽。涕垂睫而汎瀾。違率土以靖寐。戢彌天乎一棺。咨宏度之峻邈。壯大業之允昌。思居終而恤始。命臨沒而肇揚。援貞吝以甚悔。雖在我而不臧。惜內顧之纏緜。恨末命之微詳。紆廣念於履組。塵清慮於餘香。結遺情之婉孌。何命促而意長。陳法服於帷座。陪窈窕於玉房。宜觴物於虛器。發哀音於舊倡。矯戚容以赴節。掩零淚而薦觴。物無微而不存。體無惠而不亡。庶聖靈之響像。想幽神之復光。苟形聲之翳沒。雖音景其必藏。徽清絃而獨奏。進脯糒而誰嘗。悼總帳之冥漠。怨西陵之茫茫。登爵臺而羣悲。貯美目其何望。旣晞古以遺累。信簡禮而薄葬。彼裘紱於何有。貽塵謗於後王。嗟大戀之所存。故雖哲而不忘。覽遺籍以慷慨。獻茲文而悽傷。豈爲魏武言。

沈初明經通天臺奏漢武帝表○

文外獨絕

臣聞橋山雖掩鼎湖之竈。可祠有魯遂荒。大庭之跡無泯。伏惟陛下降德猗蘭。纂靈豐谷。漢道旣登。神仙可望。射之罘於海浦。禮日觀而稱功。橫中流於汾河。指柏梁而高宴。何其甚樂。豈不然歟。旣而運屬上仙。道窮晏駕。甲帳珠簾。一朝零落。茂陵玉盃。宛出人間。凌雲故基。共原田而撫臚。別風餘趾。帶陵草而茫茫。羈旅累臣。能不落淚。昔承明旣厭。嚴助東歸。駟馬可乘。長卿西反。恭聞故實。竊有愚心。黍稷非馨。敢望徼福。但雀臺之弔。空愴魏君。雍邱之祠。未光夏后。瞻仰煙霞。伏增悽戀。

當指梁武帝

曹子建釋愁文

子以愁慘。行吟路邊。形容枯悴。憂心如醉。有元靈先生見而問之曰。子將何病。以至於斯。答曰。吾所病者。愁也。先生曰。愁是何物。而能病子乎。答曰。愁之爲物。惟恍惟惚。不召自來。推之弗往。尋之不知其際。握之不盈一掌。寂寞長夜。或羣或黨。去來無方。亂我精爽。其來也難退。其去也易追。臨餐困於哽咽。煩冤毒于酸嘶。加之粉飾。不澤飲之以兼肴。不肥溫之以金石。不消磨之以神膏。不希授之以巧笑。不悅樂之以絲竹。增悲醫和絕思。而無措。先生豈能爲我著龜乎。先生作色而言曰。子徒辯子之愁形。未知子愁所由而生。我獨爲子言其發矣。方今大道旣隱。子生末季。沉溺流俗。眩惑名位。濯纓彈冠。諮趣榮貴。坐不安席。食不終味。遑遑汲汲。或懣或悴。所鬻者名。所拘者利。良由華薄凋損。正氣吾將贈子。以無爲之藥。給子以淡薄之湯。刺子以元虛之針。灸子以淳朴之方。安子以恢廓之宇。坐子以寂寞之床。使王子喬與子遨遊。而逝。黃石公與子詠歌而行。莊子與子具養神之饌。老聃與子致愛性之方。趣避路以棲跡。乘輕雲以翱

翔。于是精駭魂散。改心回趣。願納至言。仰崇元旨。衆愁忽然。不辭而去。

王僧孺懺悔禮佛文

夫有非自有。有取所以。有無非自無。無著所以無。故有取之惑興。修成萬累。無著之念起。一超九劫。是知道之所貴。空有兼忘。行之所重。真假雙照。稟氣含靈。莫聞斯本。肖形賦影。靡測由來。故發茲識窟。猶綿蒙其莫辨。導此愚相。尙窈冥而未悟。茫茫其同暗海。幽幽實在危城。業風縈薄。三有長驚。惑水遭迴。二死相屬。以苦捨苦。從暗入暗。尋本不離色心。卽事莫非生滅。是用抱此纏蓋。輪迴生死。恣其六欲。興其八邪。或狙詐而克昌。乍仁義而溘死。或才均智等。此賤彼豪。或共日並時。人升我墜。唯言報施寂寥。不知因對皎徹。曩緣今果。遇現值成。有如符契。不謬毫髮。而欲以促生運。其長術浮命。迴其冥數。當知刹那交謝。瞬息不留。東搏纔吐。西崦已仄。譬閱川之駛流。若棲葉之輕露。僞城易弛。毒樹自攻。若非假實兩明。真俗俱辨。豈能寫誠迴向。刻意修習。不退不沒。愈堅愈固。南平大王殿下。含辰象之正氣。畜海嶽之淳靈。宿侍八恆。早遊七覺。藉妙因于永劫。招勝果于茲地。若真金之愈瑩。美玉之載琢。是用未積已散。不藏而捨。故今式招靈指。仰屈神儀。建此齊肅。譬茲關鍵。盛來縑素。濟濟洋洋。名香遍室。寶華覆地。高梵宛轉。寧止震木。遏雲。清桴遙奕。非直騰魚御馬。仰願四部至誠。五體歸命。東方云云願大王殿下。五畏內遣。十力外扶。百福莊嚴。萬祉周集。愕夢無忤其慮。甘寢有恬其神。更闢寶衢。愈興慧業。

夫元極凝淡。非學者所窺。妙本難思。豈行人能測。是以十地云觀。有羅縠之疑。三乘見稱。懷狂羊之惑。自非鑒窮機覺。照極冥虛。窮理盡性。體元合一。安能濟世仁壽。拯物阽危。道包碧海。聲高赤縣。昔堯曜唯在。

卽世舜黑不兼來果。四巡疲于禹跡。六事倦于湯身。並域中之勤勞。方內之成益。豈有度元元于苦海。拔
冗冗于畏途。連神力。震法吼。究香城之妙理。窮金河之奧說。慧高龍樹。智出馬鳴。必欲洗濯臣民。獎導滯
白。天覆地養。水產陸生。咸降慈悲。悉蒙平等。奉爲皇帝陛下。儲君太子。歸命敬禮。云云仰願皇帝陛下。景祚
與七政相齊。皇基與二曜均永。地平天成。樂和禮洽。玉燭道正。氤氳無爽。條風祥雨。膏潤相屬。却馬偃伯。
鑄戟銷戈。南洎北臨。西被東漸。灑甘雨。布慧雲。唯繩可結。在冠已盡。唐哉皇哉。爲導爲首。又願皇太子殿
下。睿業清暉。與貞明而並燭。粹範溫儀。從嵩霍而俱峻。聲出姬誦。道越漢莊。永沐智水。長照慧日。上妙居
身。至仁在己。自雙樹八枝。潛光匿曜。寶城不闢。慧扇方掩。而聖后。驚法輪于長路。棹寶舟于遙壑。道浹人
祇。福隆祧墀。肅事園寢。虔奉宗祏。藉斯妙果。奉逮七廟。聖靈歸命敬禮。云云仰願重明累聖。優然如在。騰神
淨國。總駕天宮。託化金渠。遨遊寶殿。

夫誠心明惻。則至覺如在。形力外殫。則法身咫尺。衆等相與增到。爲諸王兄弟妃主戚屬。歸命敬禮。云云願
諸王殿下。裂壤盛于諸姬。磐石過于隆漢。德高魯衛。義重閭平。論道則百辟依風。作翰則羣黎仰化。宏闡
至致。紹隆季像。第內少長。並膺此多福。若百華之春麗。譬萬寶之秋成。信解堅深。翹望無怠。
夫小乘志劣。事唯一己。大士意均。乃包六趣。今日檀主。信等明珠。無勞傍鏡。質同挺玉。不待外光。常欲物
我均心。怨親等觀。衆等各歸誠。爲二十八天。四王釋梵。人間貧病。地獄辛楚。敬禮尊儀。靈像菩提。寶塔。云云
大乘奧藏。妙法深經。大身無邊身。大力無量力。四向四果。八賢八聖。願六氣氤氳。四序熙穆。至治光萬宇。
元化洞九幽。襲介披鱗。溼生卵化。八苦六窮。三塗五道。俱蒙惠利。並識遵依。刀林輟刃。劍樹搖險。迷域開

道直指四衢。闔室生明。大啓三曜。俱尙道場。同登種覺。禪悅之辭。與繁藻雜糅。文人之陋者。此種文字。王簡栖而外。鮮可誦者。以其兩乖。遂至雙阻。

竊以布金須達。表精舍于給園。影石仙人。造伽藍于離越。莫不事表區中。心憑真外。但固纏惑惱。去善源而無滌。五濁重疊。非慧刃而安揮。故以愍彼溼薪。傷茲滴器。今于郢州某山。爲十方僧。建立招提寺。綦負郊原。面帶城雉。枕倚巖壑。吐納煙雲。重門洞啓。未創飛行之殿。步櫺中霑。猶寡密石之加。嚴飾之理難階。瓶鉢之資已罄。道俗儻能微留善念。薄獎勝緣。則事等觀香。義同錫乘。昔人修檀。手雨七寶。前賢薄施。掌出雙金。福有冥移。言無多遜。謹疏。

仲長公理樂志論○獻案樂志是昌言篇名論字當去此亦賈生過秦之比後人謬加論字耳

使居有良田廣宅。背山臨流。溝池環市。竹木周布。場圃築前。果園樹後。舟車足以代步涉之難。使令足以息四體之役。養親有兼珍之膳。妻孥無苦身之勞。良朋萃止。則陳酒肴以娛之。嘉時吉日。則烹羔豚以奉之。蹶踏畦苑。游戲平林。濯漢水。追涼風。釣遊鯉。弋高鴻。諷於舞雩之下。詠歸高堂之上。安神閨房。思老氏之元虛。呼吸精和。求至人之彷彿。與達者數子。論道講書。俯仰二儀。錯綜人物。彈南風之雅操。發清商之妙曲。逍遙一世之上。睥睨天地之間。不受當時之責。永保性命之期。如是則可以陵霄漢。出宇宙之外矣。豈羨夫入帝王之門哉。

亦無餘味

蕭大園言志○

拂衣裘裳。無吞舟之漏網。挂冠懸節。慮我志之未從。儻獲展禽之免。有美慈明之進。如蒙北叟之放。實勝

濟南之徵其故何哉。夫閭閻者有優游之美。朝廷者有簪佩之累。蓋由來久矣。留侯追蹤於松子。陶朱成術於辛文。良有以焉。況乎志不逸羣。行不高物。而欲辛苦一生。何其僻也。豈如知足知止。蕭然無累。北山之北。棄絕人間。南山之南。超踰世網。而脩原而帶流水。倚郊甸而枕平臬。築蝸舍於叢林。構環堵於幽薄。近瞻煙霧。遠睇風雲。藉纖草以蔭長松。結幽蘭而援芳桂。仰翔禽於百仞。俯泳鱗於千澗。果園在後。開牕以臨花卉。蔬圃居前。坐簷而看灌叻。二頃以供饘粥。十畝以給絲麻。侍兒五三。可充紉織。家童數四。足代耕耘。沽酪牧羊。協潘生之志。畜雞種黍。應莊叟之言。穫菽尋汜氏之書。露葵徵尹君之錄。烹羔豚而介春酒。迎伏臘而候歲時。披良書。探至蹟。歌纂纂。唱烏烏。可以娛神。可以散慮。有朋自遠。揚摧古今。田峻相過。劇談稼穡。斯亦足矣。樂不可支。永保性命。何畏憂責。豈若蹙足入絆。申脰就羈。遊帝王之門。趨宰衡之勢。不知飄塵之少選。寧覺年祀之斯須。萬物營營。靡有其意。天道昧昧。安可問哉。嗟乎。人生若浮雲。朝露寧俟長繩繫景。實不願之。爇燭夜遊。驚其迅邁。百年何幾。擊蹠曲拳。四時如流。俛眉躡足。出處無成。語默奚當。非直邱明所恥。抑亦宣尼恥之。

憂生蕉萃
亂世之文